

EKALESIA FAAPOTOPOTOGA KERISIANO SAMOA

Matagaluega A'oa'oga Kerisiano



**VASEGA MATUTUA FAAPITOA & AUTALAVOU LAITI
2019**

FAASOLOGA MATAUPU
VASEGA MATUTUA FAAPITOA 2019

**MANATU AOA O LE TAUSAGA: IESU E, A'OA'O I
MATOU IA POPOTO I OU ALA**

**MANATU TAIALA IANUARI & FEPUARI:
IA MAU PEA LE TO'OVAE**

IANUARI:

27 O le tofa fetāla'i Kenese 26: 12 – 25
(Aso Sa o Tupulaga)

FEPUARI:

3 E iloa le auro moni i le afi Galuega 5: 17 - 32
10 Ia matau mea uma lava i le Atua
Kenese 24: 1-10
17 Aua e te ola ma amio faavale
1 Samuelu 26: 13 - 25
24 Faamausalī lou loto i le Atua
Mataio 6: 25 – 34

MATI & APERILA: IA LOTO TETELE I LE GALUEGA

MATI:

3 Aua le fefe e ta'u le mea sa'o 2 Samuelu 12: 1-14
10 Fiafia e a'oa'oina mai isi Faataoto 3: 13-24
17 E nanamu ma matagofie le fai mea sili
Mareko 14: 1 - 9

24 Fefaasoa'i mafatiaga ma tatalo mo se
faamalologa Iakopo 5: 13-19
31 E faapefea ona ola i le Ekalesia?
1 Timoteo 3: 8 – 16

APERILA

7 Taumafai ia lava lou onosai 1 Tesalonia 5: 12-22
14 Alu i le mauga e tatalo Mareko 6: 45 – 52
(Aso Sa Laupama)
21 O le a le ituaiga Kerisiano o e iai?
(Aso Sa Toetu) Galuega 4: 13 - 22
28 O le Atua auai mai lo tatou aiga
Salamo 90: 1 – 12

ME: IA VIIA LE ALII I O TATOU OLAGA

5 Fa'aa'oa'o i ala o Kalepo Iosua 14: 6 – 15
12 Avea ma tina e mata'u i le Atua
(Aso Sa o Tinā) Faataoto 31: 10-31
26 Momoe ia e taunuu i le tini Eperu 12: 1 – 11

IUNI: AUA NEI UTUVAITOFI I LE FINAGALO O LE ATUA

2 E fa'aaoga e le Atua tamaiti mo lona finagalo
2 Tupu 5: 1 – 14
9 Ua apoapoi atu Paulo i le Ekalesia i Kolose
Kolose 4: 1 – 18
16 O le tusi a Eperu Eperu 1 – 13
23 O le faaola poo le fasioti Mareko 3: 1 – 6
30 O le poto o le Atua 1 Korinito 1: 18 – 25

IULAI: E LE MAFAI E LE POLOKIKI MA LE AGANUU ONA FAAILOA LE AMIOTONU A LE ATUA

7 Noanoatia i le tulafono Kalatia 3: 1 – 29
14 Poto ma le mafaufau Iopu 28: 1 – 18
21 O tulafono le mama Mareko 7: 1 – 23
28 Ia latou iloa o au o le Alii Esekielu 6: 1 - 14

AOKUSO: E TASI LAVA LE ATUA

4 O mea e manao ai le Atua Mika 6: 1 – 8
11 O le sootaga faaletinā ma le fanau
(Aso Sa Tamā) Ioane 19: 25 – 27
18 Ua tala mai le lagi le mamalu o le Atua
Salamo 19: 1 – 10
25 Alofa ia ou fili Luka 6: 27 - 36

SETEMA: O AAFIAGA O LE TALA LELEI

1 E matagofie vae o e aumai le Tala Lelei
(Aso Sa o le Tala Lelei) Isaia 52: 7 – 12
8 Ua salalau le Tala Lelei i nuu ese
Galuega 8: 26 – 39
15 E le faamaina se tagata faatuatua ia Keriso
Roma 10: 11 – 13
22 O le Fale Tatalo Mareko 11: 15 – 19
29 Tapuai i le Atua ma le faamaoni
Jeremia 7: 1 - 7

OKETOPA: O LE ATUA MO TAGATA UMA

6 Tapenaga Lotu Tamaiti
13 **Aso Sa o Tamaiti**
20 Malolo
27 E taua tagata uma i le Atua Ruta 4: 13 – 17

NOVEMA: O LE OLA FAITAUAGA MO LE ATUA

3 O le uiga o le Taulaga Kenese 8: 20 – 22
10 O le alofa e faatino i le loto foa'i
Filipi 4: 14 – 20
17 E fa'aali mai le Atua i Taulaga
Faamasino 13: 19 - 23
24 O suli moni o Keriso Mataio 12: 46 - 50

TESEMA: UA AUMAI E LE ATUA LE OLIOLI I TAGATA

1 Ia saili i le Alii Isaia 55: 6 – 9
8 O le olioli ua oo mai Isaia 61: 10 – 11
15 O le Atua liutino tagata Ioane 1: 1 - 5

**MANATU TAIALA IANUARI MA FEPUARI:
IA MAU PEA LE TO'OVAE**

Ao tapenapena la tatou folauga o lenei foi tausaga 2019, e manatua pea le tu'u-a-lalo masani a le au matutua; "**Ia mau pea le toova'e.**" O le timaiga ia tautuana le va tapuia, 'aua nei oia ao gasolo le malaga. A alia'e ni faaletonu ao gasolo le malaga, tatalo i le Atua, auina ifo lona Agaga mana, e fesoasoani ina ia tatou tofū lagona le onosai ma le fefaapalepalea'i; e afua ai lo tatou toafilemu, ma mautinoa ai lo tatou taunuu manuia.

ASO SA: 27 IANUARI 2019

MATAUPU: O LE TOFĀ FETALA'I

SINI: A'oa'o tamaiti ia latou iloa, le taua ma le lelei, o le tofā fetala'i. (O le tofā fetala'i, o le tofā fetu'utu'una'i lava lona; o lona uiga, o le lē taofiofi mamau i se manatu, po o se finagalo se tasi, ae fetu'utu'una'i po'o fea le mea e sili ona lelei)

TUSI FAITAU: Kenese 26: 12 – 25

FESOASOANI MO FAIAOGA:

E foliga tutusa lava mea na tutupu o taua i le mataupu 12; ma le tala lenei; O ni tala foi e tele ni itu taua o iloa mai ai. Peitai, o le a taoto le anoanoa'i o itu taua, ae sei o tatou tulimatai le autu o fai ma faamamafa o lenei Aso Sa; "O le tofā fetala'i," Sa faatonu atu e le Atua Isaako, e nofo faa-tagata aumau i le nuu o Kira. E ui e le o sona nuu moni, ae lei faavaivai lona punou ifo

e matuā gagau le vao ma faato'a le laufanua. E le'i mapu foi lo latou fetagofi ifo ma ona tagata, e eli vaieli; auā e tua i ai i latou, o lafu manu, ae maise foi faatoaga. Ua tagata ola Isaako, ma ua avea ma tagata malosi, ona fuā lea o le loto o Apimeleko le tupu, ma ua ia tuliese o ia mai lo latou nuu. O loo taua i le f.17, "Ona alu ese ai lea o Isaako, ua to lona fale-ie i le vanu o Kira, ua nofo ai." Na fai atu loa e alu ese, alu ese loa e aunoa ma se upu na tali mai ai! E le sa ona finau Isaako i le tupu, ona o lona tigaina ma le tele o mea ua ia saunia; Peitai, ua manatu ifo i lona loto; O le a le faia se finauga ma le tupu ae ua ia faamaulalo lona loto, ma alu ese; O le tofā a le tagata saili malo i le Atua i ala o le filemū, ma lona talitonuga, e le oge auala le Atua.

O le vanu o Kira le nofoaga fou lea ua mautū i ai, ma sa faapena foi ona toe punoua'i Isaako ma ona tagata, e pei foi ona sa iai muamua. O lo latou toe eli ma lalaga i luga vaieli sa latou eli i aso o Aperamo lona tamā, na mafua ai foi ona fefinaua'i i latou ma leoleo manu o le nuu o Kira. O le vaieli na latou elia muamua ma fefinaua'i ai, sa ia faaigoa, "O Eseki," e faamanatu ai le fefinauaiga. O lona lua o vai na latou elia ma toe vevesi ai foi, sa ia faaigoa ia, "O Setani," o lona uiga, o le vai na latou misa ai.

Ua toe oese foi Isaako ma ona tagata ma a latou lafu, ma ua faamautu i le tasi ogaeleele e ese mai le mea sa iai. Ua galulue ai iina ma eli ai isi vaieli, ae ua le toe misa pe finau mai tagata iā latou. Ona faaigoa ai lea e Isaako le vaieli i lea mea, "o Reopo," o lona uiga, Ua faalauteleina e le Atua le mea e nonofo ai, ma uluola ai. Mulimuli ane, ona alu lea o Isaako i Peresepa, o iina na fa'aali ifo ai le Atua iā ia; folafola atu faamanuiaga ma faamalosi atu foi e loto tele ma 'aua le fefe, auā e le tuua lava ia e le Atua, ona sa tauto le Atua i lona tamā o Aperamo, o le auuuna faamaoni a le Atua. Ona fai ai lea e Isaako iinā le fata faitaulaga, ua ia valaau atu ai foi i lona suafa ia faamanūina pea. Ona nonofo ai lea, ua uluola ma tupu lona aiga ma lona nuu, ma ana

mea uma. O le tofā sa fetu'utu'unai, ma tatala pea mo mea sili, lea ua taunuu i le manuia.

Tupulaga o tama ma teine talavou, manatu o lo tatou faasinomaga sili lea ona lelei. O lo tatou ola e iloa faamaulalo ma tausi le filemu, o itu taua na e pogai mai le mafaufau e fetu'utu'unai, ae lē o le taofiofi mamau. E le'i fa'aalia lava se tete'e o Iesu i lona Tamā, na ona faalologo lava ma usiusita'i, seia oo ina taunuu. Le Faaolataga tele lena o le manumalo mo tatou uma e faatuatua ia te Ia.

Uiga o Upu ma Fuaitau:

- | | | | |
|------|------------------------|---|-----------------------------------|
| i) | tagata ola (f 13) | - | mau oloa ma tamaoaiga |
| ii) | mataua (f 14) | - | ita/le fiafia/fuā le loto |
| iii) | to lona fale ie (f 17) | - | faatu po o le tatala lona fale ie |
| iv) | Eseki (f 20) | - | o le finauga |
| v) | Setani (f 21) | - | o le misa |
| vi) | Reopo | - | faalautele |

GALUEGA FAATINO:

1. Faamatala mai i au lava upu, se mea moni na tupu; po o se tala foi e te nofo lava oe ma fatu; Ae o atagia mai ai se tofa-fetala'i, ma sona taunuuga lelei.

PESE: 165

A'OA'OGA:

1. O le uta a le poto e fetala'i, ae o le vale e taofi mau.
2. O le tofā sili, le Atua.
3. O le loto maualalo e taunuu manuia ma filemu.

.....

ASO SA: 3 FEPUARI 2019

MATAUPU: E ILOA LE AURO MONI I LE AFI

SINI: A’oa’o tamaiti ia latou malamalama lelei, o le matautia ma le aasa o faigata ma mea matuitui, o ola ai le Kerisiano, o iina o le a iloa tino ai le tagata mausali ma faatuatua faamaoni i le Atua.

TUSI FAITAU: Galuega 5: 17 – 32

FESOASOANI MO FAIAOGA:

Ua faaulutalaina la tatou Mataupu o lenei Aso Sa, i se tasi o fuaitau ua tatou masani ai e faapea’ “E iloa le auro moni i le afi.” O le upu faamuagagana a le atunuu le upu lea, o afifi mai ai se feau loloto ma taua, i lona faauigaina. O le lalolagi o tatou i ai nei, ua le iloa tonu lava le auro moni, ona o le tele o ma’a iila eseese ma taua; o le atamai foi i nei ona po, ua mafai lava ona ia fausia se matagofie e sili atu i le auro, e ui ina e le tumau. Le vao filifili lea o matagofie eseese, ua faigata ai lava ona iloa tino le auro moni, ma o le taua la lenā o le afi. O le aasa ma le matautia o le afi, o le malosi lena na te faaliusuavai mea uma, ona iloa tino lava lea o le auro moni, mai isi ma’a eseese.

A faitau mai le amataga o le Mataupu, i le oti o Anania ma Safaira lana avā, o fa’aaliga lava na o le mana o le Atua, e ala mai i le au Aposetolo filifilia a le Alii o Iesu. O le tele o tagata na vaai ma faalogo i le au Aposetolo, ua liliuina o latou loto, ua gauai e mulimuli atu ia i latou. O le vaega tonu la sa tatou faitauina o faatatau i la tatou mataupu; O i tonu na tupu tele ai le ita, ma ave ai loa le au Aposetolo i le falepuipui, lea foi na toe alia’e mai ai le isi vavega, o le aumaia lea i fafo e le agelu o le au

Aposetolo, e aunoa ma se iloa e se leoleo, e aunoa foi ma se faitotoa o le falepuipui e matala. Ua tupu tele pea le ita o le nuu ma taitai o le lotu Iutaia, ona o le vaoia atu e soia le tautatala soo, ma a’oa’o atu i tagata le suafa o Iesu; ae tali mai le au Aposetolo, E tusa ona sili o lo matou anaana i le Atua, i lo matou anaana i tagata. O le faaiuga ua la’a nei iai taitai o le lotu ma le nuu, o le a fasiotia loa le au Aposetolo. Peitai, na faia foi e le Atua le tasi auala, e ala mai i le Faresaio o Kamalielu, lea na faasaoina ai le au Aposetolo i le iuga o le tala.

O loo iloa mai le vaega tonu sa tatou faitauina, tagata loto tetele ma e le solomuli i le matuitui o faigata ma puapuaga sa latou fetaii, ona o lo latou faatuatua mausali i le Atua moni e toatasi. O faafitauli o luitau ai pea; le ola ma talitonu i le Atua, tusa po o a faafitauli ogaoga latou te fetaii, ‘O auro moni lava na,’ le au Aposetolo. Tamaiti, o outou o loo faamoemoe iai le manuia o aiga. E moomia lo outou loto tetele i le Alii, o le poutū lena o mea uma. ‘Aua nei outou fefefe ona o mea sēsē, nei outou ufiufi, ona liua ai lea o outou, ma le ave ai outou ma auro moni o le malo o le Atua. O Iesu Keriso, o loo susulu mai pea e pei o le auro lona alofa i le lalolagi, ona na te lei alofia puapuaga o le ola, lea lava na ia masoe ai, ona o le taulaga faaola mo le lalolagi.

Uiga o Upu:

- | | | | |
|------|-----------------|---|--|
| i) | Satukaio (f 17) | - | ituaiga o Iutaia, e tete’e ia Iesu, ma le tulafono |
| ii) | matataua (f 17) | - | feita/inoino/le fiafia |
| iii) | to atu (f 23) | - | tatala atu |

GALUEGA FAATINO: (Taliga Fesili)

1. O ai auro moni o ta’ua i le tala?
Tali: O le au Aposetolo

2. Afai tatou te anaana i le Atua, o lona uiga;
- (i) Ua ia te i tatou se malosi mai le Atua, o le a lea malosi?
Tali: Malosi o le Agaga Paia
- (ii) Ua avea foi i tatou ma molimau, molimau i le a?
Tali: Molimau i le Toetu mai le oti ma le tuugamau.
3. E ui lava o le ositaulaga, o taitai o le nuu, ma taitai 'au, tagata o latou pulea le nuu, ae aisea e le faamalosi ai ona faia so o se mea latou te loto ai?
Tali: E mumusu nei vevesi, ma toe aafia ai lava i latou.
4. E faapefea ona avea, pe fai oe ma auro moni o le malo o le Atua?
Tali: Pe a mausali le faatuatua.

PESE: 168

A'OA'OGA:

1. Ia fai ma molimau faamaoni i le Toetu o Iesu.
 2. E taua faigata, e iloa ai le tulaga o iai le faatuatua
 3. Fai le Agaga o le Atua ma ou malosi.
-

ASO SA: 10 FEPUARI 2019

MATAUPU: IA MATAU MEA UMA LAVA I LE ATUA

SINI: A'oa'o tamati, ia latou iloa, o lavasiga o le soifuaga o tatou iai nei, e ave le faamuamua i le tagata soifua, ona o le palealii o le foafoaga paia. Peitai, o lo tatou va-nononofo, tatou mea uma na faia e le Atua, ma le Atua, e matau mea uma lava ia te Ia.

TUSI FAITAU: Kenese 24: 1 – 10

FESOASOANI MO FAIAOGA:

O la tatou tala, o loo iloa ai ua matua le soifua o Aperaamo, o loo iloa ai foi, o ia o se tagata faamanuiaina e le Atua. O lea faamanuiaga o Aperaamo, o loo faapogai mai lona soifuaga atoa, o se tagata faalogo ma usiusitai i le finagalo o le Atua. E ui lava ina matua Aperaamo e tusa o le tala, ae leai lava se foliga o vaivai lona talitonu, ma lona ola faatuatua i le Atua, ae na o le saga faamausaliina pea.

O lona soifua matua, ua manao ai e fai se avā, po o se toalua o lona atalii o Isaako. A silasila i le tala, e le o se manao na ona lafo atu, faitalia le auauna ia, ma le ala e faataunuu ai le manaoga. Leai! Sa osi lelei le feagaiga ma fai aiaiga uma ma le auauna, ina ia 'aua lava nei solia se poloaiga, po o ni tu'utu'uga, e pei ona poloai mai le Atua i le amataga.

Muamua; O Mesopotania i le aiga o Nakori, o le aiga lava lea o Aperaamo, e saili mai ai se teine, e fai ma avā a Isaako. Pe afai ae manao mai le teine e alu atu le tama sei vaai i ai; E sā lava ona

alu i ai Isaako. Vagana la ua lē mafai lava ona sau le teine, ona le afaina lea, ua mamā lava le auauna.

Lua; E sa ona aumai se toalua o Isaako, mai se nuu o Kanana, le laueleele o nonofo ai nei, ina nei tosina lona loto i atua ese, ma galo ai lona Atua moni e toatasi.

Tolu; Ona sulu atu lea le lima o le auauna i lalo o le aloivae o Aperamo, e pei ona manao mai ai o ia. O lea faiga, o se aganuu a Sasae i ia aso, e fai ma faailoga famaoni o se mea ua fai. O le māea o le feagaiga, ona tautō ai lea o le auauna e faamausalī ai le ave o le faamuamua i le Atua, i ala uma o le a uia, i le sailiga o se avā a Isaalo.

Tupulaga o tama ma teine, o se tasi lea laasaga tāua o le olaga, o le a oo lava i ai, pe a i'u manuia aoga. Peitai, e le o le faamamafa lea, "o le fai o le toalua." Ae o le faamamafa – o tāiga uma lava o le ola o tatou i ai nei, ua taoto lava taiala tatau e tusa ma le finagalo o le Atua, mo le faatinoina o a tatou feau. O taiala faale-Atua mo se taunuuga manuia o so o se faamoemoe, ma o ala tonu na tatou te savavali ai. O Iesu foi, na taoto lava lona tulaga tutusa ma le Atua, ae na faamaulalo ma afio ifo e osi le taulaga faaola mo le lalolagi auā o le finagalo lea o lona Tamā. Ua ama i lona tagata (liutino) ae matau i le Atua lona Tamā.

Uiga o Upu:

i) aloivae (f 2) - faiga o le vae

GALUEGA FAATINO:

Mafaufauga loloto i le Tusi Paia (Tali mai Fesili ia)

(i) Faamatala mai, po o le a le ala e musu ai Aperamo, e aumai se toalua o Isaako mai le nuu o nonofo ai nei.

(ii) E loto Aperamo e aumai se avā a lona atalii o Isaako mai i lona nuu ma lona aiga, ae matuā sa lava ona alu iai Isaako, pe a manao mai iai se teine. Faamatala auiliili mai sou manatu i le mea lea, pe aiseā e sa ai?

Tali: E fai ma fesoasoani i le faiaoga)

O le vaega (i), o le pogai autū lava o le vavao, ona o nuu faapaupau o loo nonofo ai nei, e faigofie ona gauai Isaako i se fafine Kanana, ma galo ai le Atua moni e toatasi

O le vaega (ii) E matele le mafaufau i le feagaiga ua uma ona ioeina e Aperamo, na alu ese ai ma lona aiga, nuu, ma le laueleele (Kenese 12: (i)ff). E le toe foi, e le toe vaai, etc; O le mea lava ua iai nei na faasino mai e le Atua e nofo ai, o lenā lava. O Isaako foi, na fanau i le mea o iai nei, o le tama moni lava a le laueleele, e lei fanau i le aiga ma le nuu o Aperamo. Tusa lava pe na o le alu o Isaako i le manao mai o se teine, toe sau; I le manatu o Aperamo, o le soli lava lenā o le mea ua uma ona tautō ai i le Atua; O le tuu o lona nuu moni ma le aiga moni, ae fai mona le nuu ua nofo ai nei, o lona matūpalapala mai le Atua.

PESE: 333

A'OA'OGA:

(i) Faamaoni i le va ma le Atua

(ii) O Isaako o le alii o aiga

(iii) Ia fai ma auauna faamoemoeina

.....

ASO SA: 17 FEPUARI 2019

MATAUPU: AUA E TE OLA MA AMIO FA'AVALE

SINI: Ia a'oa'o tamaiti ia latou iloa, o le tagata e le faalagolago i le Atua, ae mulimulitai i lona lava iloa ma ona lagona o le vale i luma o le Atua.

TUSI FAITAU: 1 Samuelu 26: 13 – 25

FESOASOANI MO FAIAOGA:

O le aotelega lava o le tala, o atagia mai ai ni lagona esee se lua; ae o le tala lava ia, o le toe faasaoina e Tavita o le ola o Saulo. Manatua, e le faatoā maua lea e Tavita o se avanoa faapea na te fasiotia ai Saulo; Peita'i, o laualuga i lona loto le Atua ma lana faauuga na fai ia Saulo. Lea na ia manatu ai; E taatia pea le iuga o Saulo i le Atua ma lana pule, ma le taimi e tusa o lona finagalo. O le loto e faamaulalo, ma tuu avanoa i le Agaga o le Atua, na te faasino mai le mea tatau ma lelei e fai; O le tagata poto.

Peita'i Saulo, e le pei o Tavita. O Saulo o le tagata e tele ina mafaufau mo lona lava taulelei, ma ia tautau'a; O le ala lena e le fesili ai, ma le faalagolago ai i le Atua i le tele o taimi, a'e fai lava le mea e loto i ai. A'o lona le tapā lea o le Atua i le tele o taimi, lea e faasoosoina ai lava ia e ona lava lagona ma titi'e a'e ai pea lona loto ita, e seāseā ona ia lagonaina le filemū.

O le faasolo ina matua le soifua o Saulo le tupu, o loo ia tautino ai i le tusi faitau o la tatou mataupu o le aso e faapea; (1 Samuelu 26: 21). “Ua ou agasala.... Faauta, ua ou amio faavalea, ma ou sese tele lava.” (I have sinned surely, I have acted like a fool, and have erred greatly). O lona lagona ma lona manao e fia

tautau'a, sa ia manatu ai e fai mea i lona lava malie ma lona loto, ae le'o ala o le Atua. I le 1 Samuelu 13: ff; sa manatu Saulo e tuu faatasi vaega a'u. Sa ia iloa e tatau ona ia faatali, sei sau Samuelu le Perofeta e ofo le taulaga mū, e pei ona tatau i le tulafono. Ae na nofo lava ia ma fai i lana pule, ae lei fesili i le Atua (1 Samuelu 13: 12). O iina lava o loo tauvaleina ai Saulo e Samuelu. Fai mai Saulo, “Na ia lagona” (I felt), o lona uiga e sa'o i lona manatu mea uma, ae leai, e sēsē ma lē tatau. Seiloga lava o le taimi e o faatasi ai lagona o le tagata ma le upu a le Atua, ona faatoa e faatuatua lea i ou lagona.

O le taua foi e Saulo o le ta'ape o le nuu, ma le tuai atu o Samuelu, ae ua fofou mai le taua i Mekamase. O se faamatalaga o taumafai e pupuni ai lona le usiusitai ma lona le fesili i le Atua. O nei mea uma, o le faailoga o le lē usiusita'i o Saulo i le Atua. Ua lē gata la ina atagia ai lona paū maulalo, ao matilatila ai foi ma lona valea; auā o lona lē usiusitai lava lea, na iu i lona toe pule lava i lona ola i le malae o le taua.

O lona valea foi na taua e Samuelu, lea lava ua ia toe tautino iinei f.21 “Ona fai mai lea o Saulo ua ou agasala... faauta, ua ou amio faavalea, ma ou sēsē tele lava. E tele tagata e a'oa'oina mai a latou lava mea sēsē. O isi e a'oa'oina mai isi tagata. Ae mo tatou, ia tatou a'oa'oina mai ia Saulo iinei – ‘Aua tatou te amio ma ola e pei o ni vale. Tupulaga ma teine ma tama, o le feau taua lena e fai ma a tatou feau tauave, Ia iloa ona fai atu i isi uso, tuafafine, ma tuagane. Ia usiusitai ma faalogo i le Atua, aua e le tauvaleina ai i tatou. O le usiusita'i foi o Iesu, na ia faia ai le Taulaga o le Faaolataga mo tagata uma.

GALUEGA FAATINO:

Fai sina faatinoga puupuu o le tala, na o le lua vaega. O le vaega a Saulo ma Apineru, ma le vaega a Tavita ma Apisai.

PESE: 256 (Talofa, oi talofa, i e faapaupau)

A’OA’OGA:

1. Faalagolago i faasinoga a le Atua e manuia ai
2. ‘Aua nei goto le la o ē ita pea
3. O le loto maulalo e faeaina.

.....

ASO SA: 24 FEPUARI 2019

MATAUPU: FAAMAUSALĪ LOU LOTO I LE ATUA

SINI: Ia a’oa’o tamaiti ia latou iloa, o le malō o le Atua, e le faia mo i latou o ē loto popole i mea a le lalolagi, ae mō ē faatuatua maua’ a i le Alii.

TUSI FAITAU: Mataio 6: 25 – 34

FESOASOANI MO FAIAOGA:

O le itu tāua ia manatua, e le avea lo tatou faataua o le lotoifale i totonu i ō tatou loto, ma ala e manatu ai ua leai se aoga o mea faaletino o tatou fa’aaogaina i aso uma o le ola. Leai, e tele foi lo latou tāua, na pau le itu o faamamafa mai e le mataupu, “O le popole” ‘Aua le popole i mea faale-tino ia, e pei o meai, vai, lavalava, ma isi ae faamautū muamua le ola. O le uiga o le

faamautū muamua o le ola, o le faamuamua pea o le Atua i mea uma, ina nei popole i mea ia o le tino, ma galo ai le Alii.

O loo faatonu mai e Iesu, ‘aua le popole i mea na, ona o le popole, e ono aafia ai le soifua maloloina. O le popole foi na te faaleaga le mafaufau mata’ala, na te faaititia lou ola talitonu ma le faatuatua i le Atua. E lepeti foi e le popole le mafaufau fetalai, ma matafiese ai le lagona toamalie o le loto, na te osofia le tagata e galue, e aunoa ma se atuatuva o lona loto i se mea, ona o loo talitonu i le alofa foi mai o le Atua.

Afai e sili ona tāua le ola i lō le mea e ai, o le ola foi e ave iai le faamuamua, po o le tino foi e taua atu nai lo le ofu, e faapena lava ona faamuamua le mea sili lona taua. O loo silafia lava e le Atua le aogā o ia mea uma i le tagata, ae ‘aua nei fāoa e mea ia le tulaga o le Atua. Le na ia foi mai ia mea uma. “Ia outou muai saili i le Alii ma lana amiotonu, ona faaopoopoina atu ai lea ia te outou o ia mea uma.

“O le popole i le aso taeao, o se mea valea ma sēsē tele, ae o le tapenapena mo taeao, o le mea sili lea ona tatau ma lelei. O le popole i le aso taeao, e le iloa pe aulia, o se mea sēsē tele. A’e o le aso lava ia, e tatau ona fai lelei, ma fa’aaoga tatau mea ua foi mai e le Atua; ae ‘aua le popole taeao, auā e te le mafai ona oo taeao, e aunoa ma lou ui atu i le aso. E lē mafai foi ona oo mai taeao, ae lei oo muamua mai le aso.

O le aotelega la o le mafaufauga o la tatou mataupu. Faamuamua lava le Atua i lou loto talitonu, o le Atua na te mamamu lou loto i lona finagalo, ona sologa lelei lea ma toamalie mea uma o le ola, i lona fesoasoani mai. E tatau ai lava i le tagata, ona filifili ma le mataala, ina ia le muamua lava se mea o lenei ola i le Atua. Auā o le matagofie ma le matalasi o le lalolagi ma mea o tumu ai, ua mafai lava e se tasi o ia mea, ona ia faoa le mafaufau ma avea ma mea e popole iai le loto o le tagata, ma sēsē ai loa lana faamamafa ma lana faamuamua.

Tupulaga o teine ma tama, o le faamanatu taua lea mo taua. ‘Aua nei faasili le matagofie o le lalolagi ia tatou, nei avea ma mea e alu i ai, ma popole iai le loto, ae galo le Atua. O Iesu, na te lei faamuamua i lona finagalo se isi lava mea, ao lona anaana ma lona ususitai i lona Tamā, na ave iai lana faamuamua. Na iu i le matuā faaeaina e le Atua; (Filipi 2: 9), o lona Toetu manumalō mai lava lea i lona mamalu, ma avea ai Iesu Keriso ma sili i mea uma lava.

GALUEGA FAATINO:

Fa’aaliga o mafauauga:

- (1) Faamatala ma ta’u mai se faataitaiga o le leaga o lea mea o le popole, e pei ona vaoia mai e Iesu.
- (2) O le a sou silafia; O le a le uiga o le fuaitau faaii oi le f.34 – “E tatau i le aso lona lava leaga”
 - O tali o fesili o i luga, o le a fesoasoani i ai lau susuga le faiaoga)

PESE: 234 (Pe a ita tele mai..)

A’OA’OGA:

1. ‘Aua le popole
 2. Faamuamua le Atua i mea uma
 3. Loto tetele, faitalia le Atua.
-

MANATU TAIALA MATI & APERILA: IA LOTO TETELE I LE GALULEGA

O se tasi lea o lagona sili ona taua, mo soo se tagata galue, e oo lava foi i fanau i lo latou ola a’oa’oina. O le faamamafa o le mafauauga, o le loto tetele e fai mea lelei, ae lē o le malosi alu vale i mea le aogā. E i ai le talitonuga, o le loto tetele mo mea sili, o loo afifi ai ma le fai mea tonu, ma le lē fefefe e tautala ma fai le mea sa’o’ auā o ala o le taumafai, e iu manuia ai soo se faamoemoe.

ASO SA: 3 MATI 2019

MATAUPU: AUA LE FEFE E TA’U LE MEA SA’O

SINI: Ia a’oa’o tamaiti ia latou iloa, le taua o le loto tetele e tautatala i le mea sa’o; ona o nei aso, ua taomia lava lenēi mataupu silisili taua e le tele o malosi eseese faale-lalolagi.

TUSI FAITAU: 2 Samuelu 12: 1 – 14

FESOASOANI MO FAIAOGA:

E iai le talitonuga, e le fou iā outou susuga lenēi tala. O se tala e tāua ma tele ni feau aogā o aumai ai mo tatou uma lava, ao tatou iai i le savaliga o le soifuaaga o fai nei. O le tautala i le mea sa’o, o le mea aupito sili lea ona lelei ma tonu i luma o le Atua; E ui o le tasi lea o tu po o se aganuu faale-Atua, ua lamatia ai foi le ola o i latou o fiafia i lea uiga lelei, ae maise i tulaga mauualuluga e pei o le tala sa faitau nei, taimi e tauvaea ma ōpūina ai le taitaiga, ona o ni agasala matuiā i luma o le Atua. Ae o le itu e

sili ona matagofie, e pei ona fai ma mafaufauga autū o le mataupu i lenei Aso Sa, “O le lototele lea ma le faatuatua i le Atua, na le fefe ai Natano e ta’u i le tupu o Tavita lea mea sa’o; “O Ia lava (Tavita), le tagata mauoa, o faatautu i ai le tala.”

O le manao o le tupu o Tavita i le avā e toatasi a Uria le sa Heti, o Patisepa le igoa o le fafine. O le manaoga lea, o le lagona tuinanau o le tupu, na ia faufau ai le mea leaga ina ia oti ai Uria, ae fai mo ia lana avā. (2 Samuelu 11: 4, 14ff). Na taunuu lava lea fuafuaga leaga ma le lē alofa a le tupu; ae sa galo iā ia, e leai se mea e lilo i le Atua. Ua silafia e le Atua lenei mea leaga tele, ma o se agasala matuia i ona luma; na finagalo ai le Atua e faailoa iā Tavita lona sēsē, ina seia iloa po o le a sona lagona ae poo le a foi se laasaga o le a oo iai lana taitaiga. O le ala la lona o le auina o Natano le auauna a le Atua ia Tavita. Ae sa faamatala iai e Natano i se ala faa-faataoto (f.1 – 4) le mea na tupu.

Sa matuā ita le tupu i lea tagata mauoa o taua atu e Natano i le faataoto; fai mai le tupu – “E oti lava le tagata ua na faia lea mea, ae toe tau ai i mamoe e fa lana mamoe.” Ua tei Tavita le tupu i le fai atu o Natano; “O oe lava le tagata” (f.7). E lei fefe lava Natano e ta’u sa’o ia Tavita, o ia le tupu, ua na faia lea mea leaga. O le f 13 – 14, o loo tautino ai e Tavita i le Atua i luma o Natano le auauna a le Atua, fai mai – “Ua ou agasala lava i le Alii.” O lenei foi tautinoga a le tupu, e le na o ni upu na faalele, ae o silafia e le Atua lona loto mafatia, ma le salamō moni. Lea lava ua toe tautino atu e le auauna a le Atua ia Tavita. “Ua aveeseina lau agasala e le Alii, e te le oti ai.” vagana lenei, e oti lava le tama ua fanau mai ia te oe, ona ua e faatupu le inoino o e ita i le Alii, i lenei mea ua e faia.

Tupulaga, o loo silasila le Atua, na te silafia mea uma. O le ala lona e taua ai, lo tatou tautatala e tau le mea sa’o ma amiotonu. ‘Aua nei e nānāina se mea sa’o, ona ua faapele oe e nisi i ni tupe, poo nisi manuia ua folafola atu ia oe, pe a e le tautala. Auā a ē nānā le mea sa’o ona ua faatosinaina oe i nisi faamanuiaga, po o

le tau faamata’u foi. Ia e iloa, e le gata e le o lilo i le Atua mea uma, ae ua sili foi ona e leaga, nai lo le sa faia le sēsē. Taulai le vaai i lo tatou Alii o Iesu, e leai se pepelo na Ia faia, tainane faamata’u mai le oti ma le faasauaina. Lea lava na maliu ai, ona e moni lona alofa, mo le lalolagi ia ola ia te Ia, ae le ia oti. Amene.

Uiga o Upu ma Fuaitau:

- (i) faalemigao (f 10) - o le lē ava/o le faia lava lea o le agasala i luma o le Atua.
- (ii) mumū o lona la (f 11)- susulu o le la/E mafai ona faapea, o le tu sa’o o le la, e aunoa ma se ao e punitia ai.

GALUEGA FAATINO:

1. Taumafai e faatino le tala, i sina vaaiga pu’upu’u, ina ia saga malamalama atili ai.
2. E mafai foi ona saunia e lau susuga i le faiaoga, ni nai fesili tou te fetufaai ai ma tamaiti, ina ia manino atili ai le mataupu.

PESE: 165 (Fetalai mai le Alii e)

A’OA’OGA:

1. Ia loto tele e tautala i le sa’o
2. ‘Aua nei punitia le mea moni i le fefe po o se tau
3. Alo ese i le fasioti tagata talu le tuinanau.

.....

ASO SA: 10 MATI 2019

MATAUPU: FIAFIA E A’OA’OINA MAI ISI

SINI: A’oa’o tamaiti ia latou iloa le t̄aua o le poto ma le atamai,, e a’oa’oina mai le fefaasoaai ma isi tagata, e ala i le faalogo ma le m̄atau ma talia.

TUSI FAITAU: Faataoto3: 18 – 25

FESOASOANI MO FAIAOGA:

O upu amata lava o le Faataoto sa faitauina, o loo atagia mai ai le poto, o fofoa mai i le fefaasoaiga a le tam̄a ma le atalii. Ia po o le atamai foi na a’oa’oina mai e le atalii, e ala i le faalogo ma talia apoapoiga a le tam̄a. O le ala lava lea o le va nonofo o le Atua ma le tagata; o le tagata atamai e ala i lona tausia o poloaiga a le Atua. O loo vaolia mai foi iinei le ola tutoatasi ma le faalagolago o le tagata iā ia lava, ae sili ona lelei le fesili ma faamoemoe i le Atua.

O le f.13 – “Amuia le tagata na te maua le poto, ma le tagata na te maua le mafaufau.” O le poto po o le mafaufau (wisdom), e ese mai le iloa (knowledge). O le iloa, o le silafia lea o mea moni sa a’oa’oina ai, ae o le poto ma le mafaufau o le fa’aaogaina tatau lea o mea moni i le ola. E mafai ona ia te i tatou se iloa telē ma le maoa’e, ae a aunoa ma le poto, e leai se aogā o lo tatou iloa. O le ala lena; E matuā tatau ai lava ona a’oa’oina tatou pe faapefea ona tatou olaina mea ua iā te i tatou.” O le poto tonu lea o loo manatu le tusitala, o le poto faale-Atua. O le poto faimai le Faataoto; “E sili ona lelei o lona faatau, i lo le faatau o le ario. O le uiga tonu lea o la tatou mataupu o le taeao nei. O le ave ma

tagata poto, e ala i le faasoa ma fetufaai ma isi o iina e a’oa’oina mai ai.

E eseese tagata i lagona ma uiga. O isi e matamumuli. O isi tagata e le masani i le mea o tumutumu ai tagata, vagana tagata e tutusa o latou lagona. E iai foi tagata e manatu lava latou, o latou o tagata vaivai ma faatauvaa. Ao lagona ia e faigata ai ona fesootai faatasi ma isi, ma le mafai ai ona fefaasoaai ma a’oa’oina mai isi. E le tatau i tagata lea vaivaiga, auā a faapenā, o lo latou tuu lava lenā o i tatou i le faiaina. Manatua, afai e te le latalata i le fua, e le mafai foi ona e iloa fua lou ola agai i luma, ua i ai o le a e le iloa foi se maualuga ua iai lou atamai. A e le latalata i le Atua e le faigofie foi ona e lagona ma iloa lona finagalo mo oe. O tagata faamanuiaina, e a’oa’oina foi latou i lo latou tutupu a’e ma fefaasoaai ma isi, e pei ona tatau i tagata uma. Aua nei e pei o se tagata o iloaina se mea, ae e te le o iloa. Auā e le sēsē le laititi o le iloa, ae sesē le lē manao e poto ma atamai. O lona uiga, e le leaga le laititi o lou iloa o le Atua, ae leaga lou le fia iloa o le Atua.

O le vaega t̄aua lava lea mo lou ola, o lou taumafai e kolosi le laina ma fesootai ma isi tagata. O faiā na, latou te fausia se avanoa lelei mo oe, e ala i le faalogo ma a’oa’oina mai isi. Na a’oa’oina mai e Iosua metotia tau le taitaiga-lelei, mai le toaina o Mose. Na a’oa’oina foi Ruta i le itu tau le vā fesootai lelei, mai le faalogo iā Naomi. Avea foi lenei fuaitau t̄aua mai le Tusi Paia, tama ma teine, e fai ma taitaitama aogā tatou te saga iloa tino ai le Atua.

O Iesu Keriso foi, o lona soifua usiusitai, faalogo ma talia ma le loto maualalo mea uma na finagalo ai lona Tamā. Na taunuu i le satauro ma le maliu. Peitai, o lona Toetu mai manumalo mai le oti, o le atoaga lena ma le fa’aaliga o le poto ma le alofa o le Atua mo le lalolagi.

GALUEGA FAATINO:

- (i) Faamatala mai se mea na tupu i lou olaga, na e iloa ai le taua o le a'oa'oina mai isi tagata, ma e maua ai le potu ma le mafauafau.
- (ii) Fai e lau susuga ni nai fesili e fetufaai ai ma le vasega.

PESE: "O le potu e tāua, i le olaga o le tagata"

A'OA'OGA:

- 1. O le potu, o le Atua lava lea.
- 2. O le olaga mama ma tonu, o le potu lena
- 3. Fiafia e a'oa'oina mai isi.

.....

ASO SA: 17 MATI 2019

MATAUPU: E NANAMU MA MATAGOFIE LE FAI MEA SILI

SINI: A'oa'o tamaiti ia latou iloa, so'o se mea lelei tatou te faia ma le lotu atoa mo le Alii o Iesu, e ala i isi tagata; o le a sasala mai pea lona matagofie i aso uma.

TUSI FAITAU: Mareko 14: 1 - 9

FESOASOANI MO FAIAOGA:

Ua tatou masani lelei i le tala sa faitau nei, o se tala o fa'aalia ai le ese mamao o le mea oi le finagalo o Iesu, ma le mea oi le mafauafau o le tagata. O le f.8 o iai upu ia; "Ua faia e ia le mea ua ia mafai ai." O i tonu o loo tuuina atu ai e Iesu i lea tinā, se tasi o

ana faamalō aupito sili ona maualuga, ona o le mea ua faia; le suāu'u manogi sa ia liligi i le ao o Iesu. O le mea lava ua mafai e le fafine i lona lotu atoatoa ona fai. O le u'u-nato e faapea o se u'u manogi manaia ma sasala umi lona manogi. E mauagatā, e sailigatā, e taugatā foi; o le faailoga lena o le tāua tele o le suāu'u, ma o le ala foi lena o le manumanu ma tele iai tala faasea a tagata. Ae mo le Alii lava ia o Iesu, o le gaoioiga ua fai nei e lea fafine, o se mea aupito sili ona tāua ma lelei, ona o le mea mai lona lotu malie. O le ita ma le inoino o tagata, ua le gata i lo latou manumanu, ae ua manatu foi e maua ai se tupe tele pe ana ave e faatau, e tufa ma e o matitiva. Peitai, o la Iesu fai mai; "Tu'u pea ia o ia, 'aua tou te faalavelave, auā o le mea sili ona lelei ua ia faia mo au." Ua fetalai atu foi Iesu; "Tou te mau lava ma ē matitiva i aso uma a outou lotu lava iai, tou te mafaia lava ona ave iai nisi mea tou te maua; A'o a'u, tatou te lē nonofo pea ma outou, a'o le mea ua faia e le fafine lenei, o le faataimuaga lea o lo'u tanuga."

Manatua o lea ua uma ona ta'u atu e Iesu, le gasologa o lana feau o gasolo nei. E tualuga i le taulaga faaola, o aofia ai lona maliu ma lona toetu manumalo mai le oti. A o le nanamu lelei o lenei u'u, ua ātaāta mai ai le matagofie ma le sasala, o le faaolataga o mulimuli mai e faia e Iesu. Tupulaga o tama ma teine, o a mea sili ma tāua iā outou, 'aua tou te lima mau pe afai o se mea e tatau ma lelei mo le Alii, ma ia e faia foi ma le lotu fiafia. 'Aua foi le popole fua i le faaseā o tagata, auā o le mea lelei e te faia ma le lotu i le Alii, e masani le lalolagi ona ita i ai. Sa tauemua foi Iesu, ae na ia alu lava i le satauro, sei taunuu le Faaolataga na Ia afio mai e faataunuu e ala i lona maliu ma lona toe soifua manumalo; lea ua manogi matagofie ai lo tatou ola, i le mea sili na faia e le Alii.

Uiga o Upu ma Fuaitau:

- i) faanunununu (f.2) - vevesi
- ii) fagu alapasa (f 3) - o le fagu matagofie toe taugata e vaneina pe ta mai le laau
- iii) u'u nato (f 3) - o le u'u manogi taugatā

GALUEGA FAATINO:

Taliga Fesili (Fa'aaogaina lau Tusi Paia)

- i) O le a le aso tonu lea e tupu ai le mea o faamatalaina mai le tala?
Tali: O le aso o le paseka ma areto e le faafefeteina.
- ii) O le fale o ai lea e fai ai le tausamiga, lea e tupu ai le mea o taua i le tala?
Tali: O le fale o Simona le lepela
- iii) E iai nisi na tigā o latou loto ia Iesu pe leai?
Tali: E leai nisi na tigā ia Iesu, ae na tigā i le fafine!
- iv) O loo tau mai i le tala, na tata'e e le fafine le fagu-alapasa, ma masa'a uma atu le suāu'u ma māumāu. O lona uiga la, E sa'o lava le muimui a tagata a?
Tali: E leai! E sese le muimui, e pule lava le fafine ia i lana fagu u'u. Auā o le tatae o le fagu, o le faailoga o le ave uma mo le Alii; 'aia nei totoe se mea.
- v) E faapefea ona manatua e tagata, lea mea lelei na faia e le fafine?
Tali: So o se mea e ave iai le tala i le mea na tupu, e ave atu ai ma le igoa o lenei tinā, ma manatua ai pea foi le mea sa ia fai.

PESE: 368 (Fai mea tonu, o mea lelei ...)

A'OA'OGA:

1. Fai se mea sili mo le Alii
2. 'Aua le aiū i le Atua
3. E manogi lelei le alofa faamaoni.

* (Mo le faiaoga) O loo taua i le Ioane 11: 2 (ff), o Maria le tuagane o Lasalo, a'o le uso o Mareta o ia lea na ia liligi le u'u. Peitai, ua ou le taua i le mataupu nei lavelave tele. Ao uō nei a Iesu, o lo latou aiga e i le nuu o Petania, o loo taoto i le tafa i Sasae o le mauga o Olive, ao le itu i Sisifo le aai o Ierusalemā. Sa iai uma foi i latou nei ma Iesu, i le taumafataga o ta'ua sa faia i le fale o Simona le lepela i Petania.

.....

ASO SA: 24 MATI 2019

MATAUPU: FEFAASOAA'I I MAFATIAGA MA TATALO MO SE MALOLOGA

SINI: A'oa'o tamaiti ia latou iloa le taua o le faasoa atu i isi o mafatiaga, ina ia latou tatalo mo se faamaloloina.

TUSI FAITAU: Iakopo 5: 13 – 18

FESOASOANI MO FAIAOGA:

Fai mai le Aposetolo o Iakopo, “O le mea lea ia outou fetautauai ai a outou agasala, ma tatalo le tasi mo le tasi, ina ia faamaloloina outou.” O le tāua lena o le fai o le agasala po o le sese, ona ‘aua lea le nanaina, a’e lototele e ta’u; auā o le feta’uta’uai o agasala, ma tau fai tatalo mo se lelei, o le a le pine ona maua se mapusaga. Afai e faitau tausaga o e nanaina sou faafitauli, faamata e le i’u ina tugā tele, ma tele sona faaletonu o le a oo i ai? Afai o faapena, o le auala taua e maua ai sou mapusaga, o le taumafai lea e fesootai ma se isi tagata, faasoa ma ta’u iai le mea o mamafa ia te oe, ma taumafai ai loa mo se ala e faasaoloto mai ai oe mai lena mafatiaga. O le a i ou tafatafa i taimi uma, na te faamaonia faatasi ma oe lou faafitauli; ma na iloaina foi, pe faapefea ona faatumauina lou fiafia ma lou mautinoa. O le a ia tatalo foi ma le loto faamaoni, ma tuuina atu i le Alii ou mafatiaga. I le taimi lava lea e tasi, o loo faapena foi le isi tagata mo ia. O lona uiga, e matua tatau lava lo tatou fefaasoa’i i mea mamafa o tatou mafatia ai, ina ia le avea ia mea ma mea mamafa ia tatou. O le soifua galulue faatasi lava lea, seia iai ni suiga aoga ma taua i le taimi mulimuli.

Aisea e tatau ai ona iai se isi e faasoa iai ou mafatiaga po’o a’u foi? Ona o tatou ua na o ni tagata mama’i, ona o mea sēsē o tatou natia. Ao Iesu na fetalai; “Afai o loto malilie se toalua i le lalolagi, i se mea e ole mai ai, o le a faia lava mo outou e lo’u Tamā.” (Mt 18: 19 – 20)

O le itu taua lava o ave iai le faamamafa o le tusi sa tatou faitauina; “O le tatalo.” O le tāua ma le aoga o le tatalo, e le fuaina i upu, po’o le manaoga foi; ae o le loto faamaoni, o silasila mai iai le Atua. O le loto e augani ma tatalo atu i le Atua ma le loto faatuatua, e tali mai le Atua.

Tupulaga o tama ma teine, o le upu moni e leai se tagata e atoatoa i luma o le Atua, o lona uiga e tofua le tagata ma lona sēsē;

Ae le avea foi le mautinoa lea o lo tatou le atoatoa, e fai ma ala e fai ai le sēsē, ae faalagolago i le natura vaivai lea o le tagata. O le itu o faataua mai, o le iloa e le tagata o lona sese, ona ‘aua lea na te nānāina, ae faailoa. O le auala lena o le a maua ai se fesoasoani mo ia, e le gata o le faamafanafana mai isi, ae o le a latou tatalo foi mo ia. O tatou foi, ia tatou iloa ona alolofa moni ma tatalo mo isi, auā tatou te le atoatoa foi tatou. O Iesu, e faamagalo atu; e tatalo mo isi. Sa masoe foi i le satauro ina ia tatou ola, e ui e leai sana agasala. O le fetautauai ma le fetataloa’i e taunuu i se isi laasaga sili o le ola.

GALUEGA FAATINO:

Taliga Fesili:

1. O le fea tonu le itu e te iloa, e mafai ai ona tali mai le Atua i lau tatalo; Ona o oe o le tagata amiotonu, pe ona o oe o le tagata e tatalo faatauanau?
Tali: Ona o oe o le tagata amiotonu.
2. O ai le tagata o taua i la tatou tusi faitau, na tali mai le Atua i lana tatalo.
Tali: O Elia.
3. A e ta’u lau agasala i le isi tagata, ona tatalo lea o lena tagata mo oe, o le a se lagona e tatau ona e lagonaina, e o faatasi ma le tatalo, ina ia maua sou filemu?
Tali: O le lagona o le salamō ma le faatauvaa faamaoni.
4. O fea o mea ia e lua, e te manatu e finagalo ai le Alii mo tatou?

- (a) A sese, ia iloa ona salamō. A salamō, ona faamagaloina lea, ua toe lelei ma le Atua. O lona uiga, e lē afaina pe a toe sese foi, aua o loo iai lava le salamō e tafieseai ai agasala.
- (e) A sēsē, ia iloa ona salamō. A salamō, ona faamagaloina lea, ua toe lelei ma le Atua. O lona uiga, ua tataua ona taumafai e ‘aua le toe sese.

Tali: (e)

PESE: 122 (Pese & Viiga)
 “O outou e fia sao, i le ola i luga”

A’OA’OGA:

1. Fiafia e tatalo ma le lotu faamaoni.
2. ‘Aua le nānāina ou sēsē
3. O le faailoa ma tatalo, e foia ai mafatiaga.

.....

ASO SA: 31 MATI 2019

MATAUPU: E FAAPEFEA ONA OLA I LE EKALEZIA

SINI: A’oa’o tamaiti ina ia latou iloa lelei, le amio e tataua ma le lotu, o le tagata o le Ekalesia.

TUSI FAITAU: 1 Timoteo 3: 8 – 16

FESOASOANI MO FAIAOGA:

O le tusi lenei a le Aposetolo o Paulo, e ave i le alii faifeau o Timoteo ma lana Ekalesia i Efeso; ma tagata uma e talitonu i le Alii o Iesu Keriso. O le tusi, o le tusi apoapoai, o le faamalosiua foi, e mafai foi ona faapea; o le taiala mo le olaga i totonu o le Ekalesia. E le’o vaega uma o le Ekalesia o faasino i ai le vaega tonu o le tusi sa faitauina, ae o faasino faapitoa i tiakono, i le itufale o alii ma tamaitai. E ui a la ina e leo vaega uma, ae o le tasi lenei vaega, (tiakono) e sili ona faamoemoe i ai le malosia ma le ola o le lotu. Ua fia faatāuaina apoapoai o iai mo tagata uma, auā o tagata uma i se Ekalesia, o tagata auauna ma galulue. O le tiakono, o lona uiga, “O le e auaua.” E faalani e la tatou Ekalesia, o le poutu toa” o le galuega. E galulue i mea uma lava, o lona uiga, e fai a latou matafale e auaua ai i le Ekalesia. O le galuega e aofia ai le itu faale-tino, ma le itu faale-Agaga foi. O loo apoapoai mai le Aposetolo, o le tiakono e le tataua ona faagutugutulua. O lona uiga; o le tautala sao i mea tonu i tagata uma lava. Ia tutusa tagata uma i lana tala.

E le fia inu uaina tele. O iai lava tusi o le Tusi Paia, o taua ai le tataua o le uaina, ae maise e fesoasoani i se ua lotu tiga; le lotu ua na tauave le mamafatu, po o se malosia foi mo le tino ma’i ma vaivai. Ae le o le fai mai sinamea, ae fai ai le saolotoga o le tagata. “E le manumanu i oloa” – E lē o le soona fai ma le soona fa’aalu; ae o le ‘aua le aiū ma limamau. O le faatoeaina, o le faatagata matua i le tofa fa’aali, e manuia ma maopopo ai le Ekalesia. O le galuega faa-tiakono e foliga na amata mai e le au-Aposetolo mai le Ekalesia i Ierusalem (Galuega 6: 1 – 6); o le tausia lea o manaoga moomia faale-tino o le Ekalesia. A o le tele o Ekalesia i nei aso, ua tau leai se taua ma se aogā o le tofi, ma ua tau leai foi se mamalu. Fai mai Paulo, o tiakono, e tataua ona matuā tofia ma le faaeteete.

O tamaitai o tāua, e mafai ona faasino i tiakono tinā; poo taitoalua o tiakono, poo taitai tinā foi o le Ekalesia, e pei o Fipe, o le tiakono tinā o taua i le Roma 16: 1 O tinā foi e pei ona fai mai le Aposetolo; “E le tatau ona tauleagaina, aemaise i a latou amio e taua tele. E manaomia lo latou sa’o atoatoa.

O loo aumai e Paulo lenei fuafuaga, na fa’aali ane e le Agaga ia te ia, ua pasi mai ia Timoteo e ala i le Tusi Paia, na pasi atu lea i isi, ua oo mai lava ia te i tatou. Manatu foi Paulo, o le tusi lenei, e a’oa’o ai tagata talitonu uma lava, pe faapefea ona latou taitaia ma pulea i latou lava.

Tupulaga o teine ma tama, e ui lava e faasino le apoapoaiga i tiakono ma tinā, a’o taijala lava e tatau ma aoga mo tagata uma e pei foi o tatou, ē o aofia i totonu o le Ekalesia. O Iesu Keriso o le Ao o le Ekalesia, o Ia o le tamai mamoe a le Atua, e leai sona ila, po’o sona pona. Sa ia te ia le tofā faatoeaina; E leai se manumanu sa ia te Ia, auā na Ia foai mai atoa o Ia lava, e osi le Taulaga faaola mo le lalolagi.

GALUEGA FAATINO:

Tusi sau tusi apoapoai i lou uso, poo lou tuagane, o loo faigaluega i le Faletupe. O ia o le pule o le lala o le Faletupe i Savaii, ao oe o loo e nofo i Upolu.

(Ia atagia i lau tusi, ni fautuaga lelei mo le manuia o lou tausoga ma le galuega, ae ia fiafia foi tagata i lana auaunaga)

PESE : 154 (Lou lava Alii e, o oe lou Matai)

A’OA’OGA:

1. Faatoeaina ona fai o le faiva.
2. O Iesu le Ao o le Ekalesia.
3. Ia moni ona avea ma tiakono.

.....

ASO SA: 7 APERILA 2019

MATAUPU: TAUMAFAI IA LAVA LE ONOSAI

SINI: Ia a’oa’o tamaiti ia latou iloa, le taua o le lava o le o le onosa’i i lo tatou ola faa-le-faatuatua, e ui e lē o se mea e faigofie.

TUSI FAITAU: 1 Tesalonia 5: 12 – 22

FESOASOANI MO FAIAOGA:

O lo’o fa’aauau pea apoapoaiga a le Aposetolo i le vaega lenei o le tusi, e le gata mo taitai o le Ekalesia i Tesalonia, a’o tagata lotu foi. O le vaega tonu lava sa faitauina, o lo’o faamamafa ai e le Aposetolo le onosai, o se auupega e sili ona aogā ma tatau mo le maopoopoga o le galuega. Fai mai Paulo i le f 14, i lona vaega mulimuli lava. “..... ia outou onosai i tagata uma lava.” “O ē o galulue ia te outou ma tausia outou i le Alii.” O loo faasino i toeaia ma tiakono i le Ekalesia. O i latou ia o apoapoai atu le Aposetolo i tagata lautele, ina ia latou manatua pea i latou ma le alofa, ona o la latou galuega mo i latou. E faapefea ona e fa’aali atu ia i latou le mea aupito sili, ma faatumau lo latou tulaga mamalu? Faailoa atu lou fiafia i la latou galuega o fai; tau iai, ua tele le aogā mo oe o la latou a’oa’oga ma taitaiga, ma faafetai i la latou galuega, ma ia atagia mai foi i lou soifua. O lou soifua gaua’i i la latou galuega, o le faailoga manino lena o lo outou alofa ia i latou. O lou soifua gaua’i, o aofia ai lou lagona onosai ma le faatuatua i le Atua.

Ae mo a’oa’o ma toeaia, i latou o avea ma taitai o le Ekalesia, o loo apoapoai mai foi le Aposetolo, “Ia onosai i tagata uma lava.” Onosai e fai le faiva o le apoapoai i so’o se tagata o amio faatalanoa. So’o se faapotopotoga lava o tagata, e pei foi o se

aulotu poo le Ekalesia, e le tutusa uma tagata o iai. O aofia ai tagata paie ma lē fiafia e galulue. Ia onosai e lapatai pea ma faa foefoe lemu, ina ia le maumau i latou. E iai foi tagata vaivai e le malolosi, e le gata i le tino a o le mafaufau foi; e foliga e le o mautinoa le faamoemoe o iā Keriso Iesu. E taua le onosai ma faamalolosi pea, e fai le galuega fesoasoani, ma faamafanafana pea mo i latou. E tele ituaiga tagata i le Ekalesia, e eseese foi o latou lagona, e mafua ai ona aliali mai ia uiga ma ia tulaga eseese ia latou. O le fofu aupito sili lava la mo oe le taitai – o lou silafia lea o le tulaga o iai lea tagata ma lea tagata, ona ofo atu lea iai le fofu tonu ma tatau mo ia. Auā e le mafai ona aogā lau fesoasoani, pe afai e te lē o iloa le faafitauli. Ia fetausia’i i le filemu, ae ‘aua le fetai a’i atu i le leaga. Ia maua le loto olioli moni, ma ia fiafia e tatalo, ma lagona le loto faafetai i le Atua, ina ua fua mai i le manuia le galuega. ‘Aua foi nei lafoaia le malosi o le Agaga o le Alii, o le fesoasoani tele i le galuega faigatā. E tāua foi le tofotofu i mea uma, e mausali ai le iloa o le mea tatau, ae ‘aua le ta’u faatauvaaina i latou e lē o talitonu i le mea o talitonuina e outou.

Tupulaga o tama ma teine, o le onosaia o tagata uma, o le onosai lava lea o amioga ma uiga eseese uma o tagata. E le o se mea faigofie, tatou te lē mafaia na o i tatou, e aunoa ma le fesoasoani a le Agaga Paia. O le mea lea, ia tatou faamoemoe i le fesoasoani mai o le Agaga, e maua ai lo tatou malosi ma tupu ai lo tatou onosai, ina ia aveia i tatou ma ē o faatupu le maopoopoga i totonu o le Ekalesia. O Keriso foi, na ia onosaia tiga uma o agasala a le lalolagi, e ala i le satauro ma le tuugamau, ae na toe soifua manumalo ina ia ola tagata uma i le faatuatua.

Uiga o Upu ma Fuaitau:

i) amio faatalanoa (f.14): o tagata e le manatu mamafa i se mea, ma

ii) ta’u faatauva (f.20): nofonofu ai lava e le galulue (paie) manatu mama, (‘aua le mama iai le manatu talasua)

GALUEGA FAATINO: Taliga Fesili

1. O le au uso o tautala iai Paulo i le fuaiupu 12, o ai o faasino iai?
Tali: O tagata lotu o le Ekalesia i Tesalonia
2. O le au uso o tautala iai Paulo i le fuaiupu 14, o ai o faasino iai?
Tali: O e o fai ma taitai o le Ekalesia po o le Aulotu.
3. O ai tagata tonu e agai i ai le galuega a taitai, ina ia mausali ma lelei le galuega?
Tali: O tagata uma! (f.14). “Ia outou onosai i tagata uma lava.”
4. O le a le upu e tasi e ta’u ai le vavao a Paulo o ta’u atu i le f 15? ‘Aua le a?
Tali: ‘Aua le tau ma sui (tauimasui)
5. Fai mai Paulo i le faaiuga o le tusi faitau, e taua tele le tofotofu o mea uma, ina ia a?
Tali: Ina ia e iloa le leaga ma lafoa’i, a’e iloa le lelei ma taofimau.

PESE: 168 “O mai a faamalosi ...”

A’OA’OGA:

1. Onosai i mea tiga ai

2. Amanaia tagata uma
3. Ia toafilemu le loto.

.....

ASO SA: 14 APERILA 2019 (LAUPAMA)

MATAUPU: ALU I LE ATUA I LE TATALO

SINI: Ia a’oa’o tamaiti ia latou iloa lelei, le malosi ma le mana o le tatalo e fai i le Atua i le loto faatuatua, ma le talitonu atoatoa, e pei ona faia e Iesu.

TUSI FAITAU: Mareko 6: 45 – 52

FESOASOANI MO FAIAOGA:

O le Aso Sa lenei o le laupama, o faamanatu ai le malaga faatupu a Iesu i Ierusalem. O le tauluga o lea malaga, o lona maliu ma lona toetu soifua manumalo mai le oti. O puapuaga sa lavatia e le Alii tatali, ona o le malosi o le tatalo, le fesootaiga le motusia ma le Atua lona Tamā.

A o le’i afio atu Iesu ma savali i luga o le sami e tusa o le tala, sa muai afio ae i le mauga le afioaga o lona Tamā, ina ia na o Ia lava ma lona Tamā, e ala i le tatalo. Sa ia tu’ua le motu o tagata, ma le lasi o o latou manao; sa ia unai atu foi i ona so’o i le va’a, e folau atu i le tasi itu o le vai i le afiafi, ae tatalo seia oo ina po. Ona toe foi ifo lea i lalo, i le malosi faafouina o le Agaga o le Atua, ma ia vaoia le matautia o le matagi. Fai mai le tusi o Galuega 3: 1. “Ua o a’e faatasi Peteru ma Ioane i le malumalu i le itula e fai ai le tatalo.” O lona uiga, e le faatali sei e lagona ua e fia tatalo, ae so o se taimi ma so o se itula talafeagai; Aua o le

tatalo, o se vaega o le olaga tataau ma pulea lelei o le tagata. Ma o le toaga e tatalo, o le saga faaosofia pea lena o oe e fesootai pea e le aunoa i le Atua i le tatalo, ma saga maua ai pea faamanuiaga o le mautinoa ma le talitonu i le Atua. Peitai, ia muai fuli atu lou tua i le tumutumu ma le gaosa o le lalolagi. Sa silafia ma mafai e Iesu ona alu ese mai manaoga ia o le ola, ae tau lava o le Atua lona Tamā, lea sa ia mafai ai foi ona ia vaoia le afa sana faamata’u lona au so’o. O le mea lea, alu i le Atua i le tatalo. O le Atua o le nofoaga o le mausali i le lalolagi le mautinoa. O le nofoaga e manino ai le vaai, ma e leai se ponatia o le ola e maua ai. O le Atua foi e maua ai manatu. Manatua, e iai pea ituaso faigata o lo tatou ola, ae tatou te iloa le alofa tunoa o le Atua mo tatou, pe a tatou mafuta atu e le aunoa i le tatalo. O le vaivaiga tupito lea o le au so’o o Iesu, o atagia mai i le tala, ina ua afatia i le vasa i le po. Ua lē tatalo ma fesootai atu i le Atua, ae ua manumalo le palaai, ma manatu ai o Iesu o le aitu.

Tupulaga o tama ma teine talavou, e le asa lo tatou ola taumafai ma mea faigata e fetai. A o le mataupu o lenei Aso Sa, alu i le Atua i le tatalo. Fesootai i le Atua i le mafaufau mama e lē o faalavelaveina e se isi lava mea. E lei aunoa le fesootai atu pea o Iesu i lona Tamā i le tatalo, i itu aso faigata uma o le ola. O iina na maua ai lona malosi ma lona mautinoa, na ia osia ai le Taulaga faaola mo tatou ma le lalolagi uma.

Uiga o Upu ma Fuaitau:

- i) uuna’i (f 45): faamalosi atu ma le loto naunau pulunaunau
- ii) uio (f 49): fe’ei ua fefefe
- iii) atuatuvalet(f 50): fa’atu/lemautonu
- iv) segia o latou mauli: ua faateia ma le ofo tele.

GALUEGA FAATINO:

1. Fai sina faatinoga pu'upu'u o le vaai, poo le tala o lenei taeao.
2. Fai foi ni fesili, ae maise lava i le taua o le tatalo e faia ma le lagona talitonu i le Atua, ina ia saga malamalama ai le vasega.

PESE: 122 (O outou e fia sao, i le ola i luga)

A'OA'OGA:

1. Fiafia e tatalo i le loto talitonu faamaoni.
2. O le tatalo, o le fesootaiga ma le Atua i le loto.
3. E loto vaivai le tagata e le toaga e tatalo.

.....

ASO SA: 21 APERILA 2019 (TOE TU)

MATAUPU: O LE A LE ITUAIGA KERISIANO O E I AI?

SINI: Ia a'oa'o tamaiti ia latou iloa, na o le tagata e talitonu faamaoni ma faatuatua i le Toetu mamalu o Iesu, e ta'ua o le Kerisiano faamaoni.

TUSI FAITAU: Galuega 4: 13 – 22

FESOASOANI MO FAIAOGA:

Faatalofa atu i a outou susuga i faiaoga ma la tatou vasega i lenei taeao, malo le soifua manuia, viia le alofa o le Atua. Ua tatou iloa uma lava le Aso Sa lenei, ma tala a le Tusi Paia, ae maise o molimau a le aufai-Evagelia e uiga i le Toetu Manumalo o Iesu, mai le oti ma le tuugamau. 'Aua nei manatu ua mamao ese la tatou mataupu ma le Agaga o le Aso Sa lenei! Ia manatua, o le Toetu o Iesu, e le o talitonuina e isi tagata o le lalolagi, e pei ona iloa i isi tapuaiga. Taatia isi, ae mo tatou lava la, o le uiga tonu lea o le mataupu o le aso. Sei tuu mai pea i luma le fesili, po'o a tonu ituaiga Kerisiano o tatou iai? Po'o ni Kerisiano talitonu ia Iesu Toetu pe leai foi? Aua o le talitonu, o le tagata faatuatua moni lena e pei o Peteru ma Ioane o taua i le tala.

O le tala malamalama le tala nei, i le mafuaaga na ave ai Peteru ma Ioane i le fono. E mafua lava i le loto talitonu ma le faatuatua o i laua nei ia Iesu, e aunoa lava ma se lagona masalosalo. Ua fiu toeaiina o le nuu ma taitai o le lotu Iutaia e faafefe ma sufi, ina ia soia le toe tautala ma mulimuli i lea igoa o Iesu, ae le mafai lava. Aua e ui o le vavega sa la'ua faia i le tama ma'i sa toe mafai ai ona savali, a'e sa latou iloa lelei lava, sa faatasi i la'ua ma Iesu (f.13) – Na tu'ueseina i laua ma le fono, sei fai se iloilogaga mo so la iuga. Mulimuli ane, ua na ona vavao ma faasa, e 'aua nei toe tautala se isi o laua i lea igoa o Iesu. E ui lava i le matautia ma le saua o ia tagata, sa tautino lava iai e Peteru ma Ioane. “E le mafai lava ona la usiusita'i ia latou, o laua e mulimuli lava ma faalogo i le Atua.” Ua latou saga faamata'u pea ia la'ua ma tutuli ese, ae ua le sauaina, ona o le toatele o tagata sa iai, ua tau fai vivii i le Alii, ua iloga ai lo latou a'u faatasi ma la'ua. Sa matua maofa le toatele ma talitonu, aua o le na fai iai le faamalologa, ua leva ona gasegase, ua fasefulu ma ona tupu ona tausaga. O le upu moni, o le taimi lava e le iloa ai i lo tatou ola, le fiafia loloto ma le loto-atu faamaoni ia Iesu Keriso, o le taimi foi lena

tatou te saili solo ai nisi auala faa-le-lalolagi, e faatulagaese ai tatou mai isi tagata. Ao Iesu lava ia pe a fesilgia, pe se a se upu a le tulafono i nei mea? Pau a lana tali – “Alofa i le Atua ma alofa i tagata” (Mk 12: 29 -31) Fai mai foi Paulo. “Afai ou te tautala i gagana a tagata atoa ma agelu, ae leai sou alofa; o le apa memea taalili ma le sumepalo tagitagi lava a’u.” (1 Korinito 13: 1) O le talitonu faamaoni ia Iesu, e le gata o le talia i le lotu, a’o le au-faatasi ma ia. O le tasi o faailoga sili lava, na iloa ai le au-Aposetolo; o le ta’ua lea o la’ua – “O tagata sa latou faatasi ma Iesu.” (f.13)

Tupulaga o tama ma teine talavou, o le Kerisiano moni e le fuaina i le mafaufau po o le tamaoiga, po o se isi lava malosi ae o le tutumau i le lotu talitonu ma le faatuatua ia Iesu Toetu; ma e ao ina fa’aalia i lo tatou olaga alu i luma, e fai ma malosi e liliu mai ai nisi e toatele. E lē o se tutumau, po o se Kerisiano faamaoni foi, le na o le toaga i le lotu, a’e le o atagia i le olaga i aso uma le olaga o se tagata o le Alii. O Iesu foi i lona soifua faamaoni ma lona soifua mama i aso uma, na iloa lava i lo la va tapuia ma lona Tamā, lea lava na taualuga i le Taulaga-faaoia, mo le lalolagi ina ia ola.

GALUEGA FAATINO: Taliga Fesili

1. O le a le mea sa matua ofo ai i latou o taua, ia Peteru ma Ioane?
Tali: Sa ofo ona o le lotu tetele, ao tagata e valelea.
2. O le a se faailoga e iloa ai o tagata popoto Ioane ma Peteru?
Tali: Ona o tagata e le o toilalo le talitonu ma le faatuatua ia Iesu, i le tau faamatau mai o taitai ma a latou tulafono.

3. E faafefea ona e iloa le lotu toa ma le lotu tetele o Peteru ma Ioane?
Tali: E iloa i la laua tali le fefefe o tautino atu i taitai o le nuu ma le lotu, e pei ona ta’ua i le f. 19 – 20.
4. O le a le mea na faia e Peteru ma Ioane, lea ua mafua ai ona vivii tagata uma ia te i la’ua?
Tali: O le faamaloloina o le pipili, ua 40 ma ona tupu tausaga o ma’i.
5. Na mafai faapefea e Peteru ma Ioane ona faamalolo le pipili, o fea e aumai ai lo la malosi?
Tali: Na mafai i le mana faaoia o Iesu, le na aumai ai lo la mafai.

PESE: 231 (Ia tiai ia le fefe)

A’OA’OGA:

1. Ia avea oe ma Kerisiano moni.
2. Ia tatou lotu tetele i le Alii.
3. A a’u le Alii ma tatou, e leai se faigata e manumalo mai.

ASO SA: 28 APERILA 2019

MATAUPU: O LE ATUA AUAI MAI I LO TATOU AIGA

SINI: Ia a’oa’o tamaiti ia latou iloa, le mafanafana ma le fiafia o le tagata na te iloa, le auai faatasi ole Atua ia te ia.”

TUSI FAITAU: Salamo 90: 1 – 12

FESOASOANI MO FAIAOGA:

Fai mai upu o le tasi pese Samoa – “E te fiu e saili solo, se mea e malie ai lou loto; Na o lou aiga moni, e te maua ai le fiafia ma le olioli. E mǎea loa le tele ma le mamafa o feau o le aso, e te lagona lava le fiafia ma le naunau e alu i le fale. O lou aiga o le nofoaga e te iloa lelei, e te saoloto ai foi. E te taunuu loa i lou aiga, talai seevae, pule oe i lou laei e fai, ma fealuai solo e aunoa ma sou popole, pe o le a le manatu o tagata ia te oe. A tatou tautala loa i le tulaga mamalu o le Atua ma lona silisiliese, ona tatou iloa lea, O le auai mai o le Atua ia te oe le tagata faatuatua, e te lagonaina lava le mafanafana, ma le saoloto e pei ona e iai i lou aiga. O le auai mai o le Atua ia oe, e te lagonaina lou malosi, lou mautinoa, ma lou puipua. Ma o le finagalo moni lena o le Atua mo tatou; Ia fai Ia ma mea tatou te nonofo ai, e ala ilona auai mai; ma ia tatou iloa lona iai pea i o tatou tafatafa i taimi uma. Lea e fai mai le fai Salamo – “Le Alii e, ua fai oe ma mea matou te nonofo ai, i lea tupulaga ma lea tupulaga.”

O le Salamo lenei, e iai le talitonuga o le tatalo a Mose, ma o se tasi o pese ua leva. O faamanatu mai e le pese ia tatou, e tatau ona tatou manatua, ma ‘aua lava nei galo lo tatou aiga, o le Atua lea. Ia tatou nonofo mau ia te Ia, o Ia lo tatou malu, auā o le Atua mai le vavau e oo i le faavavau. O le faavavau lea o le Atua i mea uma lava, lea e mafua ai ona tatou faalagolago ia te Ia. E faigofie ona tatou loto vaivai, pe a mavae tausaga e tele o le ola, ma foliga ua lē matagofie le lalolagi ia tatou; O taimi o le soifua matutua, ‘aua nei manatu ai o le Atua lo tatou mutaaga. Leai! e le fuapauina le Atua i le taimi – O le Atua lava ia o lo tatou aiga e faavavau, aua e pei le afe o tausaga ia te Ia, o le aso e tasi. Ia tatou vaai i le Atua, o Ia e toatasi o loo tatou ola ai, gaoioi ai, ma

mafua ai foi ona tatou i ai (Galuega 17: 28) O lo tatou aiga e maua ai mea uma ia e tatou. O le pogai ma le malu o tagata uma. O le ta’ita’iina o Isaraelu e le Atua i le vao, e le na o le faailoa tasi ane a ma toe alu ese, leai! O le afi faaniutu i le po. Ma le asu i le ao. E le mafai ona tuua tatou e le Atua. O la Iesu foi, (Mt 28: 20) *“Ou te ia te outou i aso uma lava e le aunoa.”* E lelei tele pe a tatou iloa, poo fea lava tatou te o iai i le aso; o a foi mea tatou te fetaiiai, o loo auai faatasi le Atua ma tatou.

Tupulaga o teine ma tama, e ala ona lofia i tatou i faigata ma le mautonu le loto, ona o le lē mautinoa o le auai o le Atua ia i tatou. O Iesu lava ia, e leai se taimi na auaoa ai i lona silafia, lo la aufaatasi ma lona Tamā. Lē na maua ai lona mautinoa ma lona mafaia o mea uma, e pei ona ia osia ai foi le Taulaga faaola mo le lalolagi uma. Alu i le Atua lou aiga!

GALUEGA FAATINO:

- (i) Tusi sau solo e uiga ia “Iesu o lou fale e te malu ai” E lua (2) parakalafa o le solo, ae fa (4) laina o le parakalafa e tasi.
- (ii) Saunia e lau susuga i le faiaoga ni fesili, e tuliloa ai le mataupu.

PESE: 147 (Ia e afio mai; Lou faaola e)

A’OA’OGA:

- 1. E mafanafana le aufaatasi ma le Atua
- 2. O le Atua le aiga e faavavau
- 3. Fiafia i le Atua.

.....

**MANATU TAIALA ME: IA VIIA LE ALII I O TATOU
OLA**

O le manulauti lea o tulimatai e le au Faatuatua i le soifuaga nei, ia saofaga i le ola faavavau. O le fesili tele; “E sao faapefea?” O le tali lea; “O le faatuatua;” a’e o le faatuatua e iloa mai lou soifua, ma lo’u foi ola fa’aaogāina tatau, mo se viiga o le Atua.

ASO SA: 5 ME 2019

MATAUPU: FA’AA’OA’O I ALA O KALEPO

SINI: Ia a’oa’o tamaiti ia o latou iloa, e aoga le ola fa’aaogaina ma le tutumau o isi tagata i le Atua, e a’oa’o mai mo lo tatou foi taumafai.

TUSI FAITAU: Iosua 14: 6 – 15

FESOASOANI MO FAIAOGA:

O Kalepo, o se tagata faatuatua o iloa mai lava i le amataga. O ia o se tasi o Sipai e toa sefulu ma le lua na o e vaai le nuu folafolaina (Numera 13: 30 – 33). Sa vaai tino i aai malolosi ma sauai, peitai, sa ia iloa ma talitonu, e fesoasoani le Atua iā latou, ma latou manumaloina le laueleele. Na o Kalepo lava ma Iosua na loto tetele ma faamoemoe i le Atua, ao isi na loto vaivai ma lē talitonu. O le faatuatua lea o Kalepo, na folafola ai e le Atua ia te ia, lona tofi i le laueleele. (Numera 14: 24 / Teuterenome 1: 34 - 36

Manatua, ua uma lava ona faataoto ma folafola mai e le Atua le vaevaega o le eleele ia Mose. Ua mavae la Mose, ao lea ua tulai mai Iosua, e leai se mea e tasi na ia suia, e tusa o le upu na

faatonu mai e le Atua. Sa tatou faitau nei, le tuuina atu e Iosua ia Kalepo o lona tofi, i le gagaifo o le la i lona soifua ua matua, ua 85 tausaga ao tumau ma faatuatua pea. Ona faamanuia atu lea o Iosua ia Kalepo, ma tuuina atu ia te ia o Heperona, auā sa ia mulimuli i le Atua ma le atoatoa (f.10 – 14). E ui lava, o loo iai pea Anaki i le laueleele ua fai ma ona tofi, ae sa iloa lelei e Kalepo, e ‘au pea le Atua ma ia, ma na te manumaloina lava le mea ua folafola mai e le Atua mo ia (f 12) “.....*afai e ia te a’u le Alii, ona ou mafai lea ona tutuli ia te i latou, e pei ona fetalai mai ai o le Alii.*” Fai mai le faaiuga o la tatou tusi faitau (f 14) – E oo mai i le aso, ua fai lea mea ma tofi o Kalepo le atalii o Iefune, “*ina ua matua mulimuli atu i le Alii lou Atua o Isaraelu.*” E leai se afa-meia ia Kalepo, ua fai ma ana miti e tauave pea le folafolaga a le Atua ia te ia. Ua ia loto atu pea iai ma tulimatai i aso uma. Ua tatou iloa ai, po o le a le ausiagata o se mea ua folafola mai e le Atua, o le talitonu ma le faatuatua, e taofiofia oe ma faamalosi pea, e ui ina iai iuleo faa-satani e faavaivaia oe, ae maise lava le faapea mai, “Ua e matua.” Fai mai le Salamo 92: 12 – 14; “*E tupu olaola le tagata amiotonu e pei o le pama; e tupu tele e pei o le arasi i Lapanona. O e ua totoina i le fale o le Alii, e tupu olaola i latou i lotoa o lo latou Atua. A oo ina ulusina, latou te fua mai pea lava; e malolosi ma lauolaola i latou.*”

Ia pei o Kalepo lo tatou faatuatua tama ma teine talavou e le na o le amataga o la tatou savaliga ma le Atua, ae mo lo tatou ola uma lava. O lona uiga, e le tatau ona tatou tuu atu tatou e malolo, ona faapea sa fai so tatou aoga, pe sa tatou usiusita’i ma sagatonu muamua. E oo mai a i le asō, o loo faamamaluina lava e le Atua ana folafola ma tausi i ana poloaiga mo tagata. E aoga mo lo tatou mautinoa, ina ia tupu ai pea lo tatou faatuatua. O Iesu Keriso le na ofoina mai lona soifua atoa uma lava, ona o le faamoemoe o le Alofa Tunoa o le Atua, ia ola tagata uma i le faatuatua.

Uiga o Upu:

- i) sa Anakī (f 12) - ituaiga tagata tino tetele ma tupu maualulu pei o ni sauai.
- ii) Arapa (f 15) - o le tagata sili o sa Anaki.

GALUEGA FAATINO: Taliga Fesili

- 1. O le a le matua o Kalepo, ae folafola loa iai e le Atua lona tofi o ta’ua nei?
Tali: Fasefulu tausaga lona matua.
- 2. Ina ua foai atu e Iosua ia Kalepo lona laueleele, o le a le faamoemoe sa ia Kalepo?
Tali: O le a sauni loa e faatoilalo Anaki o totoe i le fanua, ae faamoemoe la te au lava ma le Atua.
- 3. E fia tausaga o iloa mai le tala, o mulimuli lava ma le faamaoni Kalepo i le Atua?
Tali: 45 tausaga
- 4. O Kiriataarapa e tutusa ma ai le nuu i aso nei?
Tali: Heperona
- 5. O le a le mea na fai e Kalepo, na mafua ai ona maua lona fanua?
Tali: Faatuatua ma mulimuli tumau i le Atua.

PESE: 177 (Galue ia seia uma ai)

A’OA’OGA:

- 1. Mulimuli i le Atua e oo i le iuga.
 - 2. E tumau le malosi o le tagata e faamoemoe i le Atua
 - 3. Faasoa lima lelei e pei o Iosua.
-

ASO SA: 12 ME 2019

MATAUPU: AVEA MA TINĀ E MATA’U I LE ATUA

SINI: Ia a’oa’o tamaiti ia latou iloa, le tele o itu lelei ma le taua, e alia’e mai se tinā ae mata’u i le Atua.

TUSI FAITAU: Faataoto 31: 10 – 31

FESOASOANI MO FAIAOGA:

O le tusi o faataoto, e tele taimi o tautala ai i tinā, ma ua talafeagai lelei foi ma lona faaiuga i le mataupu lenei e fatatau i se tinā atamai, tele ona agavaa, ma alofa. O le tusi na faitauina, o tautino mai ai le taugata o se tinā faapea, pe a tau faatusa i ni auro ma ni ario lona tau auā e silisili lona tau i lo penina. O lea tāua faatusagatā o le tinā; o loo faamatalaina mai i le tele o itu eseese, o iloa ai lona tagata, e pei o le mafutaga ma le tama ma le fanau i le aiga. E faatuatua ia te ia lana tane, aua e agalelei faamaoni ia te ia, i aso uma o lona ola. E le mativa i se mea, aua e galue ma le faamaoni ma fa’aaoga tatau le ola. E soifua magafagafa i taimi uma, aemaise suiga o le tau e oo mai ma tapenaga e tatau mo ia suiga. I fafo atu o le lio faale-aiga, e iloa gofie foi o ia, ona o lana tane ma mea o ia fa’aaogaina i le saofaiga a le nuu. O lona alofa foi ua faasafua i fafo atu mai lona aiga, ma o ia o se tinā poto i luma o le Atua. O le ala faafetaia lea o ia e tagata uma lava, atoa ma lona aiga. Ua faasilisili lava ia mai le toatele o e amio lelei, ma ua iloa ai, o ia o se fafine e mata’u i le Atua. O le fafne o taua nei, ua matua tulaga ese lava i lona mafai. O le tulaga lautele o lona aiga o le matua maualuga lava. O le mea

moni lava, e le na o se toatasi le fafine; masalo o avea ia ma ata tuu faatasi, o le tulaga ese o le auaunaga faatinā. O lona uiga, tatou te le vaai ia te ia o se ata e tosina iai mea taitasi uma lava, aua o ta aso, ta te lē mafai ona faia ia mea uma, ona e sa'asa'a. E le mafai ona tatou tutusa lelei ma ia, ae mafai ona a'oa'oina mai tatou mai mea na ia faia i lona loto atoa, ma lona soifua galue ma le ola tapenapena. A vaai i le tusi atoa o Faataoto, o loo amata i le faatonuga (1: 7) "Matau i le Atua" ae faaiu i le ata o le fafine o ia faataunuuina lea faatonuga.

E taua tele tama ma teine lo tatou iloa o lagona ia ma agavaa o tina, e mafai ai ona tatou logosaia le ola tauivi ma le alofa e pei o latou. Aua o le taulaga faaola foi na faia e Iesu mo tagata uma lava, sa fa'aalia lava i lona ofo atoa atu o Ia lava ma lona tapenaina o mea uma faa-fafine toaga, ina ia manuia ma ola le lalolagi uma, e ala i lona maliu ma toe soifua mai manumalo.

Uiga o Upu:

- i) kisure (f 19) - o le laau e taai ai le fulufulu mafanafana
- ii) peleke (f 19) - o le laau lapotopoto foi e fai lona au, e fa'aaoga i filo ma vulu.

GALUEGA FAATINO:

Taliga Fesili:

- 1. O a ni mea se lima e iloa ai le mata'u o le tinā i le Atua?
- Tali: (i) E alofa faamaoni i lona toalua
- (ii) E galue malosi
- (iii) E alofa i lana fanau
- (iv) E vaai mamao i le lumanai
- (v) E mata'u i le Atua

- 2. Aisea e le fefe ai lenei tinā pe a oo mai le tau malulu?
- Tali: E le popole aua ua uma ona ia saunia ofu mafanafana mautu ma lelei mo lona aiga uma.

- 3. O ai lea e faatusa iai le ola tapenapena ma le faaputuputu o lenei tina?
- Tali: Faatusa i vaa a faatauoa, e mamao le mea e aumai ai o latou oloa.

- 4. O a ofu o lenei tinā o ta'ua i le tala?
- Tali: O le malosi ma le mamalu.

PESE: 70

A'OA'OGA:

- 1. E matagofie i le Atua le ola mata'u
- 2. O le tagata poto e mata'u i le Atua
- 3. Avea ma tinā taugata i le Alii.

.....

ASO SA: 26 ME 2019

MATAUPU: MOMOE IA E TAUNUU i LE TINI

SINI: Ia a'oa'o tamatii ia latou iloa, le taua o le onosaia o faigata e fetaiai, a'o tapenapena mo se tu'uga.

TUSI FAITAU: Eperu 12: 1 – 11

FESOASOANI MO FAIAOGA:

So’o se tu’uga lava, e iai le vaega tonu e amata ai, e iai foi le vaega tonu e gata ai, pe tini i ai. O taaloga lava ia faava-o-malo o aofia ai ma tamoeaga, e sili ona taua le mua, lua ma le tolu. Ae o lo tatou olaga faa-Kerisiano o fai nei, o le tuuga e amata ilou taliaina o Iesu, ae tini ina ua lua fetaiiai lelei lava ma le Alii, i le iuga po o le taimi mulimuli. O le tuuga lea faa-le-Agaga, e le faia ni tulaga tasi, lua, ma le tolu; ae o le tuuga e mua tagata uma lava e tini. O le a la foi lena o aumai ai le faalaeiaua a le tusitala i le numera tele, (plural) – (f 1) “...*ina tatou tuu ese ia o mea mamafa uma ... ia tatou taufetuli ... o i o tatou luma.*”

Fai mai, e iai taaloga e masani ona fai muamua i le atunuu o Eleni, e tapena ai mo taaloga tele o le Olimapeka (Olympic Games). O le malae e fai ai toleniga ia, o se eleele faalaumiumi, ae siomia e le vai ona itu uma. O tagata koloni foi, e faapipii fasi-uamea i o latou vae ao koloni. E fai o le mamafa, a o le pipii o vae i le vailaloa o le malae. O mea mamafa ia ma faigata, e taatia uma ese, pe a oo i taaloga autu e tauva ai. Masalo sa iai i le mafaufau o le tusitala o le au-Eperu le ata o taaloga ia, ua na aumai ai le lesona aoga lea, e fai ma ata faatusa o le soifua saili mo le Alii. “... ina tatou tu’uese ia o mea mamafa uma, atoa ma le agasala e faalavelave gofie ai i tatou, ia tatou taufetuli ma le onosai i le ala tanu oi o tatou luma, ma ia vaavaai atu ia Iesu.

O le ata lea o faigata tatou te fetaiiai, tatou le au-Kerisiano, i le soifuaga o tatou i ai nei, a’o tatou tausinio uma, ina ia tatou tini ma maua le Alii. O puapuaga, o le malae e tapena ai le ola talitonu ina ia aveia ma faatuatua matua, e ala i le onosai ma le tutumau i le Alii. O le atia’eina o le soifua faatuatua, ma lagonaina ai le suamalie o le tini po o le taunuuga i le taimi

mulimuli. O le manatu o le tusitala mo le au-Kerisiano, ia mafaufau i le onosai o Iesu, i tagata agasala sa faatuiese ia te Ia. Ina ia latou onosai foi ma tutumau i le faatuatua ma fa’auau ai pea ona tamomoe.

Ona ta aofai mai lea e le tusitala le va o le tagata ma lona Atua, i le ata faigofie o le tama ma le atalii. A fai se fesili – “O ai e sili atu lona alofa i lona atalii; o le tama na te faataga lona atalii e fai le mea e afaina ai; po o le tama e aoai, faatonu ma sasa lona atalii, ina ia aoa’iina ai, ina ia na iloa le mea sa’o ma tatau? A faigata ma tigaina le aoaiga mai le Atua, matua vaai lelei iai, o le faamaoniga o lona alofa, ina ia tini lou taumafai. O le aoaiga o le mea e tatau, aua a le talia e le tagata, “e le o se atalii o ia, a o le tama to i fale, e le tini foi lana tamoeaga.

Tama ma teine talavou, o le feau lena, ia tatou tumau, onosai ma faatuatua, o le faailoga o lo tatou mafai ona tu’uese mea mamafa ma le agasala, o faalavelave mai i la tatou tamoeaga o fai mo Iesu, o Ia le tini o faatalitali mai mo i tatou. Iesu le na ia onosaia faigata uma e oo lava i le oti, ae na tumau ma faatuatua i lona Tamā, Le na Ia toe faatuina o Ia mai le tuugamau, ina ia pale ma tini tatou uma i le ola faavavau, e ala i le faatuatua.

Uiga o Upu ma Fuaitau:

- i) (f 1) vagavagaia - siomia
- ii) (f 4)...e oo i le faasasa’aina o outou loto
 - E oo a i le sauaina ma le faamaligiina o outou toto, tou te le’i tete’e lava iai.
- iii) (f 8)... o tama to i fale outou
 - Ua o ni fanau ua le mafai ona faamaonia mo le Alii, ina ua mautinoa e le taunuu i le tini.

GALUEGA FAATINO:

1. Saunia e lau susuga i le faiaoga ni nai fesili e tuliloa ai le mataupu, ma mafai ai ona latou taofi ma aoga mo i latou.

PESE: 255 (Ia tatou faamalosi....)

A’OA’OGA:

1. Faamalolosi ia tatou taunuu uma i le tini.
2. O Iesu le fa’aa’oa’o o mea lelei uma.
3. Tamoe i le faatuatua e te le sela ai.

.....

MANATU TAIALA IUNI: AUA NEI UTUVAITOFI I LE FINAGALO O LE ATUA
 (Do not take advantage of Gods will)

Tele mafuaaga e mafua ai ona le atoatoa lo tatou ola talitonu i le Atua. Ua tatou saili i vavega ma fa’aaliga faale-lalolagi. A leai, ona taumate faale-mafaufau lea ma fesili. E iai ea se Atua? Faamata o le mafuaaga lea ua ola masalosalo ai lo tatou ola faale-faatuatua. O le finagalo o le Atua, o loo gagana ai mea o le natura i aso uma. Ae ua logonoa ma maaa pea o tatou loto ma ua le mafai ai ona tatou iloa, faalogo ma usita’i o le ala lea na pauu ai nisi o taitai o le malo o Isaraelu, ua le malamalama i le finagalo faaola o le Atua. Ona aoai ai lea e le Atua i lona toasa, ae faamalumalu ai lona alofa tunoa.

ASO SA: 2 IUNI 2019

MATAUPU: E FA’AAOGA E LE ATUA TAMAITI MO LONA FINAGALO (*God uses children for His will*)

SINI: Ia a’oa’oina tamaiti, e lē faapito le finagalo o le Atua mo e matutua, e fa’aaoga foi e le Atua le fanau mo Lona finagalo.

TUSI FAITAU: 2 Tupu 5: 1 – 14

FESOASOANI MO FAIAOGA:

O Naamanu o le taitai au o le malo o Suria, o ia o le tagata malosi, aloaia ma tamaoiga, o le toa tautaua. O Naamanu foi na oo mai ai le manuia o le Alii i totonu o le malo o Suria, ao ia o le tagata ma’i lepela. Ua avea le ma’i o Naamanu ma tulaga ua mafatia ai lona loto. E fai o le tigā o le ma’i papala, ae ua avea foi le ma’i ma mea ua taumamao ai tagata ma ia. Ae ua atili ona mafatia Naamanu, ona ua fiu e saili se togafiti mo lona ma’i. Ina ua maea le taua tele a Isaraelu ma Suria, ma faatoilaloina ai Isaraelu, na ave ai faatagata taua nisi mai le malo o Isaraelu, faatasi ai ma se teineitiiti. O le ave faatagata o taua ai o le fanau, e faigata ona tatou tau mate poo le a lona uiga. Ae foliga mai o le vaega lea o le tala, o loo taoto ai le finagalo o le Atua mo le faamāmāina o Naamanu. E fa’aaoga e le Atua le tagata faatauva, e faamaulaloina le loto o le tagata malosi. A fua i le va o Naamanu ma le teineitiiti e matua’i lē talafeagai lava. O Naamanu o le tagata aloaia ma le mamalu, ae ua na o se teineitiiti lea o le a usitai ai. O Naamanu o le tagata o nuu ese, e iai foi ona atua, ao lea o le a faalogo i le teineitiiti e uiga i le Atua

o Isaraelu. O ia o le taitai au, ao lea o le a faia le mea e manao ai lenei teineitiiti sa au mai faatagata o taua. E fa'aaloaloga Naamanu ma tele ana auauna, ao lenei teineitiiti o se auauna a lona toalua. Tulaga ia sa faigata ona talia e le taitai au le manao o le teineitiiti, e alu e vaai le perofeta o lona nuu o Isaraelu.

O le mea ua le iloa e Naamanu, o le faaolataga a le Alii mo ia ma lona aiga, na auala mai i lenei teineitiiti. Ae ui lava i se faigata o le loto o le taitai au, ae na ia usita'i lava ma alu e saili le Perofeta o Isaraelu. O le tagata ua fia maua se malologa ma se faamafanafana mo ona mafatiaga ma tiga, talia le upu a le Atua.

Ua alu saili Naamanu mo sana faamalologa i Isaraelu i le tagata o le Atua lea na tau atu ai e le teineitiiti. Ua maua ona faatonu lea e Elisaia le Perofeta a le Alii, e alu e tofu faafitu i le Ioritana. Na le fiafia foi Naamanu ma tau toe foi i Suria. Ae na toe usitai lava, ona o lona fia malolo. Ua alu Naamanu ma faia le mea na faatonu ai o ia e Elisaia e fai. Ona mama ai lea o ia.

O le mea lea na manao ai le Atua ia Naamanu, ia iloa ona faamaualalo lona loto i luma o le Atua. Lona loto faamaualuga ma le ita, na lagona ai e Naamanu lona talitonu i le Atua o Isaraelu.

GALUEGA FAATINO: Sailiiliga

Faatonu tamaiti ina ia lisi mai o latou tiute fai i totonu o aiga ma aoga.

Faataitaiga: Sina Tiute
Aiga Aoga
 Tapena le fale taitai

A maea ona toe faatonu lea e lisi mai ni faafitauli o loo mafatia ai totonu o aiga.

Faataitaiga: Sina Tiute
Aiga Aoga
 Tele feau tuai soo

O le galuega faatino lenei, e ao ona fa'aaoga le tulaga o le faafesoaa'i ma le fanau, ma faufautua ai lau susuga i le fanau (counseling) i auala ma galuega e fesoasoani ai mo i latou i le ola taumafai i totonu o aiga ma aoga. Ia taumafai lau susuga e aumai e oe nisi o mataupu (issues) o loo tele ina aafia ai fanau, e faasoa ai ma i latou.

A'OA'OGA:

1. O le fanau o ave feau a le Atua.
2. Aua nei e manatu faatauvaa i lou tagata.
3. E amanaia tamaiti e le Atua.

.....

ASO SA: 9 IUNI 2019

MATAUPU: UA APOAPOA'I ATU PAULO I LE EKALEZIA I KOLOSE

SINI: Ia malamalama tamaiti i vaega e tolu o loo faamamafa i le mataupu e 4 o le tusi a Kolose.

TUSI FAITAU: Kolose 4: 1 – 18

FESOASOANI MO FAIAOGA:

O le mataupu e 4 o le tusi leni a Kolose o loo faamatalaina “Ia finau i le tatalo ma ia lelei le amio.” O apoapoiga ma faamalosi au a le Aposetolo o loo tusi atu ai i le Ekalesia, e tutusa lava ma isi tusi ma tusi atu ai Paulo i Ekalesia i Asia Itiiti (Asia Minor) A o le mataupu leni e 4, e tolu vaega tetele o loo vaevaeina ai.

- 1) Ola Tatalo (Prayer Life)
- 2) Molimau mo isi (Witness for others)
- 3) Alofaaga ma Faamanuiaga (Greeting)

Ua tatou masani i le ola tatalo, ma ua tele foi ina lauga ai le aufaigaluega i le taua o le ola tatalo. O le sootaga lea a le tagata i le Atua, e talatalanoa ai i le Atua ma le loto faamaoni. Ia e pei foi ona iai vaevaega o a tatou talosaga molia. O le tatalo o le faafetai, faatoesega ma manaoga.

Ao le tatalo lea e apoapoi atu ai Paulo i Kolose. (a) Ia malosi i le tatalo (be earnestly in prayer). Ia fa’auau i le tatalo, aua nei faavaivai i le ola tatalo. O le tatalo, o le malosi lea na mafai ona faatuina ai le Ekalesia i Kolose. E lei avea le tele o faigata ma puapuaga ua aafia ai le ola o Paulo ma mea e vaivai ai lona loto e tatalo i le Alii, aua le manuia o le Ekalesia.

Ia mataala ma faaeteete i le tatalo (Be vigilant in prayer), O le mataala i le tatalo, e afua mai lea i le loto, ia aua nei vaivai. Aua le avea le tele o faafitauli ma le tele o talaiga sese, e vaivai ai le tatalo i le Atua. Ia faaeteete foi i mea e tatalo atu ai i le Atua, nei soona tatalo i isi mea le aoga o le ola nei, ae galo ai le mea taua e ao ona tau atu i le Atua (eg tatalo a le Faresaio ma le Kelona)

(e) O le molimau mo isi (Witness for others) o loo faatatau lea i taitai ma tagata o le Ekalesia i Kolose. Ia lelei a latou amio, e fai ma molimau mo isi, e mafai ai ona talia le Tala Lelei ia Keriso. E le nao le tatalo, ae ia tatalo ma o faatasi ma galuega. Aua afai nao o le tatalo ae leaga le amio, ona avea ai lea o i latou ma molimau pepelo ia Keriso. O le amio lelei, fai mea tonu ma fai

mea lelei, o le tatalo sili lea i luma o le Alii. (i) O faamanuiaga ma alofaaga (greetings), o loo i le vaega mulimuli o le mataupu e 4. I so o se tusi a le Aposetolo, e tele lava ina amata i faamanuiaga ma alofaaga ia ae faaiu ai foi.

O le vaega leni, o loo momoli atu ai alofaaga a le aufaigaluega o loo faatasi ma le Aposetolo ma faamanuia atu ai Paulo i le Ekalesia i Kolose, faapea foi isi au uso o le Tala Lelei o loo itu e fia o le lalolagi.

O le taua o alofaaga ma faamanuiaga o se tasi lea o faamalosi au, mo tagata e iloa ai le amanaia o i latou i o latou faiva ma Tala Lelei.

GALUEGA FAATINO:

Fesili ma Tali (Fa’aaoga le Tusi Paia)

1. O le a le ituaiga tatalo lea e apoapoi atu ai Paulo i Kolose?
Tali: (3) Ia faamalosi i le tatalo.
Molimau mo isi
Faamanuiaga ma alofaaga
2. E fia vaega ua vaevaeina ai le mataupu e 4 o le tusi a Kolose. O a ia vaega?
Tali: Ia faamalosi i le tatalo
Ia mataala i le tatalo
3. O le a se taua o le ola tatalo ia te oe?
Tali: Silasila lau susuga i le faiaoga i tali a tamaiti. E manaia foi pea a lau i luma o le vasega a latou tali.
4. Aisea e taua ai le ola tatalo ia o faatasi ma galuega?
Tali: O le tatalo sili ona taua i tagata, o le amio ia lelei.

5. Tusi mai ni tatalo a tamaiti (O le galuega lea e ave i le fale (Home work) Ia iai uma vaega e tolu o talosaga.

Faafetai
Faatoesega
Manaoga

A’OA’OGA:

1. Ia malosi le ola tatalo.
2. Ia tatalo ma le faamaoni i le Atua
3. Aua le ola faatusatusa i le tatalo
4. Ofo atu lou alofa mo isi.

.....

ASO SA: 16 IUNI 2019

**MATAUPU: O LE TUSI A EPERU
(The book of Hebrews)**

SINI: Ia malamalama tamaiti i le tusi a Eperu ma le mafuaaga na tusia ai ma le finauga a le tusitala e faatusatusa ai le Feagaiga Tuai ma le taimi o Keriso.

TUSI FAITAU: Eperu 1 – 13

FESOASOANI MO FAIAOGA:

(O le mataupu lenei, e mafai ona fa’aaoga se isi aso avanoa e faamaea ai pe a moomia)

O le tusi ia Eperu o le tusi na tusia faapitoa mo Kerisiano Eperu i le vaitau o le T.A 65 – 70. Le vaitau lea ae lei faaleagaina le malumalu i Ierusalem. O le vaitau foi lea o le malosi o sauaga a le malo o Roma i lalo o le ta’ita’iiga a le Emeperoa (Emperor) o Nero. O ia sauaga ua iloga ona mafatia ai le au Kerisiano. Ona o le mamafa o ia sauaga na manatu ai Kerisiano Eperu ia o le a faamaamulu mai le talitonuga faa-Kerisiano ae toe foi i tapuaiga/lotu Iutaia na sau ai i le amataga. O le auala lea na saili ai lo latou filemu i le taimi o puapuaga.

E peiseai o le mafuaaga tonu lea na tusia ai lenei tusi, ina ia faamausali i loto o Kerisiano Eperu ia ua mafaufau o le a toe foi i tua, le tulaga silisili ese o Iesu Keriso ma le tapuaiga Kerisiano. Afai e tumau i o latou loto lea talitonu, ona avea lea ma malosiaga e tutumau ai i le Upu moni, tainane le tele o tofotofoga ma sauaga ua feagai ma i latou.

O le feau autu lava ia o loo finauaina e le tusitala o Iesu Keriso o loo faavae ai le talitonuga faa-Kerisiano, o le Alo moni ole Atua ua na fa’aalia mai i le lalolagi le Tamā. O le Atua ua liutino ma na afio mai e faaola le lalolagi, o Ia o le taulaga o le faaolataga. Ona o lea ua taua ai o ia o le ‘Silisili Ese.’

Ua faamausali e le tusitala lana finauga e ala i lona toe aumaia o vaega autu o le tala faasolopito o Isaraelu, faatasi ai ma nisi o latou tu ma aga faa-Iutaia sa limata’ita’iina ai lo latou ola faatuatua i le feagaiga tuai, e faatusatusa ai le Silisili Ese o Iesu Keriso.

- 1) O le silisili ese o Iesu i Perofeta (1: 1 – 3)
- 2) O le silisili ese o Iesu i agelu (1: 4 – 14, 2: 5 – 6)
- 3) O le silisili ese o Iesu ia Iosua (4: 6 – 11)
- 4) O le silisili ese o Iesu i le au ositaulaga (2: 5 – 8)
- 5) O le silisili ese o Iesu ia Aperaamo (7: 1 – 10)
- 6) O le silisili ese o le feagaiga fou ua faia e Iesu (8: 7 – 13)
- 7) O le silisili ese o le taulaga na faia e Iesu (10: 1 – 14)

- 8) O le silisili ese o le Tala Lelei i galuega o le faatuatua (11)
- 9) O le Leoleo Mamoe sili (13: 20 - 21)

E ui ina o le tusi a Eperu na tusia mo le au Kerisiano i Eperu ae aoga foi mo le au Kerisiano i nei ona po. Ua malosi mai finauga e ala i tapuaiga. Ua iai foi nisi lotu ua finauaina le tutusa o Iesu ua nisi o le au Perofeta ma agelu etc. O nisi foi ua filifili e lafoa'i le tapuaiga faa Kerisiano ma le manatu e maua ai le filemu. O le mea moni, o lo tatou faatuatuaga i le Atua e ala ia Iesu Keriso e matua tu tasi ese lava. Ma o lo tatou faatuatuaga lea ua valaauina i tatou e tutumau ai.

GALUEGA FAATINO:

Faatonu tamaiti e vaai mataupu ia o le tusi a Eperu o loo lisiina, o e faitau ma lisi i lalo mea e silisili ese ai Iesu i mea uma ia ma tagata uma ia e taua i le mataupu.

A'OA'OGA:

- 1. E silisili ese Iesu Keriso i mea uma i le lagi ma le lalolagi.
- 2. Ia tumau i lou ola faa-Kerisiano.

.....

ASO SA: 23 IUNI 2019

MATAUPU: O LE FAAOLA POO LE FASIOTI
(To save or to kill)

SINI: Ia malamalama tamaiti e le finagalo le Alii e vaioa galuega lelei ma galuega faaola e

faia i le Aso Sa. E taua le faaola nai loo le aso.

TUSI FAITAU: Mareko 3: 1 – 6

FESOASOANI MO FAIAOGA:

O le tala masani lenei tala e uiga i le tagata lima gase na faamalolo e Iesu i le Aso Sa. Ao le taua o lenei tala, e mafai ai ona tatou tali atu i fesili o loo fesiligia ai galuega e faia i le Aso Sa.

O tu ma aga faa-Iutaia e aafia i le tulafono, e sa ona faia ni galuega i le Aso Sa so o se galuega lava. O le mea sa lilo i mafaufau o le au Faresaio. O le galuega faaola na faia e Iesu mo le tagata, e faafeagai ma lo latou foi galuega o loo faia i le Aso Sa, o le taulamalama lea o se mea e faia e Iesu, latou te molia ai o Ia ma fasioti. O le mafuaaga tonu lea na fetalai ai Iesu “Pe sa ea le agalelei i le sapatu, poo le agaleaga, o le faaola poo le fasioti? I le tala na tatou faitauina e foliga mai e lei saili e le ua gase lona lima se fesoasoani, ae o lona nofonofu i fafo o le sunako o le faailoga lea o lona manao e faalatalata i le Alii. O le ulufale atu ai o Iesu i le sunako na ia fetalai atu ai i le tagata lima gase ina ia ulufale mai, ua leva ona silafia e le Alii le lotu o le tagata ua manaomia se fesoasoani, tusa lava pe le tautala mai. O le Alii, e silasila i le lotu. Ao lei faamaloloina e Iesu le tagata lima gase, ua loa foi ona silafia e le Alii lotu o le au Faresaio, ma le mafuaaga ua ala ai ona o atu i le sunako. O le galuega ua latou galulue ai i le Aso Sa, o le galuega e fasioti i le tagata e ala ia Iesu, o le agaleaga lea, na fetalai ai le Alii. O le fesili, e lelei lea ituaiga galuega pea fai i le Aso Sa? Le aso ua faapea e paia?

O le faamalolo ai o le tagatga limagase i le sapatu, o le tali atu lava lea o Iesu i fesili o loo i lotu o le au Faresaio. Aisea ua soli ai e lenei tagata le sapatu? Ao le galuega foi na faia e Iesu o le tau atu lava lea i le au Faresaio, e taua galuega faaola ma le

agalelei i le Aso Sa, o le finagalo foi lea o le Alii. Ao galuega e fasioti ai ma agaleaga, o galuega ia e ao ona aua nei faia i le sapati, ae faapea foi aso uma o le ola.

O le afio mai o Iesu i le lalolagi, na afio mai e faaola le tagata, e le faailogaina se taimi poo se aso, ae fua i le loto o le tagata. O Iesu foi na fetalai, “O le sapati mo le tagata, ae le o le tagata mo le sapati. A tatou talia le Alii, o ia lava lea o le sapati.

GALUEGA FAATINO:

Faatino le tala (5 minute)

A’OA’OGA:

1. Aua le ola tau lamalama
2. E le o le aso, ao galuega lelei ma galuega faaola tatou te faia.
3. E malosi le agalelei

.....

ASO SA: 30 IUNI 2019

MATAUPU: O LE POTO O LE ATUA
(The wisdom of God)

SINI: Ia malamalama le fanau i le eseese o le poto o le Atua ma le poto o le tagata. O le poto ole tagata e faifai uma, ao le poto o le Atua e tumau e oo i le faavavau.

TUSI FAITAU: 1 Korinito 1: 18 – 25

FESOASOANI MO FAIAOGA:

E le tau faamatalaina le silisili ese o le poto o le Atua, aua o le poto lea o le Atua na Ia faia ai le lagi ma le lalolagi atoa ma mea uma ua iai, e oo lava i le tagata. A fua foi i le feagaiga tuai i talaaga o Faamasino, Perofeta ma taitai o le nuu o e sa avea ma tupu, na mafai ona latou faatulaga, taitai, faamasino, ma faatoilalo ona fili, ona o fuafuaga mamao ma le poto o le Atua na foai ai e le Atua. O le poto o le Atua na taitai ai e Mose lona nuu mai le ola pologa, o le poto o le Atua ua faamasino ai e Samuelu lona nuu. O le poto o le Atua na malosi ai Tavita e tuufaatasi ituaiga o Isaraelu, o le poto foi o le Atua na faufautua ai le au Perofeta mo le manuia o Isaraelu.

Ao le poto foi ole Atua na ia auina mai ai Iesu Keriso mo le faaolataga mo le lalolagi uma. Le poto lea o le Atua lea ua tauvaleina e le tagata malosi ma tamaoaiga i mea o le lalolagi nei. O le mafuaaga tonu lea na mafua ai ona tusi atu Paulo i le Ekalesia i Korinito. Ua amata ona fevaevae’i le Ekalesia e ala i le Tala Lelei ia Iesu, i lona maliu ma lona toetu. O le finagalo o le Atua ina ia faaolaina le lalolagi e ala ia Iesu Keriso, ao le finagalo lea o le Atua ua le mafai ona iloa e le tagata ona o lona poto ma lona atamai faalelalolagi nei. O le mea moni, ua taumafai le tagata e saili i ni fa’aaliga e iloa ai le moni o le poto o le Atua, ao tagata foi o nuu ese e pei o tagata Eleni, ua latou saili ile poto i o latou manatu faafilosofia (Philosophy). Ao Paulo ma lana au faigaluega ua latou tumau i le Tala Lelei e ala i le talai atu o Keriso ma lana faaolataga le mea ua tausuai ai Iutaia ma le valea ia Eleni.

Ao le Tala Lelei ia Iesu Keriso, o le ala tonu lea e iloa ai e le tagata le siilsili ese o le Atua ma ia maua ai le poto faale-Atua. A tatou mafaufau i le fetalaiaga a le Atua ia Iopu – “O fea sa e iai, ina ua ou faia le lalolagi?” O le fesili na iai se poto o le tagata, ina ua faia e le Atua le lalolagi? E leai, aua foi e lei iai se tagata i

le amata o mea uma. O lona uiga o le poto o le tagata, o le mea noa i le Atua. E lei faia ese tagata le la, po o le masina ma fetu, o le malamalama ma le pouliuli, o manu vaefa ma ia o le sami, o vai e tele ma le ea. E oo loa i le ola (life) gata loa le iloa o le tagata. Ae ia malamalama foi le tagata o le ola e a le Atua lea. A finagalo la le Atua e aveese le ola e mafai e le tagata ona toe aumai. O le silisili ese o le poto o le Atua, e leai sona amataga e leai foi sona gataaga.

GALUEGA FAATINO:

Tusiga Tala – Ulutala “*O LE TAUA O LE POTO*”

GALUEGA SUESUE:

O le galuega lea e galulue ai tamaiti ma lau susuga i le faiaoga. Sue mai faamatalaga e uiga i tagata nei.

- 1) Keloe
- 2) Apolo
- 3) Kefa
- 4) Kiripo
- 5) Kaio

A’OA’OGA:

1. O le mata’u i le Atua o le amataga lea o le poto
2. O le poto o le tagata o le valea lea i le Atua

.....

MANATU TAIALA IULAI: E LE MAFAI E LE POLOKIKI MA LE AGANUU ONA FAAILOA LE AMIOTONU A LE ATUA.
(Politics and tradition can not reveal the righteousness of God)

O tautinoga ma upu fai a le malo ua faasēsē ai le tagata vaivai, ina ua sao aluma upu taufaavalea ma le fia amiotonu ma ua taotaomia ai le finagalo o le Atua ma lana amiotonu. A o le aganuu foi sa malu ma so’oso’o tauau ma le lotu, ao lea ua tusitusilima ma faitio mai. Ae sei seu le manu ma taga’i i le galu. O ai le Ao o le Ekalesia? Ao ai foi e ou le ola? O le amiotonu ma le fai mea lelei e lē tau folafolaina i ni upu, po o se mea faalelalogi. E faavae i le feoai ma le Atua i le alofa ma le loto faamaualalo. E le polokiki le Atua, ae faamaoni lana amiotonu.

ASO SA: 7 IULAI 2019

MATAUPU: NOANOATIA I LE TULAFONO
(Bondage under the Law)

SINI: Ia malamalama le fanau i le tulaga o le Tala Lelei ma le tulafono. E lē mafai ona tuu faatasi e aunoa ma ni faafitauli ma feteenaiga. Ia iloa tonu e tamaiti le mea e maua ai le faaolaina.

TUSI FAITAU: Kalatia 3: 1 – 29

FESOASOANI MO FAIAOGA:

O Kalatia o se itumalo i totonu o Asia itiiti (Asia Minor/Turkey). O tagata e omai mai le malo o Farani lea na faaigoaina o ‘Gaul’ i na ona po. Na faavaeina e Paulo le lotu i Kalatia i le tausaga 50 T.L.M. po o le taimi tuanai le Mesia. Na iloga ona manuia le galuega a Paulo, sa talia lelei e tagata Kalatia le Tala Lelei ia Iesu Keriso, ao i latou o tagata o nuu ese (Gentiles). Ae ina ua tuua e le Aposetolo Kalatia, na taumafai ai loa tagata o le lotu Iutaia, e faaleaga le talaiga a Paulo e ala i le tulafono. Ua latou tala’i, a fia avea ma Kerisiano e ao ona ui atu i le tulafono a Mose. E le mafai ona taua se tagata o nuu ese ma Kerisiano pe a le peritomeina. Ua latou faatulaga tulafono ma faiga faa-Iutaia i totonu o tapuaiga. A lē talia e lē mafai ona faaolaina. Na talia lelei e Kalatia lea talaiga sese ma faiga faa-Iutaia ua lualuagia ai faiga o sauniga ma tapuaiga a le Ekalesia. O le mafuaaga lea ua mafua ai ona tutupu faafitauli ma fete’enaiga i totonu o le Ekalesia. Lea ua tusi atu Paulo, sei toe faamanatu ia Kalatia, e le mafai ona faaolaina le tagata i le tulafono “Kalatia valea e, o ai ea na poloaiga outou?” O le tusi e faailoa ai, e lē o le tulafono na latou maua ai le Agaga Paia, oo le malosi e fai ai le galuega. E lē o le tulafono foi na tau-amiotonuina ai Aperaamo. Na tau amiotonuina Aperaamo i le faatuatua. Ia faatuatua iā Iesu Keriso, o Ia lea o le Tala Lelei, e maua ai le faaolataga. Lea ua ta’u atu e Paulo, e lē o le tulafono na mafai ai ona ia faia vavega, faamalologa ma fa’aaliga na ia faia, ae ona ua ia talia le Tala Lelei iā Iesu Keriso. Ae afai foi o le tulafono e faaolaina ai, o lona uiga ua lē aoga le Afio mai o le Atua e ala ia Iesu Keriso. Afai foi ua faamamafa e Iutaia le feagaiga a le Atua ma Aperaamo. Ia malamalama Kalatia, o le feagaiga na faavae i le faatuatua ae lē o le tulafono. O tu ma aga ia o le lotu Iutaia, latou te faataua le tulafono, ae ua fai lea ma noanoataga o le Ekalesia i Kalatia ma ua tauau ai ina liliu ese o latou loto mai le Tala Lelei ia Keriso. O Keriso o le poloaiga sili lea a le Atua, o ia e tatala ai noanoataga o le ola o le tagata ona o le agasala.

GALUEGA FAATINO:

Fesili ma Tali:

1. O ifea e tu ai Kalatia?
Tali: Asia itiiti
2. O fea e o mai ai tagata Kalatia?
Tali: Farani
3. O le a le tausaga na faatuina ai le lotu i Kalatia?
Tali: 50 TTM (Taimi Tuanai le Mesia)
4. O ai na tusia le tusi o Kalatia? (Filifili le tali sao)
Tali: A - Timoteo
E - Paulo
I - Paulo ma Timoteo
O - Paulo ma le tagata mai Kalatia
5. Aisea e noanoatia ai le tagata i le tulafono?
Tali: E le maua ai le Faaolataga.

A’OA’OGA:

1. E le faaolaina le tagata i tulafono e faia e tagata.
2. O le avea ai ma Kerisiano, o le talia atoatoa lea o le Tala Lelei ia Iesu Keriso.
3. E aoga tulafono ae sili ona taua le ola faatuatua ia Iesu Keriso.

.....

ASO SA: 14 IULAI 2019

MATAUPU: POTO MA LE MAFAUFU
(Wisdom and Knowledge)

SINI: Ia malamalama tamaiti, o le poto ma le mafaufau o meaalofa ia mai le Atua e mafai ona maua i le ola mata'u i le Alii ma le alo ese mai le leaga.

TUSI FAITAU: Iopu 28: 1 – 28

FESOASOANI MO FAIAOGA:

O le tusi lenei a Iopu o loo i ai i tusitusiga ua taua o tusi a le poto (Books of Wisdom). E aofia ai tusi a Faataoto, Failauga ma le Pese a Solomona. O Iopu o le tagata ua tau amiotonuina lona ola e le Atua. Ae ua tatou masani i le tala ia Iopu, e tau loa Iopu tatou manatua loa le upu onosai. Ae e le na o le onosai le faamamafa o lenei tusi. E iai isi mea taua o loo aofia i le tusi lenei, e iai le mataupu o lenei taeao, “Poto ma le Mafaufau.” O le mataupu e 28, o se solo ua faataoto ai mafaufauga ma lagona o Iopu i le faigata ona maua o le poto ma le mafaufau lelei. Ao fea foi e saili ai ina ia maua.

E foliga mai i upu o le solo, o loo fatuina ai e Iopu le poto ma le mafaufau e leai sona tau, e taugata (priceless). A fua i upu o le solo, o loo faamatalatala ai e le fatu solo maa taua ma nofoaga e mafai ona saili ai ina ia maua. O le mea e maua ai le ario ma le auro, o le uamea ma le apamemea, o oa ia o le laueleele ma e tupu mai ai foi ma mea e ai. O maa taua ma le penina tau tele, e maua i ogasami loloto. O le sailiga o ia maa ma le oloa o le eleele e lē faigofie. E pei ona molimau ai upu o le solo. E lē

mafai ona savavali ai manu feai, e lei uia foi e le leona le ala. O le ata vaaia lea o le saili gatā o le oa lea e naunau ai le loto o le tagata. Ae ui i le faigata, e mafai ona maua, auā o le oa e vaaia e mata. Afai e iloa le oa lilo, ma maua lona tau ma le mea e saili ai. O ifea la e maua ai le poto ma le mafaufau? O mea e leai se tau, e le iloa foi e mata. E lē maua i le sami poo le eleele, e lē vaaia i le vanimonimo. Afai e lē taulia le oa o le eleele ma le sami, o le ario ma le auro, o le Safaraia ma le soama o penina tau tele, o le a la le aoga o le oa o loo faananau ai le loto o le tagata? O le manatu o Iopu, e leai se aogā e maua ai le oloa tautele, pe a le maua le poto ma le mafaufau. O le poto ma le mafaufau, e le tau suatia le eleele pe saili i le sami loloto.

O le poto ma le mafaufau, e maua lea i le ola matau i le Atua ma le alo ese mai i le leaga, e pei o upu a le solo. O lona uiga ua na o le Atua na te silafia le ala e maua ai le poto ma le mafaufau, o ala o le Atua. Ia iloa ma malamalama foi le tagata, o le poto ma le mafaufau na foafoa ai e le Atua mauga ma atumauga, o vaitafe ma le sami, o le vanimonimo ma le eleele o nofoaga ia ua saili ai le o'a tautele. O mea na faia e le Atua ina ia lelei ma matagofie mo le tagata. O le oa sili lea mai le Alii, o le poto ma le mafaufau.

GALUEGA FAATINO:

Galuega faatino mai i le fale (Homework)

I le mataupu 28, e 10 maa taua poo oa o le eleele o loo taua ai. O le lisi lea o le a faatulaga atu.

			<u>Tali</u>	
1.	ario	-	silver	} Tali siaki ai galuega a le fanau
2.	auro	-	gold	
3.	uamea	-	iron	
4.	apa memea	-	copper	
5.	Safaira	-	Sapphire	
6.	soama	-	onyx	
7.	maa tioata	-	glass	
8.	ramata	-	coral	
9.	kapesa	-	crystal	
10.	penina	-	pearl	

O maa taua ia, ia o tamaiti e saili mai o latou igoa faa-Peretania

Tusiga Solo – Tusi mai se solo e tolu fuaiupu ae tai fa laina i le fuaiupu. Ia oa le gagana – “**O le poto ma le mafaufau**”

A’OA’OGA:

1. E sili ona taua le poto ma le mafaufau mai le Alii i loo le oa.
2. O le mata’u i le Alii o le poto lava lea.
3. O le alo ese mai le leaga o le mafaufau lava lea.

.....

ASO SA: 21 IULAI 2019

MATAUPU: O TULAFONO LE MAMĀ
(*Unclean Laws*)

SINI: Ia a’oa’o tamaiti ia malamalama i le lē sa’o ma le lē mamā o tulafono a le au Tusiupu ma le au Faresaio o loo tau faaleaga ai le Alii.

TUSI FAITAU: Mareko 7: 1 – 23

FESOASOANI MO FAIAOGA:

O le au Tusiupu ma le au Faresao, o tagata poo taitai o le lotu Iutaia. O le au Tusiupu, o i latou ia e tusitusia, faamaumau tusitusiga o le tulafono ma a’oa’o le tulafono (Teachers of the Law), a o le au Faresaio, o i latou ia e faamalosia ma fa’aaoga le tulafono e lima taitaiina ai tagata i le olaga faisoo. (Enforcers of the Law), latou te toe iloiloia ma toe faaupu tulafono ina ia talafeagai ma o latou talitonuga (Intepreters of the Law). O tagata ia ua tele ina feteenai ma Iesu e uiga i le tulafono. E le faapea ua tetee e Iesu le tulafono, auā o tulafono na poloai ai le Atua ia Mose ina ia taitaiina ai lona nuu, o lona uiga o tulafono, o le finagalo lea o le Atua mo le tagata.

A’o le mea ua lē fiafia ai le Alii, ua fa’aaoga e le au Tusiupu ma le au Faresaio tulafono, e ta vavae eseina ai le tagata mativa ma le vaivai. Tagata ia ua latou manatu o tagata agasala, e lē aoga ai le tulafono. Ae lē gata i lea ua latou faauiga sēsē le tulafono ma oo atu ai ina faavae e i latou lava isi tulafono, ina ia faatumauiina ai lo latou ola fia mamā. Le mafuaaga lea e lē talia ai e Iesu o latou manatu ma lagona pe a fetai ai ma le Alii.

O le mea ua tupu, ua atuavale ma popole le au Tusiupu ma le au Faresaio, ina ua aave mai tala o le galuega a Iesu. O vavega, faamalologa, fa’aaliga ma ua oo lava ina toe faatutu mai e ua feoti. Ua fai so’o o le Alii, ma ua tele ina mulimuli ai le tele o le motu o tagata, tulaga ia ua manatu ai, nei faoa ai lo latou mamalu

tulaga faa-le-taitai. Ona latou saili ai lea o se mea e faaleaga ai le Alii, e ala i le tulafono. O nisi nei o tulafono lē mamā a le au Tusiupu ma le au Faresaio.

- 1) Aua nei pai i se tagata ma'i po o se tagata ua manua
- 2) E fua le mamao e savali ai i le Aso Sa.
- 3) E lē faia se galuega alofa i le Aso Sa
- 4) E sā ona pisipisia o latou ofu i le toto.
- 5) E lē afaina pe a fasioti e se Iutaia se tagata o nuu ese.

O le fufuluina o lima pe a uma ona taumafa, o le tulafono ua latou manatu e molia ai le Alii. Ao se tulafono e matuai sēsē i le mafaufau o Iesu. O se tulafono ua atagia ai lo latou ola fia mamā. Ua faasa'o e Iesu o latou manatu, e lē o le mea e alu i totonu e leaga ai, a'o le mea e sau mai le loto. Poo le a lava le mamā o le tino, ofu, aulelei o foliga ma mamalu, ae a leaga le loto, e leai se uiga o ia mea.

GALUEGA FAATINO: (Toe faaupu mai le fetalaiga lea a le Alii)

“E leai se mea o i fafo o le tagata e alu ane i totonu ia te ia e mafai ona leaga ai o ia, a o mea e sau mai totonu ia te ia, o mea e leaga ai le tagata.”

Fesili ma Tali:

- 1) O le a le galuega a le au Tusiupu?
Tali: Faiaoga o le tulafono
- 2) O le a le galuega a le au Faresaio?
Tali: Faauiga ma faamalosiā le tulafono

3. E taua le fafano o lima ao lei taumafa?
Tali: Ioe.
4. Faamata e mamā le loto pea māmā lima?
Afai e tali i le Ioe – faamatala, a leai faamatala foi.

A'OA'OGA:

1. Ia faamamā o tatou loto
2. 'Aua le galue i le vaaiga a tagata
3. 'Aua le ola fia mamā.

.....

ASO SA: 28 IULAI 2019

MATAUPU: IA LATOU ILOA O A'U O LE ALII
(They will know that I am the Lord)

SINI: Ia malamalama tamaiti, a aoa'i le Atua i lona nuu o Isaraelu, o le ata vaaia foi lea o le tagata ma le Atua. E ao foi ona malamalama le tagata i le silisiliese ma le mamalu o le Atua.

TUSI FAITAU: Esekielu 6: 1 – 14

O Esekielu o le perofeta o le taimi o le tafeaga o le nuu o le Atua i Papelonia. Na ave Esekielu i Papelonia i le tausaga 597 TLM (Taimi Lumanai le Mesia) i le 11 tausaga a'o lei faatafunaina Ierusalema ma Iuta. E 70 tausaga na faatafea ai le nuu i Papelonia. E 6 tausaga na valoia ai e Esekielu le tafeaga ao lei taunuu ma na fa'aauau pea valoaga a le Perofeta mo le 16

tausaga. E ui ina valoia e Esekielu le faatafunaina o Isaraelu, ae na ia toe valoia foi lona toe fausiaina ma lona toe faaeaina.

A'o lei alu le tafeaga, sa taumafai lava le Perofeta e faailoa ia Isaraelu le mafuaaga o le a faatafea ai. Sa taumafai Esekielu e toe liliu mai loto o le nuu i le Atua, auā ua muamua faatafea ese o latou loto mai le Alii, ae ua lē mafai lava le nuu. Le mafuaaga lea o le a aoai ai e le Atua e auala mai ia Papelonia le aoaiga.

“Ia latou iloa, o au o le Alii.” O le faaupuga leni e faafa ona taua i le mataupu e 6 lea fai ma tusi faitau. Ae 72 taimi o loo taua ai i mataupu e 27 mai le 48 o mataupu o le tusi a Esekielu. O le fa'aaoga ai e le Atua o Papelonia ma isi malo mo lona finagalo mo Isaraelu, o le faailoga lea o le Atua o ia o le Alii mo malo uma o le lalolagi. E le gata ina iloa e Isaraelu, ae faapea foi atunuu uma, “Ia latou iloa, o au o le Alii.” O le faatafunaina ai e le Atua o le laueleele uma o Isaraelu o:-

- mauga ma atumauga
- vaitafe atoa ma vanu
- fata faitaulaga ma tupua
- o mea e nonofo ai ma laau
- o le tagata ma lona loto mulilua

“Ia latou iloa o au o le Alii.” Ua ae i mauga ma ifo i vaitafe ma vanu le ola tapuai o le nuu i tupua. Ua fa'aaoga fata faitaulaga e osi ai taulaga manogi i atua o nuu ese. O mea e nonofo ai, ua natia ai tupua itiiti ua ta, ma ua faaufiufi ai le amio leaga. E le gata i lea, ae ua latou mulilua i la le tino, ae ua mulilua foi o latou loto i tu ma aga o nuu ese. O mea uma ia, o le a faatafunaina, ina ia iloa ai foi e atumauga ma mauga, o vaitafe ma vanu, o laau ma laueleele, “O au o le Alii.”

E matautia le toasa o le Alii o le a oo ia Isaraelu. Ae e lē o le finagalo o le Atua ina ia faapologa lona nuu. Ae ia iloa e Isaraelu le mea moni e manuia ai, ua na o le Atua. Aua nei taumatemate le loto o le tagata i le Atua, e fa'aalia le finagalo o le Atua i so o se

mea o le natura, e oo lava i malo tetele o le lalolagi. A latou (Isaraelu) iloa le Alii, ona ola lelei lea ma filemu. Aua nei na ona iloa i upu ae ia iloa i le tino, mafaufau, agaga ma le loto, o le tagata atoatoa.

GALUEGA FAATINO:

Fesili ma Tali e fa'aaoga ai le Tusi Paia.

O nisi nei o mataupu e 5 mai le tusi a Esekielu, o loo maua ai le faaupuga leni “Ia latou iloa o a'u o le Alii.” Saili mai pe faafia ona fa'aaoga i totonu o mataupu nei e lima.

Mataupu	Tali
Esekielu Mt 20	6
Esekielu Mt 25	5
Esekielu Mt 29	4
Esekielu Mt 30	4
Esekielu Mt 39	5
Fesili ma Tali	

1. E fia tausaga na faatafea ai Isaraelu i Papelonia?

Tali: 70 tausaga

2. O le a le tausaga na oo ai Esekielu i Papelonia?

Tali: 597 TLM

3. E fia tausaga na valoia ai e Esekielu le faatafunaina o Isaraelu?

Tali: 6 tausaga

4. O le a le matua o Esekielu na avea ai ma Perofeta?

Tali: 30 tausaga

5. “Ia latou iloa o au o le Alii.”
(Faamatala mai i au lava upu)

A’OA’OGA:

1. Ia iloa le Alii ma le loto talitonu atoatoa.
2. O le Atua, e toatasi lava le Alii.
3. E leai se mea e sili atu i le Atua.

.....

MANATU TAIALA O AOKUSO: E TASI LAVA LE ATUA
(There is only one God)

E ese le pologa o le Atua e tau faatulaga lona nuu o Isaraelu. O le fausiaina o lona tala faasolopito, folasia lona laueleele, lona faasinomaga o ia o le feagaiga. A’o lona mamalu sa leoleo ma puipui le Atua ina ia ‘aua nei faoa. A pau Isaraelu ona faatu lea e le Atua. A aoai foi le Atua, e aoai i lona alofa. Ae paga lava le nuu, e alalaga ma tautau le suafa o le Atua, ae ifoifo o latou loto i atua mamate ma atua o nuu ese. Faamata o i tatou lava lea. Fetalai le Atua, “O au o le ola, ma e ola pea.” E leai lava se atua e tutusa ma le Atua, o le na faia le lagi ma le lalolagi atoa ma le tagata.

.....

ASO SA: 4 AOKUSO 2019

MATAUPU: O MEA E MANAO AI LE ATUA
(What God requires)

SINI: Ia malamalama le vasega i le mea e lē fiafia ai le Atua ma mea e manao ai le Alii. E ita le Atua i le agasala ae alofa i le tagata agasala.

TUSI FAITAU: Mika 6: 1 – 8

FESOASOANI MO FAIAOGA:

E tolu lava mea taua o loo agai ai tusitusiga a le Perofeta o Mika. (1) Faamasinoga (2) Faamoemoe (3) Alofa Faamaoni. O faamasinoga a le Atua e mafua ona o taitai o le nuu o le Atua, i lo latou ola soona fai ma le tetee. O le vaai maualalo i e matitiva, manatu faapitoa ma le ifo i tupua. O agasala ia ua aafia ai ma tagata lautele. Ae ui lava ina faamasino e le Atua lona nuu, ae ua valoia foi ma le faamoemoe o le manuia. O le mamafa o le faamasinoga a le Alii i lona nuu, o le a tele foi le manuia o Isaraelu o le a maua i lona faaeaina e le Alii. O fili uma o Isaraelu ia sa agaleaga i le nuu, o le a faaumatia e le Atua i lona toasa. O le ata vaai lea o le alofa faamaoni o le Atua i lona nuu ma lana feagaiga.

Ua molia e le Atua Isaraelu i le faamasinoga. Ua fetalai le Atua i atu mauga ma faavae tumau o le lalolagi sei fai ma molimau o le faamasinoga. O moliaga ua molia ai e le Atua lona nuu, o le agasala soo ma le liliu ese soo o o latou loto mai le Alii. O atu mauga ma faavae tumau, o mea ia na iai i le amataga ma na latou molimau i vavega tetele ma le alofa faamaoni o le Atua ina ua ia aumaia lona nuu mai le nofo pologa sa iai i Aikupito. Na molimau foi i le faamaoni o le Alii, ina ua ia faamanuia ia i latou, ao manao nuu ese e fetu’u ma faamalala Isaraelu. Ao atu mauga foi ia na molimau i mea maualuluga na ifoifo ai le nuu i tupua, ma osi ai taulaga i atua o nuu ese.

Ua tulai le nuu i luma o molimau, ae ua le mafai ona finau atu i so latou sa’o, auā e tonu ma faamaoni mea ia ua molia ai e le Atua. Ona tausaili lea o ni auala ma ni mea e faamalie ai le Alii. O taulaga manogi ma mea lelei. O le ulumatua ma fanau e fai ma togiola o a latou agasala. Pau lava le mea e manao ai le Alii, e pei ona faamatala e le perofeta o Mika (1) Fai le amiotonu (2) Naunau i le alofa (3) Ia feoi ma le Atua ma le loto faamaualalo. O mea foi ia e manao ai le Atua mo i tatou, ona manuia ai lea o lo tatou ola i aso uma e le aunoa.

GALUEGA FAATINO:

Fesili ma Tali

1. Aisea ua molia ai e le Atua Isaraelu?
Tali: Agasala
2. O a faavae tumau?
Tali: Sami, lagi, vanimonimo, fogaeleele
3. Aisea ua fai ai atumauga ma faavae tumau ma molimau i le faamasinoga?
Tali: O mea ia sa iai i le amataga
Na latou uluai molimau i le faamaoni o le Atua
Na uluai molimau foi i agasala a le nuu.
4. O le a le mea na manao le tupu o Moapi e fai e Palaamo ia Isaraelu?
Tali: E manao e fetuu e Palaamo le nuu o le Atua.
5. O ai le igoa o le tupu o Moapi?
Tali: O Palako

6. O a mea e tolu ia e manao ai le Alii?
Tali: (i) amiotonu (ii) alofa (iii) loto faamaualalo

Fefinauaiga (Debate) **“E alofa le Atua i le tagata agasala”**

A’OA’OGA:

1. E manao le Alii i le amiotonu o le alofa ma le loto faamaualalo
2. E alofa le Atua i le tagata agasala.

.....

ASO SA: 11 AOKUSO 2019

MATAUPU: O LE SO’OTAGA FAALETINĀ MA LE FANAU (*The mother and child relationship*)

SINI: Ia malamalama tamaiti i le taua o le so’otaga a matua ma fanau. Aemaise lava i le so’otaga faaletinā ma le fanau. Ao le taua foi o tinā, ia malamalama ai le fanau.

TUSI FAITAU: Ioane 19: 25 – 27

FESOASOANI MO FAIAOGA:

O le so’otaga faaletinā i le fanau, e afua mai i le manava le so’otaga e taoto vavalalata ai le tagata meamea ma le fatu o le tina.

O le upu tinā e tolu vaega o loo faauigaina ai i le gagana Eperu:

- (i) O le so’otaga faalenatura (natural relationship)

- (ii) O le Ierusalemā i le lagi (heavenly Jerusalem)
- (iii) Tinā – Ua faatusaina ia Papelonia (Babylon) tupuaga o tu ma aga faapaupau

E ese le feteenai o nisi a’oa’oga a Iesu ma le tatou manatu faaletagata i mea o le ola nei. A fua foi i lo tatou so’otaga faaletagata, e taua tele le va o matua ma fanau i so’otaga faaleaiga. Ao lea foi na fetalai le Alii, ia tiai lou aiga, tiai lou tamā ma lou tinā. Ao le upu moni i lo tatou lagona faaletagata, a tupu ni uiga faapea i se fanau, pau lava le tali poo lona taunuuga o le malaia o le fanau.

A’e o le so’otaga faaletinā i le fanau lea lava na faamautu mai e Iesu lona taua tele “Funa e, faauta o lau tama, faauta o lou tinā.”

E lē o le finagalo o le Faaola, ia le taua so’otaga faaleaiga, ao so’otaga e ao ona fesootai ai ia Keriso. Ia fai Iesu ma so’otaga. O le faailoga foi lea o le alofa o le Alii i lona tinā, ma lona uso. Toe faamanatu ai, aua nei motusia le so’otaga lea.

O le tala masani lenei tala i toe taimi o le Alii i luga o le satauro. Po o le a lava tiga ma faigata na oo i le Faaola i luga o le satauro, e lei mafai ona galo ai lona manao ina ia malosi le sootaga faaletinā ma le fanau. Aua foi o le so’otaga e afifi i le alofa faavalea o le tinā. O le sootaga e le mafai e le oti ona motusia, pe afai e talitonu atoatoa i le Alii. O le fai ai o Keriso ma sootaga i totonu o aiga, e maua ai le filemu ma le leleiga o aiga.

“Faauta o lou tinā” O le finagalo lea o le Alii mo le fanau. Aua nei avea le potu ma le atamai e galo ai lou alofa i matua. Tele ia o fanau ua faalala lo latou aiā tatau, ma oo ai ina motusia sootaga faaletinā i le fanau. Ia manatua, tausaga e tele na pologa ai le tinā e tauave ma tausii le ua iai lona fatu o le alofa. Tinā aua nei vaivai lou alofa i lau fanau “Sena e, faauta o lau tama/faauta o lou tinā.”

GALUEGA FAATINO:

- Ia faatino e le vasega le tala
- A maea ona tusi mai se solo e tolu fuaiupu ae tai fa laina. **“O lou tinā”**

A’OA’OGA:

1. O le aia tatau sili a le fanau o le “ava i matua”
2. Ia faamalosi sootaga faaletina ma fanau e ala ia Keriso.

.....

ASO SA: 18 AOKUSO 2019

MATAUPU: UA TALA MAI LE LAGI LE MAMALU O LE ATUA *(The heavens declare the glory of God)*

SINI: Ia malamalama tamaiti, o mea uma na foafoa e le Atua, o mea ia e fa’aalia ai le mamalu ma le silisili ese o le Atua.

TUSI FAITAU: Salamo 19: 1 – 10

FESOASOANI MO FAIAOGA:

Tele ia o mau eseese o nuu ese anamua i Sasae tutotonu (Ancient Near East/Middle East) e uiga i le mafuaaga na maua ai le lagi, vanimonimo ma le lalolagi. E taoto a latou tusitusiga i tala tuu. Ae faamamafa nei tala tuu i le taua ma le uiga aogā o mafuaaga na mafua ai ona faia ia mea (consequences of purpose). O le

talitonuga o tala tuu, o le mafuaaga o nei mea uma, o loo taoto ai le malosi o atua eseese.

A’o suesuega faaneionapo, e ave le faamamafa i le faapogai ma le tupuaga o nei mea, o le lagi, vanimonimo ma le lalolagi (consequencs of structure). A’o nei suesuega e faalagolago i tulafono faalenatura (laws of nature). Ae poo le a lava nei tala tuu ma suesuega faanaionapo i tulafono faalenatura e oo loa i le ola ma le Atua gata le iloa o le tagata.

O le uiga lea o le pese a Tavita, o le pese e vivii ai le fai-salamo i le matagofie ma le silisiliese o le Atua na ia foafoa ai mea uma i le lagi ma le lalolagi. O loo vivii i le atoatoa ma le malosi o le Atua (The perfection and power of God)

E leai se gagana, e leai se leo.” E le tau alagaina se faailo e faailoa ai le Atua i le lagi ma le lalolagi, lea e molimau ai le vanimonimo i le ao ma le po. Le malamalama ua oo i tuluiga uma o le lalolagi, o le masina ma fetu, fepulafi, o le la ma ao gasolosolo, ua oo i tuluiga o le lalolagi. Le lalolagi e tului e leai sona gataaga. O le ata vaaia lea o le Atua.

O mea ia e lei oo ai le malamalama o le tagata. I tala atu o le lagi, o loo gaioioi ai le Agaga Paia o le Atua. O le lagi ma le lalolagi, o le vanimonimo, o mea ia o le tala i le mamalu o le Atua, i aso uma o le ola. Ao le tagata, o le molimau sili lea, auā o ia ua vaeluaina ai le Agaga o le Atua.

GALUEGA FAATINO: Fesili ma Tali:

1. O ai na tusia le Salamo lenei?
Tali: O Tavita
2. “Tuluiga o le lalolagi” O le a lona uiga?
Tali: O le lalolagi, e leai sona gataaga.

3. “E leai se gagana.” O le a lona uiga?
Tali: O le mamalu o le Atua, e fa’aalia i le matagofie o mea uma o le natura, e le tau faamatalaina i ni upu o se gagana.
4. “E mama le mata’u i le Atua.” O le a le uiga o lea fuaitau?
Tali: Ia ola mama le tagata i luma o le Atua.
5. “E tonu feau a le Alii, e faafiafia ai le loto.” O le a lona uiga?
Tali: E manuia le tagata e usita’i ma faalogo i le finagalo o le Atua.

A’OA’OGA:

1. E molimau mea uma i le lagi ma le lalolagi i le mamalu o le Atua.
2. O le tagata o le molimau sili lea i le mamalu ma le silisili ese o le Atua, pe a ola mama.

.....

ASO SA: 25 AOKUSO 2019

MATAUPU: ALOFA I OU FILI (*Love your Enemies*)

SINI: Ia malamalama le fanau i le taua o a’oa’oga a Iesu i le uiga moni o le loto faamagalo e ala i le alofa atu i e ua ita mai poo e ua avea ma o tatou fili.

TUSI FAITAU: Luka 6: 27 – 36

FESOASOANI MO FAIAOGA:

E pei lava ona tatou faitau i le tele o a’oa’oga a Iesu mai le Tusi Paia, e iai a’oa’oga e faigata ona tatou talia pe a fua i le tatou ola faaletagata ma mea e tutupu mai. Tasi lenei vaega o a’oa’oga e faigata ona tatou faatino, o le alofa atu i le ua ita mai, poo le faamagalo atu i le ua agaleaga mai. Ae le gata i lea, e le faigofie foi ona tatou faamanuia atu i e ua faamalala mai. E iai le fuaitau e masani ona tatou faalogo ai, aua e te faia se mea i isi tagata, e te le manao e fai mai e isi tagata ia te oe.” Ao le a’oa’oga lenei a Iesu, e faavae i le tulafono auro a le Alii (Golden Rule) “Ia e alofa atu i le Alii ma lou loto atoa, manatu atoa, ola atoa ma lou malosi atoa. Ia e alofa atu foi i le lua te tuaoi, e pei o oe lava ia te oe.”

O le avea ai o le tagata e fai ma fili, e iai lona mafuaaga. E mafua ona ua faia se mea leaga ua aafia ai oe, o se ua pele ia te oe, poo lou aiga foi ma le fanau. O mea ia e faigata ona faagalo pe faamagalo foi. Ao le ita mai foi o le tagata, ia te oe, e mafua ona o le vaai mauualalo, o le faailoga tagata o le ola faamaualuga, poo ua mafua foi o se mea ua e faia ma ni amioga foi ua ia te oe e le fiafia ai. O le auga uma o nei a’oa’oga, e manao le Alii i le filemu i le va o tagata.

- i) Ia e alofa atu i e ua fai outou mo latou fili.
- ii) Ia agalelei i e o ita mai.
- iii) Ia faamanuia i e fetuu mai.
- iv) A po mai liliu iai le isi alafau.

A tatou tau sailiili loloto i nei a’oa’oga e umi se taimi ma oo ai ina lavelave i manatu ma lagona. Ao le mea taua lava o loo taumafai Iesu e faapupula mai. O le alofa e faatupuina ai le

filemu, ao le alofa foi lea o loo fetalai ai le Alii i le vaega lenei o le tusi, o le alofa e ofo fua atu, e le fuaina i se ua alofa mai, poo ua agalelei mai. Ia tatou manatua le fetalaiga a Iesu e ala i lana lauga faa-amuia. “Amuia e faatupuina le filemu, aua e taua i latou o atalii o le Atua.” O le filemu tatou te maua pe afai tatou te alolofa i o tatou fili.

GALUEGA FAATINO:

Tuu le avanoa i tamaiti, e lisi mai ai ni faafitauli e masani ona tutupu ia te i latou i totonu o aoga, aiga ma le nuu. A maea ona taitasi ma lau mai ona faafitauli, ona faatalatalanoa lea o ni auala e fofu ai nei faafitauli ma lau susuga i le faiaoga.

A’OA’OGA:

- 1. Ia e alofa atu i e o ita mai.
- 2. Aua e te teufatuina se leaga o se tagata.
- 3. Ia faamaoni lou loto faamagalo.

.....

MANATU TAIALA SETEMA: O AAFIAGA O LE TALA LELEI

O le Tala Lelei a Iesu, ua faaolaina ai agaga o tagata ua latou talia le faatuatua i le Atua ma lana faaolataga, mo le lalolagi uma. Ua suia le fetaua’i, ma le feitaga’i ua aveesea foi tu ma aga faapaupau, a ua pulea e le Agaga o le Atua loto o tagata uma.

ASO SA: **1 SETEMA 2019**
(ASO SA TALA LELEI)

MATAUPU: **E MATAGOFIE VAE O Ē AUMAI LE TALA LELEI**

SINI: Ia a’oa’o le vasega ina ia malamalama, e matuā matagofie i luga o mauga i le vaai vae o lē ua fai le Tala Lelei.

TUSI FAITAU: Isaia 52: 7 – 12

FESOASOANI MO FAIAOGA:

E mafua mai le faaupuga leni, “E matuā matagofie i luga o mauga o vae o ē aumai le Tala Lelei.” A sii taua Isaraelu e tau ma isi nuu o Palesetina, e nofo tapuai le nuu ma faasagasaga i luga o mauga. Ua fia vaai atu ia i se tagata o tamoe mai e aumai le tala lelei o le taua.

E iloa mamao atu lava e le nuu le ituaiga tamoe o loo tamoe mai ai le tagata o loo aumai le tala. E oo mai loa le na aumai le tala fiafia ua manumalo Isaraelu i le taua, ona faapea lea o tala a tagata, “E matuā matagofie i luga mauga vae o ē aumai le Tala Lelei.”

O le uiga o le fa’aaogaina e le tusitala o le tusi a Isaia o le faaupuga lea, “E matua matagofie i luga o mauga vae, o e ua fai mai le Tala Lelei.” E pei ona matagofie ma logo i tino matagi lelei le tala ua fai mai, ua manumalo Isaraelu i le taua; Ua faapena ona logo lelei foi i loto ma mafaufau o Isaraelu, o pologa ma faatafea i Papelonia, le Tala Lelei ua folafola mai e le Perofeta o Isaia; ua logologo mai le manuia, ua tala mai le Tala Lelei, ua faailoa mai le olataga, ua fai mai ia Siona. O loo pule lo latou Atua.

O tagata vaai foi, ua tofofi latou te leoleo ma taitai le nuu o Iuta i totonu o Papelonia, ua leo tetele ma alalaga faatasi, aua ua latou iloa, latou te toe faafesagai lava pe faafoisia Siona e le Alii.

O Ierusalemā foi le aai ua faatafunaina, e toe atiae ma faafouina e le Alii, ma afio ai e pei ona masani ai i aso muamua, aua ua toe faatauina mai Ierusalemā. O mea tāua o le malumalu i Ierusalemā na aveesea e Papelonia e toe faafoisia mai. Ia tulai ia Isaraelu, ma o ese mai le nuu o Papelonia faapaupau, ‘aua nei papai atu i se mea leaga. Ia mamā outou o e tauave ipu a le Alii. O le latou o ‘ese foi mai Papelonia, e le pei o le o ‘ese mai a Isaraelu mai Aikupito, sa faatalise ma faanana. A o le o ‘ese mai Papelonia i le pule a le tupu o Metai ma Peresia o Kuresa le sili, e tuu malie mai. E toe foi ma tauave ipu o le malumalu o le Alii i Ierusalemā na aumaia e Nepukanesa le tupu o Papelonia.

O se tala logo lelei i loto o Isaraelu i Papelonia, ma ua latou faaupuina ai faapea o e na aumaia leni Tala Lelei, “E matuā matagofie i luga o mauga vae o ē aumaia le Tala Lelei.

Le fanau, o tatou o ‘ave feau o le Tala Lelei. E matua matagofie i luga o mauga vae, o tatou le fanau i le vaai a matua, o le aiga, le nuu ma le Ekalesia pe a oo mai le Tala Lelei, ua ausia e outou le fanau le poto i a’oa’oga o le poto salalau. E ola finau i le amio pulea, toaaga i lotu ma galulue e atia’e mea lelei i totonu o le aiga, nuu ma le Ekalesia.

O le vaai lava a matua ma aiga ma logo lelei i o latou loto le Tala Tala Lelei ua outou logologo mai, o le lagona o le fiafia ma le olioli e i totonu o latou loto ma faapea atu, E matua matagofie i luga o mauga vae o nei fanau ua latou aumai le Tala Lelei. E faapena foi le matagofie i luga o mauga vae o Viliamu ma Papu na tala mai le Tala Lelei ia Iesu ua tatou oaoa ai nei i faleseu i manuia o le Atua.

O le tatou vaai i aao na tutui i fao, ma lona ao na faapaleina i le pala tuitui, o se vaaiga matagofie i le vaai a so o se Kerisiano faatuatua. Aua o vae na aumaia le Tala Lelei o le faaolataga mo

le lalolagi atoa. O le vaaiga i le Keriso na faasatauroina ma le vaaiga i le Keriso toetu manumalo mai le oti, o vaaiga sili lava lea i Kerisiano uma. Faafea ai a latou faaupuga’ “E matua matagofie vae o e aumaia le Tala Lelei.

GALUEGA FAATINO: Fesili ma Tali

1. O ai lea e ona le faaupuga lea “E matagofie i luga o mauga vae o e tala mai le Tala Lelei?
Tali: O le perofeta o Isaia
2. O le a le uiga o le olataga a le Atua ia Isaraelu i Papelonia?
Tali: O le saolotoga mai le pologa ona o le faatafea ai i Papelonia ua latou fiafia ina ua latou iloa, o loo afaatasi pea le Atua ma i latou.
3. O a mea paia na aveesea e Nepukanesa lea ua toe faafoi mai e Kuresa le sili?
Tali: O ipu auro o le malumalu i Ierusalem.

PESE: Pese & Viiga 185 (Talai le tala moni)

A’OA’OGA:

1. Ia fiafia e fai oe ma tagata e talai atu le Tala Lelei.
2. O le amio lelei e na te logologo atu le Tala Lelei.
3. Ia talia lelei Iesu Keriso, ma ola ai i aso uma.

.....

ASO SA: 8 SETEMA 2019

MATAUPU: UA SALALAU LE TALA LELEI I NUU ESE

SINI: Ia a’oa’o le vasega ina ia malamalama i le mafuaaga ua salalau atu ai le Tala Lelei i nuu ese ma le lalolagi uma.

TUSI FAITAU: Galuega 8: 26 – 39

FESOASOANI MO FAIAOGA:

O le aso Penetekoso, ina ua mavae aso e sefulu talu ina afio a’e Iesu i le lagi. Sa tumu le aai paia i tagata eseese mai nuu mamao. Na faafuasei mai lea o le taalili mai le lagi, e pei o le matagi ua agi tele mai, ua tumu ai le fale sa i ai le ‘au so’o o Iesu. E le gata i lea a’o laulaufaiva e pei o le afi ua vaevaeina, ua nofo i luga o le au soo taitoatasi. Ua faatumuina i latou i le Agaga Paia, ua mafai ai taitoatasi ona tautala le tagata i lana lava gagana ma gagana a nuu eseese sa potopoto ai i le Aai Paia. Ua maua le loto tele e Peteru ma le ausoo, ua tulai ai Peteru ua lauga atu ma le leo tele. Ua faapea atu, ua taunuu i le aso nei le valoaga ua taua e Ioelu (Ioelu 2: 28 & 29) Ua liligi ifo le Agaga Paia ia te i latou, a o le ua foa’iina le Agaga Paia, o Iesu Keriso lea na faasatauroina e i latou. Ua taunuu foi upu a le Salamo 16: 8 – 11. “O le Atua, ua le tuua lona tagata paia i le tuugamau ia oo ina pala. O faailoga ia ma upu ia, na vaaia ma faalogologo i ai le motu o tagata ua tumu atu i le aai paia, na tuia o latou loto, ma fai mai ia Peteru, se a se mea e tatau ona latou faia? Ua fai atu le au Aposetolo, “Ina salamo ia, ma taitasi ma papatisoina i le suafa o Iesu Keriso ma le faamagaloina o agasala.

A o le lauga foi lea a Peteru na liliu ai nifo o le au ositaulaga ma le au tusiupu o le lotu Iutaia, na afua ai ona latou sauaina le au Aposetolo ma tagata ua talitonu ia Iesu Keriso, ina ia 'aua nei toe tautauina le suafa o le Faaola o Iesu. Na afua ai ona salalau le Tala Lelei i le lalolagi.

Ua faasaga Peteru ma Ioane e o atu i isi aai o Samaria, ona la toe foi lea i Ierusalem. A o Filipino ua auina atu o ia e le agelu i le itu i toga i le ala i Ierusalem e oo atu i Kasa. Ua i ai Filipino i le ala, ona vaai lea i se kariota ma se tasi o tietie ai, o loo faitau i le tusi a Isaia. O le alii leni o le Aitiopo o le auauna sili a Kanake le tupu fafine o Aitiopo. Na sau o ia i Ierusalem e tapuai i le Atua, i le ua foi atu i lona nuu. O le leo mai le lagi na poloai ia Filipino, ia faatasi o ia ma le alii i le Kariota. Ua faitau e le alii ni upu mai le perofeta o Isaia (Isaia 53: 6 – 7). Ua fesili Filipino i le alii, “Pe ua e lagona ea mea ua e faitauina? Ua tali mai le alii ua faapea; Ou te mafai faapefea pe a le faasino mai e se tasi ia te au. I le ua fai mai o ia ia Filipino ia alu ae la te nonofo ma ia.

Ua alu ae Filipino ma faamatala ia te ia le uiga o ia upu a Isaia, ua faasino tasi ia Iesu le Mesia. Ua talai atu ia te ia le Tala Lelei i le maliu o Iesu, ma lona toetu nai e ua oti ma lona afio ae i le lagi. Ua faalogo i ai le eunuka, ona tupu ai lea o lona talitonu i le mataupu a Iesu, ma le fia papatisoina o ia. Ua la oo i le tasi vai, ona fesili mai lea o ia, pe i ai se mea e vaioa ai o ia, aua le papatisoina o ia? Ua o ifo i laua ma Filipino ma i le kariota e o i le vai, ua papatisoina ai o ia e Filipino. Ua uma le sauniga o le papatisoga, ona segia lea o Filipino e le Agaga ua le toe iloa o ia o le eunuka ona alu lea o ia i lana malaga i Aitiopo ma le olioli.

Ioe, le fanau e, ua oo mai ia i tatou leni Tala Lelei. Na aumai e misioanare ma ua tatou talia, E tataua ona tatou talia, aua e faaolaina ai i tatou i le ola faavavau. O le tala a maua i o tatou loto ma agaga, ona fai lea ma tatou mea fiafia e faasalalau atu isi tagata leni tala ona maua ai lea lo tatou ola filemu i aso uma..

O lo tatou Faaola o Iesu Keriso, o le Alo pele e toatasi o le Atua, ua afio mai e ofoina atoa mai lona soifua paia, ina ia tatou maua le filemu moni faavavau.

GALUEGA FAATINO:

Fesili ma Tali:

1. O ai leni tagata o Filipino o loo taua i le tala?
Tali: O Filipino o le tiakono na filifia e le au Aposetolo le faasinoga a le Agaga Paia, faatasi ma isi e toaono e gafa ma le tufatufaina o oloa mo tagata o le Ekalesia.
2. O ai lea tagata o le eunuka o loo taua i le tala?
Tali: O le eunuka o le tagata e leai ni lagona fia fai toalua, o le mea lea e faafaigaluega ai e tupu i totonu o latou maota i tofiga maualuluga.
3. O le mataupu e fia ma fuaiupu e fia o le tusi a Isaia na faitauina e le eunuka?
Tali: Isaia 53: 6 – 8

PESE: Pese ma Viiga 247

A’OA’OGA:

1. Ia fiafia e talai le Tala Lelei ia Iesu
2. Ia talia Iesu ma salamō mai agasala uma
3. Ia faitau le Tusi Paia i aso uma.

.....

ASO SA: 15 SETEMA 2019

MATAUPU: E LE FAAMĀINA SE TAGATA FAATUATUA IA KERISO

SINI: Ia a’oa’o le vasega ina ia malamalama e lē faamāina se tagata faatuatua ia Keriso.

TUSI FAITAU: Roma 10: 11 – 13

FESOASOANI MO FAIAOGA:

O le vaega o le tusi a Roma 10: 11 – 13, ua fai ma tatou mataupu i lenei Aso Sa, ua faailoa atu e le Aposetolo o Paulo i tagata uma, o lē e talitonu ma faatuatua, ma valaau ma tautau atu le suafa o Keriso, e faaolaina. Auā o le faaolaina, e manaomia lou faalogo ma talia le Tala Lelei i le faatuatua, ia folafola atu le Tala Lelei ma ia usitaia ma ola ai i aso uma. Auā e lē faamāina ai se tagata i le Tala Lelei ia Keriso Iesu, ae na o le olioli e tupu ae i aso uma. O loo naunau le loto o le Aposetolo o Paulo mo le faaolataga mo tagata Iutaia. Ua ia faamalosi atu ai i Iutaia o nonofo ma atiae le Ekalesia a Keriso i Roma. Ia talia le Tala Lelei i le loto faatuatua, ia ta’uta’u ma folafola atu le suafa o Keriso ma usita’i i ai ma ola ai i aso uma. Aua o le Tala Lelei e le faamāina ai se tagata, ae faaolaina ai tagata uma, e valaau i le suafa o Keriso. Ua sii mai ai e le Aposetolo o Paulo, mai le tusi a le Perofeta o Isaia 49: 23. “E le faamāina i latou o e faatalitali i le Atua.” O ai lava e faatuatua ma talitonu i le suafa o Iesu Keriso e le faamāina. E lē masalosalo i lona faamoemoe, e le mā i lona mautinoa, auā ua ia te ia le faatuatua o le faailoga o mea ua lē vaaia. O le faaolataga e le faapitoa mo Iutaia, ae mo tagata uma ma le lalolagi uma. E tasi lava le auala faigofie ua taoto mai mo tagata uma mo le faaolataga ia faatuatua i le Alii o Iesu Keriso,

auā o le Alii lava na Ia faia mea uma i le amataga, o loo ia pulea mea uma lava, ma o loo matua tamaoiga i le alofa mutimutivale ma lona alofa tunoa mo i latou e valaau atu ma ta’uta’u atu lona Suafa.

Le fanau e, o le Suafa o Iesu Keriso lo tatou Faaola tatou te ta’uta’ua ma talai atu, e faaolaina ai i tatou. O le Suafa o Iesu Keriso, e na te faaeaina oe mai le olaga maualalo, e fai ma tagata e amanaiaina. Aua o le suafa e le faamaina se tagata, ae o le suafa e na te faasaoloto i tatou mai le puapuaga ma mafatiaga. E na te aumaia le olioli ia i tatou i aso uma.

O Iesu Keriso o le Atua ua liutino tagata, ina ia iloa e tagata le faamoemoe o le Atua mo i latou. E moni o loo tatou ola, a ua tatou oti i le agaga. O le afio mai o Iesu Keriso i le lalolagi, e faailoa mai ia i tatou e na o lona Suafa e talitonu ma faatuatua i ai, e tatou te faaolaina ai. O le Suafa e aveesea lo tatou faalumaina, a ia fai i tatou ma tagata ua fiafia mai iai le Atua.

Afai e tautino lo tatou faatuatua ia Iesu Keriso, o le Alii ma le Faaola o tagata agasala, ma talitonu ma le loto atoa, o le Atua na toe faatuina mai o Ia mai le oti, ua fa’aalia mai foi lo tatou talia o le togiola, e faaolaina ai i tatou i le amiotonu a Iesu Keriso. Ioe, e lē faamāina se tagata faatuatua ia Keriso.

GALUEGA FAATINO:

Sei tau mai ni amio ma ni faatinoga e iloa ai ua e talitonu ma faatuatua ia Iesu Keriso.

1. Tatalo i aso uma i le taeao ma le afiafi.
2. Ia usitai i matua i taimi uma.
3. Ia toaga i le aoga Aso Sa, ma le lotu i Aso Sa uma.
4. Ia ‘aua le tala pepelo.
5. Ia amio lelei i aso uma.
6. Ia alofa i tagata uma.

7. Ia fa'aaloalo ma amio pulea i tagata uma.
8. Ia e alofa i le Atua ma lou loto, ma le agaga ma le malosi atoa.

PESE: 134 (Pese ma Viiga)

A'OA'OGA:

1. Ia fiafia e ta'uta'u le Suafa o Iesu Keriso.
2. Ia toaga e tatalo e tupu ai le faatuatua
3. Tatou te faaolaina i le Suafa o Keriso.

.....

ASO SA: 22 SETEMA 2019

MATAUPU: O LE FALE TATALO

SINI: Ia a'oa'o le vasega ina ia malamalama o le fale tatalo, o le falesa po o le malumalu.

TUSI FAITAU: Mareko 11: 15 – 19

FESOASOANI MO FAIAOGA:

O le malumalu i Ierusalem, ua taua i le gagana Eleni, o le Hieron, o le nofoaga paia. O le igoa atoa lea o le malumalu. Ua vaevaeina le malumalu i ona vaega, e pei o le vaega mo tagata o nuu ese, ma Iutaia foi. E i ai le puipui ma laulau o i ai, o le faailoga e le mafai ona pasia e tagata o nuu 'ese, afai e pasia o le iuga o le oti le faasalaga. O le faamoemoe la mo le vaega lea, o tagata o nuu ese ma Iutaia mo tatalo ma le loto ua naunau e mafuta i le Atua. A o le atoaga o le malumalu i Ierusalem ole

ola tapuai o Isaraelu ma tagata o nuu ese i le Atua ina ia faaolaina o latou agaga.

Fai mai le mataupu e 11 o le tusi lava lea a Mareko fuaiupu e 11 ina ua oo le malaga faatupu a Iesu i Ierusalem ua maliu ane o ia i le malumalu ua na silasila solo i mea uma, ua oo i le afiafi ona maliu atu lea o ia i Petania. O lona uiga o le malaga faatupu a Iesu i Ierusalem e aofia ai le asiasiga o le malumalu sei vaai poo a mai le ola tatalo ma le ola tapuai o tagata o Isaraelu.

O le taeao na sosoo ai, ua maliu sao ai Iesu i Ierusalem ma na ia toe asia loa le malumalu. O mea mataga ia ua silasila i ai le Mesia, na tiga ai lona finagalo, ona ia faia lea o le sasa i maea tuaiti ma tutuli 'ese ai ia te i latou uma lava i fafo o le malumalu. Ua fuli atu foi laulau a tagata na faatau lupe, ua sasa'a ifo foi i tupe sa i ai. Ua ia le mafai foi, ina ia ui ane se tasi i le malumalu ma se avega. Ua a'oa'o atu foi o ia ia te i latou, ua faapea atu. E le ua tusia ea, "E taua lou fale o le fale tatalo mo nuu uma, sa matata'u i latou i lona toasa, i le ua tuua le fale. O mea ua faia i totonu o le malumalu, e tatau ona faia i fafo. Ia fa'aavanoa le malumalu mo tatalo ma tapuaiga a tagata i le Atua.

O le vaega o le malumalu o loo tupu ai le mea lea o le vaega e fa'aaoga e tagata o nuu 'ese ma Iutaia e tatalo ai. E pau lea o le vaega o le malumalu e faatagaina ai tagata o nuu ese e tatalo ai. A o lea ua fai ma nofoaga o fefaatauaiga. O lona fale o le fale tatalo mo nuu uma, a o lea ua fai ma ana o fao mea. Ua faoa e le au ositaulaga le tamaoiga o tagata, a ua le fai ma fale o faaolaina ai agaga. O le tele o le galuega faaola a Iesu na faia lava i tua atu o Ierusalem.

O lea ua oo mai i ona aso mulimuli i Ierusalem, ua ia vaaia na o mea mataga. O le fale tatalo, a ua avea ma fale faatauaoa. Ua leai se mea e 'ese ai Isaraelu ma se laau o loo tupu i lau e tele, ae leai ma se fua o maua ai. E tutusa ma le mati na saili atu i ai e Iesu sei ai ai, ae leai se mea na maua i ai. Ua saili mai le Atua i lona

nuu o Isaraelu, a ua latou le iloa o Ia afio mai e ala i lona Alo pele o Iesu.

Ioe, le fanau ia fai ma tatou mea fiafia le fale tatalo o le Atua, ina ia fiafia o tatou loto ia te Ia i aso uma. Ia tuu atu o tatou loto ma agaga ina ia faamamaina e Keriso. Afai tatou te alolofa ia Keriso ma fiafia e vivii ia te Ia, ia faatagaina o Ia e faamama o tatou leaga, ma fuli laulau o mea leaga o loo tatou le manuia ai. Ia fai le fale tatalo ma fale e te fiafia e mau ai.

O Iesu Keriso o lana auupega lea na ia fa'aaoga i lana galuega o le tatalo, ma fiafia e alu i sunako po o malumalu i taimi o lana galuega faaola.

O le fale tatalo o Iesu o lona loto po o le Agaga. Ua na o le Atua lava e ulufale i lona fale tatalo, na mafai ai ona taunuu manuia le faaolataga mo le lalolagi uma. E oo lava i lana manava mulimuli o tatalo pea. O le falesa o le fale tatalo. Ia fai ma o tatou fiafiaga le ulufale i taimi uma i le falesa ma tatalo, aua o le fesootaiga sili ma le mafanafana ma lo tatou Faaola o Iesu Keriso.

GALUEGA FAATINO:

1. Tusi mai e tamaiti se tatalo mo Iesu e faamama o latou loto mai manatunatuga leaga, ma fuli fao laulau o le amio leaga o latou faia.

PESE: Fai le Tusi Paia ma tatalo i aso uma

A'OA'OGA:

1. Ia fiafia e alu i le fale tatalo po o le falesa
2. Ia e toaga e tatalo
3. Ia e fua mai i amio lelei.

.....

ASO SA: 29 SETEMA 2019

MATAUPU: TAPUAI I LE ATUA MA LE FAAMAONI

SINI: Ia a'oa'o le vasega ina ia malamalama i le uiga o le tapuai i le Atua ma le faamaoni.

TUSI FAITAU: Ieremia 7: 1 – 7

FESOASOANI MO FAIAOGA:

Fai mai le tatou mataupu i lenei Aso Sa – “TAPUAI I LE ATUA MA LE FAAMAONI.” O lona uiga, lea na fetalai ai Iesu i le fafine Samaria lea na utu vai i le vaieli. Ioane 4: 23 – 24, “O e tapuai faamaoni latou te tapuai i le Tamā i le agaga ma le faamaoni auā o loo saili le Tamā i e tapua'i faapena ia te Ia. O le Atua o le Agaga lava Ia, o e tapuai ia te Ia, e tatau ona tapuai atu i le Agaga ma le faamaoni. O le uiga tonu lea o le fetalai a le Atua i le perofeta o Ieremia, e tu o ia i le faitotoa o le fale o le Alii, ma tau atu ia luta uma, o e ulu mai i nei faitotoa e ifo atu ai i le Alii. O loo faapea ona fetalai mai o le Alii o au, le Atua o Isaraelu, Ia sauni lelei i o outou ala ma a outou amio, ona ou faatumauina ai lea o outou i lenei mea.

O le mataupu e 7: 1 – 7 o le tusi a Ieremia, ua matua apoapoai atu ai le Atua, i lona nuu o Isaraelu, ua Ia matuā manaomia se nuu e tapuai atu ia te Ia ma le faamaoni. Ua Ia le lavā silasila mai i lona nuu, ua na o le tapuai atu ia te Ia, na o laugutu, a'o amio e faatinoina ua na o le agasala. Ua na o upu, a'o loto ua naunau i tuinanauga leaga o le lalolagi.

‘Aua tou te faatuatua i upu pepelo, o loo faapea, O le malumalu o le Alii, o le malumalu o le Alii, o le malumalu o le Alii lenei. Ieremia 7: 5 – 7, Auā afai tou te matuā sauni lelei i o outou ala

ma a outou amio; afai foi tou te matuā faia le faamasinoga i le tasi tagata ma le tasi tagata; afai foi tou te le faasauā atu i le tagata ‘ese, ma lē ua aumatuā, ma le fafine ua oti lana tane, ma outou lē faamaligi le toto o ē ua le sala i lenei mea, ma outou le mulimuli atu i atua ese e iai le malaia, ona ou faatumauina ai lea o outou i lenei mea, o le nuu na ou foa’iina atu i o outou tamā e faavavau faavavau lava.

O le mea lea ua to’asa ai le finagalo o le Atua i le nuu o Iuta, ua tiga ona fofoga e silasila mai i tapuaiga a tagata a lona nuu, ua na o upu a o amio ma faatinoga, ma loto ua gauai atu i tu ma aga faapaupau a nuu ese. Ua oo foi i atua faapaupau ua latou aumai i totonu o le malumalu ma ifo i ai. Ua na ona alalaga i taimi o tapuaiga. O le malumalu o le Alii, o le malumalu o le Alii, o le malumalu o le Alii, ae mamao a latou amioga ma faatinoga o loo faia i totonu o le malumalu.

Ua fetalai le Atua i le Perofeta o Ieremia, e tu i le faitotoa o le fale o le Alii, ma ta’u atu i tagata uma o e e ulufale e tapua’i, Ia outou sauni lelei i o outou ala ma outou amio, ona ou faatumauina ai lea o outou i lenei nuu. ‘Aua tou te faamoemoe ma faatuatua i upu faaoleole tou te tapuai mai ai ia te au, ua tiga ou fofoga e silasila i ai, ma ou taliga ua le fia faalogo lava i ai. Ia outou fai le amiotonu, ia faatino le alofa i so’o se tagata, ma ia liliu mai i le Atua ma le loto maualalo ma le loto salamo moni, ona maua lea o le faaolataga mai le Atua.

Le fanau e, o le uiga tonu lea o le tapuai i le Atua ma le faamaoni. O le tapuaiga e fai atu i le loto ua na o mea lelei ma le sa’o o i ai, o le loto e fusia i le alofa o le Atua, ma le loto e fiafia e mafuta i le Atua i le loto maualalo ma le salamō moni mai agasala uma. Ia tatou loto fiafia e mafuta ma le Atua, e ala i lo tatou tapuai ma le faamaoni lava ia te Ia.

O Iesu Keriso o le Alii ia o le tapuaiga. Na tapuai i le Atua ma le faamaoni lava. Ua tuuina atu lona loto atoa i le Atua, ina ia faia lona finagalo, ia faaolaina tagata uma ia te Ia. Ua fai o Ia ma

amiotonu a le Atua. O le faatinoga o lona alofa mo tagata uma ua faamagaloina agasala a le lalolagi uma. O lona loto maualalo ua atoatoa ai le faaolataga i lona Toetu mamalu mai le oti ma le tuugamau, ua maua ai e tagata uma le ola faavavau.

GALUEGA FAATINO:

Tusi mai mea e fa o loo faatonu e tatau ona fai e Iuta.

1. matuā faia le faamasinoga i le tasi tagata ma le tasi tagata.
2. e lē faasauā atu i le tagata ese, ma lē ua aumatuā, ma le fafine ua oti lana tane.
3. ‘Aua le faamaligi toto o e ua le sala.
4. ‘Aua le mulimuli atu i atua ese.

PESE: 11 (Pese ma Viiga)

A’OA’OGA:

1. Ia tapuai i le Atua ma le faamaoni
2. Ia ola i le alofa o le Atua
3. Ia fai le amio lelei ma le amiotonu

.....

MANATU TAIALA OKETOPA: O LE ATUA MO TAGATA UMA

E fia faamamafaina i le fanau, ina ia latou malamalama o le Atua e mo tagata uma. E le faailogaina e le Atua se tagata, e tutusa tagata uma i lona alofa tunoa.

ASO SA: 27 OKETOPA 2019

MATAUPU: E TAUA TAGATA UMA I LE ATUA

SINI: Ia a’oa’o le vasega ina ia malamalama e taua tagata uma i le Atua.

TUSI FAITAU: Ruta 4: 13 – 17

FESOASOANI MO FAIAOGA:

O le tatou mataupu i lenei Aso Sa – “E taua tagata uma i le Atua.” Ioe, e moni ma faamaoni lenei uiga matagofie o le Atua. O le faamaoniga o lenei manatu, o le ola o loo tatou tutupu a’e ai, e laugatasia ai tagata uma. O le la, o le timu ma le tele o faamanuiaga a le Atua, e faasoa tutusa i tagata uma.

Afai foi e feagai tagata uma ma puapuaga ma faigata o le olaga, ona tatalo lea ma le faatuatua i le Atua, e mautinoa lava lona alofa tali mai i mafatiaga. O le mea foi lea na tatou iloa i le tala i le aiga o Naomi ma Ruta ina ua toe foi mai Moapi.

Ua filifilia le faaiuga o le tala ia Naomi ma Ruta, e fai ma tatou mataupu i lenei Aso Sa (Ruta 4: 13 – 17), aua o loo fa’aalia ai le alofa faasafua o le Atua, e na te le faailogaina se tagata.

O le tele ia o faigata na fetaia’i ma Naomi i le toe atina’eina o lona aiga i Peteleema. Peitai, ua avea Ruta o le fafine ‘ese mai Moapi na la omai, ua ala mai ai lona fesoasoani mai le Atua. O Ruta ua feagai ma le fatu aiga tausii. Ua saili fesoasoani i le fanua o faatoaga saito a Poasa, o le tagata o le aiga o Naomi, o le tagata e tele ana mea. Ua saili fesoasoani pea Ruta i le faatoaga a Poasa, na fai ma ala o le alofa o Poasa ia Ruta.

Ua fai Ruta ma ava a Poasa, ina ua uma ona uia tu ma aga a Isaraelu i le faatinoga o le faaipoipo atu o Poasa ia Ruta. Ua toe maua uma mai e Naomi ona fanua na aveesea, ina ua o ese ma Elimaleka ma lana fanau tama o Maalona ma Kiliona i Moapi,

ina ua oge Isaraelu. Ua faamanuia foi toeaiina ma tagata o Efarata poo Peteleema ia Poasa ma Ruta. Ua fai mai, ia avea lo oulua aiga e pei o le aiga o Faresa na fanau mai e Tamara ia Iuta, nai le fanau e foa’i mai e le Alii ia te oe i lenei teine. Ua oo ina fanau mai e Ruta le tama tane, ma ua tago Naomi i le tama ua sapai i lona fatafata. A ua vivii mai fafine o Peteleema, “Faafetai i le Alii, ina ua foai atu ia te oe i lenei aso se tasi e auga i ai lou aiga, ia viia lona igoa i Isaraelu.

Ua latou faaigoa ia te ia, o Opeta, o le tama o ia o Iese, o le tama o Tavita. O le gafa lava lea na fa’auau ma tau i le gafa o Iesu Keriso, le Mesia na valoia. Ioe, e taua i le Atua tagata uma. O Ruta le fafine ese mai mo Moapi. O lona alofa ia Naomi le tina o lana tane ua oti, ua ia naunau lava e mafuta pea ma Naomi, ma ua fia fai Atua i le Atua o Isaraelu. Ua filifilia lona tagata ‘ese i totonu o le gafa o Iesu Keriso. Ia ‘aua tatou te faailoga tagata. Ia alolofa soo se tagata, aua tatou te le iloa poo ia tagata tatou te alolofa iai e faamanuia mai ai le Atua ia i tatou.

O le alofa le faatuaoia o Iesu Keriso na afua ai ona afio mai i le lalolagi ina ia lavea’i tagata uma mai le agasala. O lona maliu tiga i le satauro e mo tagata uma ina ia faaolaina ia te Ia. O lona toetu manumalo mai le tuugamau, ua faaolaina ai tagata uma e faatuatua ia te Ia i le ola faavavau.

GALUEGA FAATINO:

Faatino le tala

PESE: Pese ma Viiga 70 (Ua tele le alofa)

A’OA’OGA:

1. Aua le faailoga tagata
2. E taua tagata uma i le Atua

3. Ia alofa i tagata uma.

.....

**MANATU TAIALA NOVEMA: O LE OLA FAITAUAGA
MO LE ATUA**

O le faitaulaga i le Atua, o le faailoga o le tagata ua maua'a le faatuatua. E na te ave ai mea sili i le Atua, aemaise lona loto foa'i i isi tagata o mana'omia le fesoasoani.

ASO SA: 3 NOVEMA 2019

MATAUPU: O LE UIGA O LE TAULAGA

SINI: Ia a'oa'o le vasega ina ia malamalama i le uiga o le taulaga e faia i le Atua.

TUSI FAITAU: Kenese 8: 20 – 22

FESOASOANI MO FAIAOGA:

O le taulaga, o le loto o le tagata e tapua'i i le Atua, e ala i mea ua na maua e faitaulaga ai i le Atua. O le loto o le tagata ua na talia ma tosina lona agaga i le Atua i lona Silisili Ese ma lona matagofie i lona alofa e afua ai ona ia avatu le tapuaiga i le Atua. O le faailoga o le faamaoni o le alofa o le tagata i le Atua, e na te faamuamua ai o Ia i mea uma, e oo i mea uma ua ia maua. E fai taulaga i mea silisili ua ia maua. E tusa pe tau faasoasoa le tamaoaiga pe matitiva, e muamua lava mea sili mo le Atua. E manao e fai ana taulaga i mea taugata mo le Atua.

O le tagata ua talitonu, pe utiuti mea ua na maua e muamua lava mea sili i lona Atua. Auā o le Atua o le mauo'a sili, o le milionea i so o se mea, e na te faamaligi mai lona tamaoaiga mo i latou, e tapuai atu ma fai taulaga ia te Ia i le loto ma le agaga faamaoni lava.

O le tusi faitau ua fai ma tatou mataupu Kenese 8: 20 – 22, o loo faamatalaina mai ai le gaoiga a Noa ina ua ulufafo ma le vaa, le uiga moni o le taulaga.

Ua ulufafo Noa ma le vaa, ma ua tuvae i le lalolagi ua leai ma se mea o totoe o iai le ola. Ua na o Noa ma lona toalua ma lana fanau, ma nai manu vaefa, manu fetolofi ma manu felelei na faasoina mai le loto. Na manatu lava o le a faamuamua i le loto o Noa i le fausia o sona fale e faamautu ai ma lona toalua ma lana fanau. Peitai, ua faamuamua lava e Noa lona Atua ma lona alofa tele, ua faasoina ai o ia ma lona aiga, ma nai mea iti. Ua ia amata ai i le amataga fou o le fausia lea o le fata faitaulaga e fai ai taulaga i le Atua. Ua le manatu Noa i le utiuti o manu vaefa ma manu felelei o i ai le ola e toe faia ai se amataga fou, a ua pipii atu lona loto ma lona agaga i le Atua ma lona alofa silisili ese ma lana pule aoao i mea uma. Ua mafai ai ona faasoina o ia ma lona aiga, ma meaola o iai le ola o totoe mai le loto, e tua i ai lona ola toe tau amata i le lalolagi ua faaleagaina e le loto.

Ua le avea le utiuti o mea o i ona lima, ma mea e taofia ai lona fia faailoa i lona Atua lona loto faafetai ma lona loto fia tapuai, ina ia le motusia lo la fesoataiga mafanafana. Ua filifili e Noa manu vaefa mama ma manu felelei e mama ma fai ai lana taulaga i le Atua i luga o le fata faitaulaga na ia faia.

O le gaoiga muamua lea a Noa mo le lalolagi fou (new world) o le faatinoga lea o le tapuaiga i le Atua, e ala i le ofoina atu o le taulaga ua faia i mea sili ua iai i ona lima. Ua lagona foi e le Atua le nanamu ma le manogi lelei o le taulaga a Noa. Ua le gata i le manogi lelei o le taulaga, a o le mea sili le nanamu lelei i le

Atua, o le loto ma le agaga o Noa, na afua ai ona avatu le tapuaiga e ala i le taulaga.

O le uluai gaiouga a Noa na manuia ai le lalolagi fou. Ua toe tutupu lauusiusi laau ma mea uma ua iai le ola, aemaise le faatoateleina o tagata i le lalolagi. E ui lava ina leaga manatu o loto o tagata e afua mai tamaiti, a ua lē mafai i lona alofa tunoa ma le taulaga na faia e Noa ona taofia ana faamanuiaga mo lana lalolagi fou. Ua finagalo ai le Atua na te lē toe faaoo le malaia i le laueleele ona o tagata, ou te lē toe taia mea ola uma e pei ona ou faia. O aso uma o le lalolagi e lē toe utuva ai o tausaga e lulu ai ma tausaga e selesele ai, o le ma'alili foi ma le vevela, o le vaitoelau, o le vaipalolo, o le ao ma le po. O le uiga lea o le taulaga, ma ona faamanuiaga e maua pe afai i le loto ua pipii mau atu i le Atua. O le taulaga a Aperaamo na ofoina atu ai lona atalii e toatasi o Isaako, na ta'ua ai o ia o le tamā o le au faatuatua.

Le fanau, ave mea sili e faitaulaga ai i le Atua. 'Aua e te vaai atu ua lē lava lau faasoa, ona lē faia lea sau taulaga. Ia fai lau taulaga i mea taugata. E taugata le taulaga e fai mai i lou mativa, ae e te ave mea sili i le Atua, e iu ina e mauoloa ai. E pei o Noa na fai lana taulaga i mea iti na totoe mai i le loto. O le taugata lena o le taulaga a Noa.

O le taulaga na faia e Iesu Keriso, na ofoina mai e Ia o Ia lava e fai ma taulaga mo le faaolaina o le lalolagi. Na matua manogi lelei ma nanamu i le finagalo paia o le Atua. Auā ua avanoa tagata uma ia te Ia ina ua faamāmāina le ola agasala. Ua toe faatuina mai o Ia i le ola atali ma le soifua pea, ua faapena foi i tatou uma ua maua le ola faavavau.

GALUEGA FAATINO:

Fesili ma Tali:

1. Aisea na manogi lelei ai le taulaga a Noa?

Tali: O le taulaga na faia i le loto ua naunau i le Atua.

2. E ta'u mai mea na totoe ina ua mae'a le loto.

Tali: O Noa, toalua, fnau ma taitoalua, manu vaefa, manu felelei, mea fetolofi uma.

3. O le a le gaiouga muamua a Noa na fai ina ua ulufafo ma le va'a?

Tali: Ua faia le fata faitaulaga.

4. O le a le finagalo o le Atua ina ua uma ona faia e Noa lana taulaga?

Tali: E le toe faaoo le malaia i le laueleele ona o tagata.

PESE: Pese ma Viiga 158

A'OA'OGA:

1. Ia faitaulaga i le Atua i mea sili.
2. Ia 'ave le ola mo le Atua, o le taulaga sili.
3. Ia alofa i le Atua ma lou loto atoa.

.....

ASO SA: 10 NOVEMA 2019

MATAUPU: O LE ALOFA E FAATINO I LE LOTO FOAI

SINI: Ia a'oa'o le vasega ina ia malamalama, ole alofa i totonu o le loto, e afua ai ona foa'i mea mo le mativa o le tagata ua puapuagatia.

TUSI FAITAU: Filipi 4: 14 – 20

FESOASOANI MO FAIAOGA:

O le alofa o le Atua ua nofo mau i le loto o le tagata, e afua ai ona foa'i mea ua maua, mo le isi tagata ua puapuagaina i le mativa. O le alofa ua maua'a i totonu o le loto, o le mafuaaga lea o le faia e le tagata o mea lelei uma i lona olaga. O le loto alofa e afua ai ona nofo lelei ma fealofani tagata, o le taulaga e malie i luma o le silafaga a le Atua.

O le tusi a Filipi 4: 14 - 20 ua fai ma mataupu o lenei Aso Sa, o loo faailoa atu ai e Paulo i le Ekalesia i Filipi, lona loto faafetai i meaalofo ua latou foa'i atu mo ia, ao feagai ai ma puapuaga i le falepuipui i Roma.

Ua leva ona manatu le Ekalesia i Filipi e tuuina atu le meaalofo mo Paulo, peitai o lona saisaitia i le falepuipui i Roma ua faigata ai ona momoli la latou meaalofo. Ua manatu ai e tatau ona alu se tagata e momoli meaalofo mo Paulo, ma fesoasoani ia te ia i se mea mo le manuia o le Tala Lelei. Ina ua maua e Paulo meaalofo mai ia Epaferoti ona lagona ai lea o lona loto faafetai. Ua tusi atu, Filipi e leai lava se Ekalesia na alofa mai ia te a'u i le mataupu o le foa'i mai ma le talia o mea, na o outou lava. Na ou i Tesalonia, na outou avatu mea na ou mativa ai, ua atu tasi, ma le atu lua foi. E le ina ua ou saili se meaalofo, a ou te saili le fua e atili ai ona tauleleia ai outou.

A ua ia te a'u mea uma, ua tele lava, ua atoa mea ia te au, ina ua ou maua e mai ia Epaferoti mea mai ia te outou, o mea manogi lelei, o le taulaga e talia ma le malie i le Atua. Ao lo'u Atua e fa'aatoa e Ia ia te outou mea uma e matitiva ai outou, e tusa ma le faula'i o lona viiga, ia Keriso Iesu.

Le fanau, o outou o le lumanai o le Ekalesia, o loo outou maua le loto alofa e mafai ai na outou foa'i atu mea tou te maua e atina'e

ai le Tala Lelei a Iesu Keriso lo tatou Faaola. E mafai ai foi ona tatou foa'i atu ni mea tatou te maua mo le mativa o lana auaua faifeau. Ae le gata i lea tatou te fiafia foi e foa'i atu mea i e o matitiva ma puapuagatia.

Ao faatino le galuega faaola a Iesu i le lalolagi, na ia maua le loto alofa na ia fesoasoani ai ia i latou na puapuagaina i le fia aai ma le mativa. Na faamalolo i e mama'i, na ia toe faatuina mai e na feoti, ma a'oa'o atu le Tala Lelei a le Atua. Na maliu tiga i le satauro, na tanumia i le tuugamau. O lona soifua na sasa'a atoa mai ma foa'i mai mo le faaolaina oi tatou mai le pologa o le agasala.

O lona Toetu mamalu, ua ia aumai ai le ola faavavau mo tagata uma e faatuatua i le faaolataga a le Atua Soifua.

GALUEGA FAATINO:

Tau mai ni mea se tolu na foai mai e le Atua ia te oe.

1. Na faia i tatou i le efuefu o le eleele i lona faatusa paia.
2. Na manavaina mai lona soifua paia ma tatou ola ai.
3. Ua auina mai le Agaga Paia o lo tatou fesoasoani sili.

PESE: Pese ma Viiga 72

A'OA'OGA:

1. Ia maua le loto foa'i
2. Ia e alofa i tagata matitiva
3. Ia e alofa ia Iesu Keriso lo tatou Faaola.

.....

ASO SA: 17 NOVEMA 2019

MATAUPU: E FA'AALI MAI LE ATUA I TAULAGA

SINI: Ia a'oa'o le vasega ina ia malamalama, e fa'aali mai le Atua ia i tatou i taulaga ina ia tatou iloa mea e tutupu i le lumanai.

TUSI FAITAU: Faamasino 13: 19 – 23

FESOASOANI MO FAIAOGA:

O le taulaga na faia e Manoa le tamā o Samasoni, o lona fia maua mai lea i le Atua le mautinoa i mea o le a tutupu mai i lona aiga ma lona toalua faapea ai ma Isaraelu.

Na auina mai e le Atua lana agelu, e momoli mai lana feau ia Manoa ma lona toalua, o mea o le a tutupu mai i lo la aiga i le lumanai. Peitai, e taunuu atu le agelu ua na o le ava a Manoa o iai. Ona faamatala atu lea e le agelu i le fafine o le a fanau mai e ia se tama tane e faaola ia Isaraelu mai le nofo pologa ia Filisitia. Ua foi le agelu, a ua faamatala e le fafine ia Manoa le agelu ma le feau na momoli mai i le Atua.

Ua tatalo Manoa i le Atua e toe auina mai le agelu, e toe aumai le feau, ina ia ona mautinoa mea e tatau ona fai mo le tama o le a fanau mai. Ua toe sau le agelu ia Manoa ma toe faamatala atu mea uma na uluai ta'u i lana ava. Ua fia iloa e Manoa le suafa o le agelu sei vivii atu i ai. Ona fai mai lea o le agelu, “O le a le mea e te fesili mai ai lo'u igoa, aua e silisili ese Ia.

O le afuaga lea o le faia e Manoa o lana taulaga i le Atua. Ia fa'aali mai le Atua i lana taulaga. Ua amio leaga lava Isaraelu i luma o le Atua, ona tuuina atu lea o i latou e le Alii i lima o

Filisitia i tausaga e 40. Faatoa ea lava lo latou pologa ia Filisitia i le taimi na tulai mai ai Samuelu e fai ma Ositaulaga.

O le fa'aaliga i le fanau mai o Samasoni e pei o le feau a le agelu ia Manoa, o le amataga lea o fuafuaga a le Atua mo le faavaivaiina o le malosi o Filisitia. O le vaega o le tusi o Faamasino 13: 19 – 23 o le taulaga lea ua faia e Manoa, ina ia mafai lava ona maua lona mautinoa mai le Atua, e uiga i le feau ua momoli mai e le agelu. Ona ave lea e Manoa o le tama'i oti atoa ma le taulaga i mea e ai, ua ia faitaulaga ai i luga o le papa i le Alii, ona fai ai lea e le agelu o le vavega a'o matamata ai Manoa ma lana ava, ua alu ae i le lagi le mumū o le afi ai luga o le fata faitaulaga ona alu a'e lea o le agelu a le Alii i le mumū o le afi o le fata faitaulaga, a'o matamata ai Manoa ma lana avā, ona faō ai lea o i laua i le eleele.

Ioe, e faailoa mai loa e le Atua ana fuafuaga e faia mo lo tatou lelei, talia loa i le faatuatua. Aua lava le masalosalo, aua o le Atua o le amiotonu lava Ia. O le ola masalosalo e te vaia ai le mata'utia o le Atua. O le tatou fiafia e tapua'i i le Atua i aso uma, ma tatou ola i le faatinoga o le alofa o le Atua i aso uma i le amio lelei, o le taulaga sili lea ona malie i luma o le Atua, ma e fa'aalia mai ai le Atua i le lumana'i manuia mo ona tagata faatuatua uma.

O Iesu Keriso o le taulaga sili mo le lalolagi uma. E leai se masalosalo, po o se luafesasi. Na mauaa lona faatuatua i le Atua, e faaolaina ia te Ia le lalolagi uma. Ua tatou maua ai le ola solo lelei ma lona filemu i aso uma. O le taulaga e tali atu ai i lona alofa mai, o le talitonu ma faatuatua ia te Ia, ma ia tatou ola i lona alofa tunoa i aso uma.

GALUEGA FAATINO:

Faamatala mai i ni au lava upu, pe aisea na fai ai e Manoa lana taulaga i le Atua.

PESE: Pese ma Viiga 157

A’OA’OGA:

1. Aua le ola masalosalo i le Atua.
2. O le Atua o le amiotonu lava Ia.
3. Faatinoga o le lelei i aso uma, o le taulaga sili lea.

.....

ASO SA: 24 NOVEMA 2019

MATAUPU: O SULI MONI O KERISO

SINI: Ia a’oa’o le vasega ina ia malamalama, i amio a tagata o suli moni o Keriso.

TUSI FAITAU: Mataio 12: 46 – 50

FESOASOANI MO FAIAOGA:

O suli moni o Keriso, ua le o tagata ua fananau faatasi mai i le lalolagi i le tino. A o tagata ua nofo mau ai le Agaga o le Atua i totonu o lona loto, ma ua amio lelei i aso uma e tusa ma le finagalo o le Atua.

O le Mataio 12: 46 – 50 ua fai ma tatou mataupu i lenei Aso Sa, ua faamatala mai ai le taunuu atu o le aiga o Iesu, o lona tinā o Maria, ma ona uso o Iakopo, Iosefa, Simona, ma Iuta, ma ona tuafafine, a o lotolotoi Iesu i totonu o le motu o tagata o loo faatino le galuega faaola a le Atua i tagata.

Ua le talitonu Maria le tinā o Iesu, ma lana fanau tama ma teine, o Iesu o le Mesia na valoia. Ua iai o latou lagona, ua faaletonu le

mafaufau o le Alii, ona o nei mea fou ma a’oa’oga fou ua folafola atu i tagata. O lo latou taunuu la, ao faasaga atu Iesu i le galuega folafola o le malo o le Atua, ina ia aveesea mai o Ia ma taofi le galuega o le faaolataga.

Ua logo atu e le tasi soo o Iesu, lona tina ma ona uso o loo i fafo o loo fia tautala ma Ia. Ua silafia lelei e Iesu le mafuaaga ua o atu ai lona aiga. Ua Ia tali mai ai i se tali, ua Ia teena ai lona tina na fanau mai ai i le lalolagi, ma ona uso na latou fananau faatasi mai i le lalolagi, mai le manava o le tina e tasi.

Ua tali Iesu i se fesili, ma ua faapea atu, “O ai ea lo’u tinā? O ai ea o’u uso? Ua toe tali lava Iesu i lana fesili. Ona faaloaloa ai lea e Ia o lona aao i ona so’o, ua faapea atu, “Faauta, o lo’u tinā ma o’u uso, auā o le faia le finagalo o lo’u Tamā o i le lagi, o lo’u uso lea, ma lo’u tuafafine, ma lo’u tinā

Ua faanoanoa Iesu i uiga fa’aalia o ona uso ia te Ia ma lana faatinoga o le galuega faaola a le Atua. Ua le faapea ua faaleaogaina e Iesu ona so’otaga faaletagata ma lona aiga, peitai ua maualuga i lona finagalo le taua tele o le fesootaiga faale-Agaga o tagata ma le Atua, ina ia mafai ona lavea’iina tagata uma mai le pologa o le agasala. O tagata uma e faalogo ma usitai i le Atua, e iai le faia ia te Ia ma sootaga ma isi tagata, o suli moni ia o le aiga o le Atua.

Ioe, e le faaolaina se tagata i le ola faavavau pe a e le avea oe ma suli moni o le aiga o le Atua. Le fanau o le fiafia e faafesagai ma faalogologo i a’oa’oga a Iesu, ma toaga i le lotu, aoga Aso Sa ma auai i mafutaga a le Ekalesia, o le faailoga lena o le tagata, o le suli moni o le aiga o Keriso.

O le finagalo lea o le Atua na afio mai ai lona Alo pele o Iesu Keriso i le lalolagi, ina ia liliu mai tagata uma i totonu o le aiga o le Atua, e pei ona Ia mua’i finagalo ai i le amataga o le foafoaga. Ua maliu tiga i luga o le satauro, ua tanumia i le tuugmau, ma ua toe soifua manumalo mai ina ia iai tagata uma i le aiga o le Atua faavavau. E le faigofie le ala na savalia e Iesu, ina ia tatou toe foi

i lo tatou aiga na foafoa mai ai e le Atua i le amataga o le lalolagi. O lona finagalo tutasi ia tatou maua ma tufi tauafao ona manuia e tatou te ola filemu ai ma le olioli faavavau.

GALUEGA FAATINO:

Tusi mai igoa o le aiga o Iesu i le lalolagi.

1. Iosefa ma Maria, o Iakopo, Iosefa, Simona, Iuta ma tuafafine e toalua.
2. Tusi mai sou manatu pe aisea na tali ai faapea Iesu i ona soo, O ai ea lo'u tina? O ai foi o'u uso?

PESE: A iai Iesu i se aiga, o se aiga fiafia

A'OA'OGA:

1. Ia fai i tatou ma suli moni o le aiga o Keriso.
2. Ia aua le faia i tatou ma faalavelave i le galuega o le Tala Lelei.
3. Ia ta'ita'i mai tagata i le aiga o le Atua.

.....

MANATU TAIALA TESEMA: UA AUMAI E LE ATUA LE OLIOLI I TAGATA

O le Atua e maua ai e tagata le olioli, ina ua manumalo mai faigata o le ola. Ua tatou i ai i vaitaimi o le olioli, auā ua tatou faamanatuina o le Afio mai o le Atua ua liu tino tagata e ala i le Pepe o le Kirisimasi. O lona olioli ua foa'i mai mo tagata uma.

ASO SA: 1 TESEMA 2019

MATAUPU: IA SAILI I LE ALII

SINI: Ia a'oa'o le vasega ina ia malamalama i le taua o le saili i le Alii, ina ia mauaa i loto e manuia ai tauiviga uma.

TUSI FAITAU: Isaia 55: 6 – 9

FESOASOANI MO FAIAOGA:

Ia saili i le Alii, o le mea e tatau ona faatino e le tagata mo lona ola solo lelei i aso uma. Na faia e le Atua mea uma i le matua lelei lava, o lona finagalo alofa, ia faamalieina le tagata i mea lelei uma. Peitai, ua le usitai le tagata i le Atua, ua fai lava lona saolotoga, ma ua ia fai ia le mea leaga, ma ua feagai ma le ola ua tumu i puapuaga.

A o le alofa tunoa o le Atua, e tumau pea e le liliu, ae faavavau lava, ua saili pea o Ia i lana tagata, ia na maua lava ona manuia faavavau. Ua filifilia ai Israelu e fai ma ona nuu, ao ia e fai mo latou Atua. Ua tuuina atu foi ma tulafono e ola ai i aso uma, ina ia fai i latou ma malamalama o le Atua i le lalolagi.

O le vaega o le mataupu e 55, o le tusi a Isaia ua fai ma tatou mataupu i lenei Aso Sa. O le faatonuga a le Atua mo Israelu ina ia saili o Ia manū o mafai ona maua o Ia, ia outou valaau ia te Ia manū o latalata mai o Ia.

Ua silafia lelei e le Atua le tele o tama'i atua ia ua iai i le lalolagi, ua latou faaosoosoina ma faaliliuina atu loto o tagata ia latou faiga faatosina ma gaua'i atu iai. Ua fefiloi le lalolagi o mealelei na faia e le Atua ma mea leaga ua faaleagaina ai e le tiapolo ma le ola agasala o le tagata. O tagata lava e sili ona mafatia i nei mea leaga uma, o tagata mama'i, matitiva ma le le tauloa. A o

tagata mauoloa, ma malolosi ma maualuluga, ua fai ma tatgata e tete'e atu i le Atua.

Ua valaau mai le Atua e ala i le perofeta o Isaia, ia ta'u atu i tagata uma o Isaraelu, "Ia latou saili i le Alii, manu o mafai ona maua o Ia, ia outou valaau atu ia te Ia manu o latalata mai o Ia. Ia lafoa'i e le ua amio leaga lona ala, ma le tagata agasala ia lafoa'i e ia ona manatu, a ia foi mai i le Alii, ona alofa mai lea o Ia ia te ia, ia foi mai i lo tatou Atua, auā na te matua faamagaloina. Auā o o'u manatu e le o outou manatu, o o'u ala e le o outou ala ia ua fetalai mai ai le Alii.

O le valaau alofa a le Atua mo ona tagata ua lailoa i le pologa i le faatafea ai i Papelonia. O le valaau foi, e faailoa mai ia Isaraelu i Papelonia, ua oo mai le taimi e faafoisia mai ai e le Atua le latou tafeaga. O le mea lea e tatau ai i tagata uma ona saili i le Atua, manu o maua o ia, ia latou valaau atu ia te Ia manu o latalata mai o Ia.

Ua tatau ona iloa e Isaraelu le afuaga ua nofo pologa ai i Papelonia. Ua latou lafoa'i le Atua, na fai mo latou Atua, a'o i latou e fai ma ona nuu. O lo latou ola agasala i le tapua'i i atua 'ese, ua toasa ai le Atua ia i latou. Ua valaau alofa ai le Atua, ia foi mai ia te Ia, e na te matua faamagaloina a latou agasala. Ia matua salamo mai agasala uma, e matua faamagaloina i latou e tusa ma lona alofa tunoa tele. E pei ona pa'u ifo o le timu i le eleele ma ola ma tutupu lausiusi ai laau, e faapena manuia ua folafola atu e le Atua mo Isaraelu.

E vaavaai mai foi nuu 'ese ia i latou, ma latou valaau atu i ai, latou te taufetuli mai ia te i latou, ona o le Alii lo latou Atua, ma le Paia o Isaraelu, aua ua fai i latou ma malamalama susulu o le Atua i le lalolagi.

Le fanau, ia saili i le Alii manu o maua o Ia, aua a oo ina outou matutua ua faigata, ua tele le matalasi o vaaiga faatosina a le tiapolo, na te faoa outou loto, ma iu ai ina fano lo outou ola i le agasala. Fai mai le Failauga 12: 1 Ia e manatua le na faia oe, i

ona po o lou taulealea, a o lei oo mai aso leaga, a o lei oo mai foi tausaga e te fafea ai, "E leai sou fiafia i ai."

Ioe, ia saili i le Alii, nei e tuai, ona e toe faapea ifo lea ia te oe, aue le malosi e ua alu atu. Vaai nei e toe poto ane ua e tuai. Ia saili i le Alii manu o latalata mai o Ia.

O Iesu Keriso o Ia lava na muai saili mai i tatou, ina ua tatou le iloa i le loloto o le agasala. O lana sailiga na oo ai i le satauro, ina ia faasaoloto mai i tatou mai le malosi o le tiapolo; o lona maliu na ia faasalaina ai le agasala i le oti, o lona toe soifua manumalo mai, ua Ia maua mai ai i tatou e fai ma fanau a le Atua, ma tatou maua ai le ola faavavau.

GALUEGA FAATINO:

Ia faamatala mai i au lava upu, le ituaiga saili o loo e saili ai i le Alii

PESE: Ia susulu atu mo Iesu

A'OA'OGA:

1. Ia saili i le Alii.
2. Ia e manatua le Atua a o e taulealea.
3. Ia foi i le Atua, e na te matua faamagaloina agasala uma.

.....

ASO SA: 8 TESEMA 2019

MATAUPU: O LE OLIOLI UA OO MAI

SINI: Ia a’oa’o le vasega ina ia malamalama o le olioli ua oo mai, mai le Atua ona o lona alofa tunoa e fau ma soloi mo ona tagata.

TUSI FAITAU: Isaia 61: 10 – 11

FESOASOANO MO FAIAOGA:

O le olioli, e na te faamatalaina le Atua, i totonu o le loto o le tagata faatuatua i le Atua, o loo i ai le olioli o le Atua.

O le olioli sa i ai faatasi ma le Atua i le amataga o lana foafoaga. Fai mai, ua silasila atu le Atua i mea uma ua na faia, faauta foi, ua matuā lelei lava. O le olioli lena na i ai i le uluai tagata, ina ua tuu atu ia te ia le pule i mea o le foafoaga ua faia i le matua lelei atoatoa.

Le olioli lava lena na toe aveesea mai le uluai tagata ina ua filifili i le leaga, ae lafoa’i le lelei. O loo naunau pea le Atua ia maua e tagata uma, i lo latou lafoa’i o le leaga, a ia saili le lelei o le Atua, ina ia iai ia te i latou lona olioli. O le olioli e maua ina ua e manumalo i tauiviga na e feagai ai. O le olioli foi e maua, ina ua tuanai atu le ola i puapuaga a ua maua le manuia o le ola saoloto mai faigata uma.

O le tatou mataupu i lenei Aso Sa, o le Isaia 61: 10 – 11, sei o tatou vaavaai loloto i le olioli ua folafola atu e le Atua i tagata Isaraelu o loo pologa i le tafeaga i Papelonia.

O le Agaga fegaioia’i o le Atua ua tuuina atu i le Perofeta o Isaia, ina ia logo atu le Tala Lelei i tagata Isaraelu o i le tafeaga, o le a faasaolotoina mai i latou ma toe foi atu i Ierusalem. E latou te toe atia’e le aai ma toe faaola le ola tapua’i o tagata e pei ona iai anamua. E matuā faamagaloina foi agasala uma, ma le toe manatuaina.

E faapea ifo foi Isaraelu, ou te matua fiafia i le Alii, e olioli lo’u loto i lo’u Aua, aua ua na faaofuina a’u i ofu o le olataga, ua na

faapulupuluina i ofu o le amiotonu; e pei o le faatoafaiava ua pulou o ia pei se faitaulaga, e pei o le faatoanofotane foi ua teuteu o ia i ana teuga.

E pei ona ola lausiusi mai o laau mai le eleele ma le faatoaga o mea toto, e faapena ona totogo a’e mai le Alii le Atua o le amiotonu ma le viiga i luma o nuu uma. O le uiga la ole olioli, lea na fetalai ai Iesu i ona so’o. Ioane 16: 21 E liua lo outou faanoanoa ma olioli. A fanau mai se fafine ua tiga ai o ia, aua ua oo i lona aso, a uma ona fanau mai o lana tama, ua le toe manatua e ia lona tiga, ona o le olioli ina ua fanau mai le tagata i le lalolagi. O le olioli foi e tuu e le Atua i totonu o le tagata faatuatua, e le mafai ona aveeseina foi e se tasi lona olioli. Aua o le tagata ua na maua le olioli mai le Atua, e le toe fiafia i mea o le lalolagi, ua na o mea lelei ua fua mai i totonu o lona loto, ma faateleina ai le olioli i totonu ia te ia.

Le fanau ua tatou iai nei i le vaitaimi o le olioli. Ua tatou olioli ina ua tatou iai i vaitaimi na liutino tagata ai le Atua, e ala i le pepe o le Kerisimasi. O le pepe na ia aumaia le olioli i o tatou loto, ona o le galuega faaola, o le faaolataga a le Atua mo le lalolagi. Le fanau, ua na o Iesu Keriso lava e malie ai o tatou mana’o i mea lelei uma, ua na o Iesu foi e maua ai e o tatou loto le olioli moni.

O Iesu Keriso lava na ia aumaia i le au Kerisiano le olioli i loto ma agaga. O lona faasatauroina ona ia tatou maua’a i le olioli o le Atua. O lona toe soifua manumalo mai, ua atoatoa ai le olioli o le au Kerisiano ina ua faaolaina e Keriso tagata uma o e faatuatua i le ola faavavau.

GALUEGA FAATINO: Tusiga Tala

Tusi mai sau tala e faamatala mai ni tauiviga sa lua feagai, ma na taunuu manuia ma ua tupu ai i lou loto le olioli.

PESE: 38 (Pese ma Viiga)

A’OA’OGA:

1. Faalogo ma usita’i i matua e tupu a’e ai le olioli.
2. Ia toaga e tatalo e tupu ai le olioli
3. O le olioli e maua mai i le Atua.

.....

ASO SA: 15 TESEMA 2019

MATAUPU: O LE ATUA LIUTINO TAGATA

SINI: Ia a’oa’o le vasega ina ia malamalama o le Atua ua liutino tagata, ua mafai ona vaai tino i ai mata o tagata.

TUSI FAITAU: Ioane 1: 1- 5

FESOASOANI MO FAIAOGA:

O le Atua o le Agaga lava ia. E le mafai lava e mata o tagata ona vaai tino iai. E iai le talitonuga maumaututu lava o le au Kerisiano, o le Atua e toatasi lava Ia, ae tolu ona Peresona. O le Atua le Tamā, ma le Atua le alo ma le Atua le Agaga. Fai mai le tala muamua o le foafoaga i le Kenese 1: 26, ina ua uma ona faia e le Atua o mea uma, ua silasila atu ua lelei, ona fetalai ane lea o le Atua, Inā tatou faia ia le tagata i lo tatou faatusa; ia foliga ia i tatou. O lona uiga o loo fetalai le Atua isi ona Peresona i le faia o le tagata e tuu iai le pule i mea o le foafoaga.

Fai mai le Kenese, sa soona nunumi le lalolagi ma ua gaogao sa ufitia foi le moana i le pouliuli, na fegaioioia’i foi le Agaga o le Atua i le fogatai. Ua fetalai mai le Atua, ia malamalama, ona malamalama ai lea. Fai mai, o le Atua o lana Upu, o lona mana

foafoa lea, o le puna o le ola, ma le malamalama ola. O lana Upu o loo i ai le paoa (power) o lona mana, na Ia foafoa ai mea uma. O le Upu foi a le Atua, o le ala lea ma le Upu moni, tatou te iloa ai foi le finagalo o le Atua. O lona alofa tunoa i le palealii o lana foafoaga, ua liutino tagata ai, e ala i lana Upu o Iesu Keriso ua afio mai ai i le lalolagi e faatino lana faaolataga mo tagata uma.

O le vaega o le mataupu muamua o le tusi a Ioane 1: 1 – 5 o loo faamanino mai ai e Ioane, le liutino tagata o le Atua. Fai mai le tusitala o le tusi a Ioane, sa i le amataga le Upu, sa i le Atua le Upu, o le Atua foi le Upu. O le manatu o Ioane, o le Upu lea na fetalai atu ma puaina atu i fofoga o le Atua, na Ia faia ai mea uma o le foafoaga i lona tino mai i le matua lelei atoatoa. O le Upu i le gagana Eleni o le Lokou. O lona uiga i le gagana Eleni o le mafaufau o le Atua (The mind of God, the reason of God)

O le Upu i lona malosi na tulaga lelei ai mea uma, ma o loo faatonotonu ai le gaoioiga o mea uma o le foafoaga e oo mai i le taimi nei. O le Upu foi o loo i totonu o i tatou, tatou te iloa ai le lelei ma le leaga. Ua mafai ai ona tatou mafaufau ma faavasega ma faauiga mea o le olaga.

O lona uiga o le Upu, o le faamasino o le amiotonu. O le natura o le lalolagi ma le gasologa o mea o tutupu, e mafua mai i le malosi ma le mana o le Upu. O le Upu foi, o loo iai agavaa uma o le Atua. O le Silisili ‘ese ma le matautia, o le malamalama ma le potu ma le puna o le ola. O le mamalu ma le pule aoao, ae afifi i nei mea uma le alofa tunoa ma le alofa faavavau o le Atua.

O le Upu lava lea sa i le amataga, na foafoaina mea uma, o le malamalama moni ua ia faamalamalamaina mea uma. Ua pupula mai lona malamalama i le pouliuli ma malamalama ai mea uma, ua pogisa ona o le ola agasala o tagata o le lalolagi.

Fai mai le tusitala o le tusi a Ioane, o le Upu lea na foafoa ai e le Atua mea uma, o Iesu Keriso lea le Alo pele e toatasi o le Atua. Ua molimau foi Ioane (Ioane 1: 14) Ua liu tino tagata le Upu, sa

mau foi o Ia ma i tatou, na matou matamata i lona mamalu, o le mamalu lava lea o le Alo e toatasi o le Tamā, ua tumu o Ia i le alofa tunoa ma le faamaonia. Fai mai foi Ioane 3: 16, *Aua ua faapea lava ona alofa mai o le Atua i le lalolagi, ua Ia aumai ai lona atalii e toatasi, ina ia le fano se tasi e faatuatua ia te Ia, a ia maua e ia le ola e faavavau.*

O le faamoemoe o le tusitala o le tusi a Ioane ina ia malamalama Eleni o Iesu Keriso o le Upu a le Atua, ua liutino tagata ina ia faaolaina ia te Ia le lalolagi, ina ia faigofie i lo latou poto faafilosofia ona talia le Tala Lelei i le faaolataga a le Atua mo tagata uma, e ala i le Atua liu tino tagata.

Le fanau, ua tatou latalata i le taimi e faamanatu ai le fanau mai o le Pepe o le Kerisimasi, o le Atua liutino tagata e ala ia Iesu. Peitai ua tautala Ioane i le itu faale-Agaga. O Iesu Keriso o le Atua lava Ia, sa i le amataga. O Ia o le Upu ma le poto o le Atua na ia faia ai mea uma.

Ua liutino tagata ina ia mafai lava ona faaolaina agaga o tagata uma, ina ia avanoa tagata uma i le lagi e mafuta faavavau ai ma le Atua. Tatou sauni faamanatu fiafia le afio mai o le Atua liutino tagata.

GALUEGA FAATINO:

Ta'u mai ni mea se lima ua e manatu o loo faauigaina le Upu, e pei ona ta'ua i le tatou tusi faitau.

PESE: 357 (Pese ma Viiga)

A'OA'OGA:

1. O Iesu o le Atua liutino tagata
2. Ia nofo i totonu o tatou loto le Upu a le Atua.
3. Ia tatou faatuatua i le Upu a le Atua.

.....
IA MANUIA LE KERISIMASI & TAUSAGA FOU 2020